

चितवर "हृदय" या

के भूमि



रवि शाक्य
इखाळें, यल

मिंमनःपौ

(सिरपाः प्रतियोगिताय् मवनिगु)

चित्तधर 'हृदय'

पिकाक—

चित्तधर 'हृदय'

३६१, न्यत-तुंछे, कान्तिपुर-१३, नेपाल।

व्याक अधिकार लेखकया

नेपाल संबत् १०८८

न्हापांगु

मू० ३१-

थाकू—

नेपाल प्रेस

शुक्रपथ, येँ

द्रुहलपा

थ्व पौ

जिमि स्वर्गीय ससःमां 'ज्ञानमाया' यात,

गुह्यसित जि छ हे मस्यु,

जितः जिमि 'व' या जातः जक लः लहानाः परलोक जुल।

अयनं जि आशा याना

देव सुवने थ्व पौ व्वनाः जिमि 'व' यात न्वाइ—

“ना, छं म्याय्यात बांलाक विचाः याना ति”

इनाप व महादया

न्हापां जर्मनीया महान् कथाकार स्टेफान ज्वाइगया “हमस्यूह मिसाया पौ” बाखंया अनुवादक भाजु तीर्थराज तुलाधरयाके इनाप याय—ज्वाइगया बाखं जिमित हया बिया थें थ्व बाखं नं वय्कःपिं थाय् थ्यंका ह्यु। छाय् धाःसा ज्वाइगया व बाखंया प्रुफ स्वस्वं थ्व बाखं च्वयगु प्रेरणा वल।

अनंलि सिद्धिरत्न दाजु व ल्हासा साहुपिन्त दुनुगलं निसें महादया छ्छाय् गुमिसं जि कुति हे वने मनंहास्यां च्वयागु थ्व बाखं पूर्वक न्यनाः ल्हासाया लँयागु जक मलु व धर्मप्राण ल्हासादेया नं नुगःचु थें ज्याःगु मोखाङ्ग (बहि) आदि गुम्बा गुम्बायागु व मेमेगु नं आपालं आपाः मस्यू-मस्यूगु अनया रहन-सहनया खं नं स्यना-कना दिल।

अन्ते चन्द्रमान माष्टर साहेबयात कच्छुनाः महादया द्रुहलपे गुह्यस्यां देगले तोलं तय् थें थ्व बाखं धाथें मिखाया न्ह्यःने वय्क ख्वाःपौ च्वया बिया दिल।

कच्छुहा—

चित्तधर ‘हृदय’

मि
म
नः
पौ

कर्ण-दिपे मिसा छह उना तःगु । सनां बःपि लिहाँ वनेत मसंकुसे
मुके माः धकाः भिकु भिनिकुति गोँसिया सिँ पँ चिकाः ध्यो, सिलदाय्,
कपू. श्रीखण्ड इत्यादि सायाः सायाः मि दन्के याना थकुगु ।

थज्याःगु सिँ-पँया नाप नापं व बुढी नं इता थें छ्यां च्वन ।
थाहाँ वना च्वंगु मियाःया नापं वर्षां नागलीबले खुसि बा पुखुलि सर्गते
थ्यंक त्याः छयाः थाहाँ वना च्वनि थें कुँत्याः नं थाहाँ वनाः मनं हे
मखना थें च्वंक सुपाँय् ज्याना वना च्वन थुँ थें, भालु थें, छु थें छु
थें च्वंक ।

वः लिबाबां वल, लँय् जूपिनि छु खँ, भगवती द्यःपालाःत नं
हाःसः मइय् धुं कल। व हे मसांखिचात उखे थुखे जुया च्वंगु दु, उना
च्वंगु दु। याने-इने ताय् दया च्वंगु किलिकिलिचाया सः तोष्वीक
धौं तय्गु तीहू सलं थाराकतु न्हू, नुगः हे भार भार मि।

खः तिमिला मदुसां व सिपँया मिया जलं यानाः भचाखुसि जक
मखु लुती थ्यंक नं जजमानं खनेदु। पाहाँदिपे धाःसा सी उना तःगु मदु,
उकि व सी उनाच्वंपि गुथियारतय् मिखा लुति लिहाँ वयाः भचाखुसीसं
थात। ख जा अपि सकलें हे धया थें बाज्यो वने धुंकुपि, उकि अज्याःगु
इले तःको तःको हे दिपे च्वने धुंकुपि, अथेनं छहस्या छु मने वल थें
भचा ग्याःपहलं खुसी क्यनाः धाल—“ हुं थाय् लाक हे मखु ला ? ”
मेहसं भसंक वंकाः धाल—“ खः बाः, छयँः याताहाँ च्वहले दिकाः भौं
छकू नुगलेतिकाः” अले ला सकलें ससत्तिक मुन, वं वयागु ख्वाः
स्वत, वं वयागु ख्वाः स्वत, सुनानं मेगु छुं छुं मधाः। चाकः उलाः
मित्याः जक स्वया च्वन।

स्वया च्वँच्वं अमिसं पाःलाक धया थें फसं मित्याः भचा चिला
वंबले सिँया हतं सीहस्या ह्यय् नुगःया कस्तं पेपुना च्वंगु छगू छु छु
ज्वाह थिना च्वंगु खन। अले सनां वःपिसं याकन तोता मवंगुलि
बांलाक मि मच्याःनिबले म्हुतुइ बा ह्यय् वाला स्वय् मखंपि गुथियारतसें
छुं न छुं द हे दइनि लिपा मुकाः मालाः काय् का धकाः पिया च्वने
मफुत, छहस्यां तीजक पँथं तःक्यंकाः सालाः पिकालं ला गाखि दुगु
क्यँचियागु ह्मिचा छपाः जुया च्वन। अले आशां हथाय् चाःपि
गुथियारतसें सिँकाचं भ्राभ्रां दायाः मि नया च्वंगु गाखिया नौ थाथा
यानाः ह्मिचा चाय्काः स्वत। गुजिगु जया दुने मि मनःनिगु तूलया
ह्याउँसे च्वंगु दुबःसा व वया नापं भौं छथू दुगु जुया च्वन। अमि ला
नोट् पो चिना तःगु ज्वी धकाः काचा काचा पयना स्वःबले व ला न्याकु

खुकु मछि हाकःगु स्वकुति मछि व्यागु भी नेपाः भौं या सिवे बांठाःगु
भौं निलः थ्यानाः च्वया तःगु पौ खनी। अले व ह्मिचा चाय्कुह मन्
आशां यानाः व भौं जुक वांङ्कत। ह्मिच फसं मखीकुगु जूसा मी हे
लाइगु। काचाक छह स्वय् हे सःस्यू ख्वाः वःह गुथियारं व पौ कयाः
छको थय्क च्वनिसें क थय्क स्वत। लिपा पलख सुंक च्वनाः व पौ
च्वना हलः -

ल्हासा (चीन)

ने. सं. १०७७

सिद्धाथो १५

यमैं,

न्हिल्यंगु सुवाः !

लाःसा छ थर पती ल्हासाया नापं चीन नं खनाः आश्चर्य चाया
च्वनि-गनं थव मिजं चीन थ्यंनः वन धकाः। थौं कन्हे अथे हे धाय् माः,
च्वय् माः। थव ल्हासा जक मखु कुति, केरुं, ग्यांचि, मिखाछेँ इत्यादि फुक
थाय्थात नं चीन धकाः च्वय् माः। धा नं थव फुक न्हापांनिसें हे चीन
राज्यया दुने लाः धाइ। अयूनं ‘ अम्वा ’ धकाः चीनी गभर्नर दय्क
दय्क नं गय् गय् जुयाः मस्यु, थव तिब्बतयात छगू अलग राज्य थें
याना तल। आः मुक्ति संग्रामं लिपा जनवादी चीन थःगु सम्पूर्ण राज्य
नालाः कताना कयाः नेपाल आदि थः जःला खःला देश नाप नं
त्वादला च्वने धुंकुगु स्वापू हानं स्वाना हल। उकि आः जिपि थन च्वनाः
मित्र व जःला खःला राष्ट्र चीन सरकारया नाप जूगु न्हूगु व्यापार
सन्धि अनुसार व्यापार याना च्वना धाय् माल। अथे ला सिंह
सार्थवाहया पालंनिस्थं व्यापार याना च्वनापि भीपि प्रताप मह्यया
सन्धि व प्रताप सिंहया सन्धि लिपा तर्क सरकारी अडा मदुनिबले निगू
सरकार सन्बन्धी ज्या नं भीसं याना च्वंगु, उकि गुलिखे भी अजिमापि

नेपाले खरखं सिना बने धुंकल, गुलि खे आज्जुपि नं थन हे च्वनाः बने ज्याज्यां थनया चा जुया बने धुंकल, थुक्रिया ल्या चाः हे महु। उकिं भी नं थौं व हे भवले न्हाः वना च्वना धाय्गु लुं अपो मजू।

खः का बरु लं थ्व पौ खनाः धाय्फु थन तक थ्यंकाः जीवनया बावंकाः आः हानं अज्याःगु खँ छाया, हानं स्वयं हे मझालापुसे च्वंक थथे सःतेगु हे छाया ? धाखें ला मै, जि थथे मनं मनं मसःतुगु दिन हे महु। थौं सिपुन्ही-भी हंकुगु पुन्ही जूगुलि लुमनाः सहयातां सह याय् मफयाः भीगु व पुलागु खँयात न्हापाः यानाः च्वछाय् हे थ्व पौ च्वयागु जूगुलि जि दकले यःकथं छन्त सःतागु खः। हानं पौ नं न्हाकथं हे च्वयागु खः। छाया धाःसा न्हापा न्हापाया थें “ शुभ भापा भिनकं तसे ह्या ... ” धकाः पौ च्वय्वले जि थन सँदेशे थ्यंका च्वनाः छ आमकन नेपाः थ्यंक च्वंहसित च्वया च्वनागु थें ज्वी। जि थौं अय् ज्वीके मयो, जि गुगु खँ छन्त धाय् त्यना, व खँ हंगु सत्तिक च्वनाः बांलाक थ्वीक कने माःस्ति वः, उकिं दकले सत्तीगु सलं सःता च्वना। हानं आः छ मझाले माःगु नं ला मखुत। जिके छंगु जातः ला महु, अय्सां छ नं ला न्येदं प्वी धुंकल ज्वी मखुला ? लुं जुयाः जिगु थ्व पतिं यानाः छंके ल्यासे दना वःसां, अबले छको निहने प्यते निह ध्वदुक नाप लाःबले जि अथे सःताबले खाः ह्याउँकु थें ह्याउँकुसां सुनानं खनि मखु, छाया धाःसा जि स्यू जिगु थ्व पौ छं एकान्ते कथाय् वा याक चा भुतुली च्वनाः च्वना च्वनि, अले मेपिसं गथे यानाः ताइ ? अबले जूसा धकाः छ आखः मसःगुलि मेपिन्त पौ च्वंके माः थःपिनि दुबिस्ता खँ नं सकतां भरङ्ग उले माः। आः ला छ भन्तेपिनि नाप नाप जुयाः बांलाक आखः सय्का हे तय् धुंकल, सुयातं भीगु खँ सीकः ताय्कः ज्वी माःगु मखुत। उकिं हे थ्व पौ च्वया च्वना, भीगु खँ सकतां लुमंक च्वयाः। विन्ति धाय् मै, छं नं गनया न्वाः महुगु खँ धकाः दथ्वी हे वां मझसे पूर्वक च्वना व्यु, गथे जि मझकुसे च्वया च्वना।

खः का थौं कन्हेयापिनि थें भी निहस्यां येकाः हनागु मखु, निखेयां मां-वौपिसं स्वयाः खनाः हंका व्यूगु, व नं मचांनिसं धाय् माल, उथाय् तक जा छं मझालाया भाय् हे मायूनि। सि नं च्यादँचा दुह मचां सीगु हे छु ? सुंक जा लिसा तःवइ, क्येँ लिसा तःवइ। ‘मामं थथे धाल, मामं अथे धाल’ धाःवइ। छंत छुनि छु। लुमंनिला ? छको कानकानपीच्या ह्मिताबले जितः थियाः ‘नां काय्माः, नां काय् माः’ धाःबले ‘व का !’ धकाः धयागु। तेलकासा वा सुलाकासा ह्मिटेबले ला नां काय् माःगु हे महु, हुरुक लित, च्वाक थिल, सिधल। उकिं जि अबले कहाँ बयाबले तक नं छं जितः वचं तय् मफु। ख नं अथे ‘छि-छा’ धकाः वचं तःज्वीगु करपिं पहः वः। हानं दकले सत्तीछ पासा-भाःतयात छि, वय्कः धकाः तापाका च्वनेगु जितः ला हिसि दु मताः।

थथे ह्मिनु ह्मिनु भीसं मचाय्क भीगु ह्म ह्मासा ह्मासां थाहाँ वया च्वन। छको छको थःछें चाहिना वइबले छगू छगू पाका वइगु। न्हापां ला भांतां लंयां पर्सिचा जुल, उकी मा हे मोगु गा नं न्यया वल। हानं वःबले गां तोपुइ माःथें नं च्वना वल। अले ला छ ककछुना जुइगु, जि खन, मिखा चूलात धाय् व खाः नं ह्याउँसे च्वंकइगु जुया वल। जितः नं न्हापा ह्मिता जुयागु, खाना जुयागु, हाला जुयागु मज्यू थें च्वना वल, तस्सकं मझालापु थें नं च्वना वल। अयूनं जि छन्त स्वयत्तु माःस्ति वः, उकिं छ छें दइबले जि उथेतु दुहाँ वय्गु। हानं जि गनं वने माःगु नं ला महु, ल्हासा साहुतय् मचात जूबले ल्याः भति भाति व पौ सम्म च्वय् सल धाय् वा गा पिं जूबले मेमेपिं त्वाःया पासापिन्त थें पाठशाला सम्म नं छया तःगु महु। स्कूल धयागु ला अबले दर्बार हाइ स्कूल छगू अन च्वंने धयागु ला सुनानं धाय् जक नं सःगु मखुनि। उकिं जि न्हागु श्ले दुहाँ वय् धाःसां लुं मपं। छ धाःसा जि खनेव यानंतुं हे छखे चिला वनिगु। उकिं न्हापा ह्मिटे, ह ले, ल्वाय्गुया

पलेसा उथाय् थ्यंबले खँ लहाय् तक नं मखन, बांलाक लुदंक स्वय् तक नं मखन । समय धयागु नं विचित्र हे खनी बाः हला ?

छन्हु मांपिनि खँ लहाना चंगु ताल-छ बाहाय् तइगु धकाः । छाय् बाहाय् तइगु, बाहाय् तयां छु ज्वीगु अबले जि छुं मयू । हानं त्वाले पासापिनि ततापि बाहाय् च्वन धा गु न्यना, तर छन्त धाःसा बाहाय् तइगु हँ । थ्व 'तइगु' व 'च्वनिगुली' छु पाः व नं जि छुं मयू ।

धाथें, छ बाहाय् तल । मांपिनि लिमलाः । छुस्या-मुस्या कःछे छु छु नकः वने माः धाल । हानं बाहाय् पिकाइखुनु देछाया बीत वसः मानि धाल । हाला जुल, सना जुल, उखे थुखे न्यना जुल । जि छद्म ज्यो थें अथें च्वना च्वना, मने छु छु खँ लुया च्वन - "सिन्हः छाय्कः वने माः धाःगु, सिन्हः गय् छाय्केगु ज्वी ? हँकुवले ला छु मचा तिनि, धाः धाः थे याना बिया, सँ प्याकेखुनु नं सँ छय्का बिया, सिन्हः तिका बिया, धाः धाःगु सकतां याना बिया । न्हाय्कं स्व धाय् माः धाल । अथे हे धया बिया, सकलें हररर न्हिल । आः ला अथे खइ मखु, अन ह्यस्यूपि, थथितिपि सुं दइ मखु, फुक हे ह्यमयूपि, नय् थें नय् थें स्वइपि गिजे-गाजे याइपि जक ज्वी ! उकीसनं जि नं आः ला १५ दँ दय् धुंकल, थुनाय् ग्वाय् छपु निपुसां खने दय् धुंकल ।"

बाहाय् पिकाइखुनु सुथंनिसं हे सःतःवःह्य पिपा च्वन । मांपिनि छुछु छय् माःगु ज्वरे याना च्वन । जि नं वसतं-इसतं तीत छु कोट् फी, गुगु पत्ती सुरुवाः लं फी थकाः बिचाःयाना च्वन ।

हानं छद्म मेह्य च्वय्कः वःह्य वल, 'याकन भासँ' धकाः हाल । अले जि नं वसतं तिथाः सँसँ छयनाः तुपुलि भचा वेक्य्क पुया । न्हाय्कं स्वयावले थःत बांलाः, ल्वः ताल ।

जिपि छिनिथाय् छेँ थ्यंबले छन्त फेतुका नय् धुंङ्गु यंकाकथं छंगु न्हःनेसं लाया तःगु लासाय् फेतु कल । गुरुजुपिनि माःमाःगु पूजा

विधि यात । अथे हे ११ ताःति थाःवले जितः थना यंकाः अन स्वना तःगु वदःयागु सिन्हःवत्ता लःलहात । 'च्वसिन्हः छाय् कि' धकाः नं धाल । सिन्हः पचिचां कयाः थय्क स्वयां छंगु ख्वाः हे खने महु कच्छुना च्वन, मानो द्वितीयाया चन्द्रमा थें छवालाचा जक कपाः खनेदु । जि छंगु ख्वाः छपातं स्वय् माःसे वल, छं थें स्वइला धकाः अथें दना च्वना । छनाप च्वनाः छंत त्वपा-तापा च्वंछ गुलुमांजुं 'सिन्हः छाय्का दिसँ भाजु' धकाः धाःवले छ मं अप्पो कच्छुना विल । अले जि छंगु छय्ले सिन्हः तय्केत पचि दिका । सँय् सिन्हः की मलाःनि जिगु लहाते करेन्ट थें वल । काचाक लहा लिमालाः लिचिला वय्यनां 'सिन्ह वत्ता लःलहाय् मानि' धा गु सलं जितः पना विल । अले जि कच्छुनाः सिन्हः वत्ता लः जक लहानां अमिसं 'भागि याय् माः' धकाः छं जितः भागि याकल । अथे ला हँकुवले नं छं भागियाः, विज्यासले वंजला वनावले नं अय् हे च्वसिन्हः छाय्कावले नं भागि याः । अज्ज न्हि न्हि जानय्त् नं मामं भागि मयाकुसें छन्त मनकु । तर छं अथे छिमि थछेँ सकस्यां न्ह्याःने भागि याःवले छखें मछालापुसे नं च्वन, मेखें छ-छि पीसे च्वं थें धाय् ला, कुचुसे च्वं थें धाय् छु थें छु थें जुयाः मचा न्ह्याइपु नं ताल । अले जि थःगु थासे हे फेत्तना । तर जि मचाय्क हे जिगु मिखा छं पाखे व्वल खनी । छंगु सँय् वेक्य्क किता च्वंगु हिउँसिन्हः छधो खना, मानो वर्षाया ख्यूसे च्वंगु सुपाचे फिलिक्क पलपसा तो थें । जि गवय्त् नि गवय्त् स्वया च्वना, अन वैग जाय्क च्वसिन्हः छाय्कःगु स्वय् धकाः स्वया च्वरिपि मितातसं नं पने मफु ।

धाथें मै, खुनु थें जितः माने यानाः नकुगु गबलें गबलें हे महु, गनं हे अथेभनं मानेयाकाः नय् मनं । थ्वया कारण अबले जि पूर्वक मथूसां ससःमांया याकःजिलाजं धाइगु थ्व हे ज्वीका धकाः अंनाज सम्म दत । छु छु जक तया विल, गुगु जक तया विल जि लुममं । लुमनि नं गन, आः हे तिनि थन पंवुलापि भचा आपाः दसेलि छता बता म्हुनु हीकाः

नय् खन । नत्रसा व हे च्या चपा थुपा ला तर्कारी, छको निको भमो । क्यै खुं सा वुके हे थाकुबले जा न सां व हे ला दुगु तर्कारी छता नाप । न्हागुसां जि स्वय् उलि साःसागु ज्वलं ला थाय्मुइ नं दु थें मच्चं ।

नय्-नी सिधय्काः जि न्हिच्छि अन हे व जिगि जिगि च्वंक छाय्पा तगु कथाय् ह्याइपुक च्वना च्वना । न सुं खं ल्हाय्पि पासा दु, न छुं याय्गु ज्या हे । अबले आः थें आखवार-इखवार स्वय्गु चलन नं मदुनि । छको निको छिमि किजा बइ, चुरत छपु बी, सलाइ च्याकइ वनि, उलि हे । बहनी ज्वीकाः वल मांपि सगं ज्वंकाः थ्यंकः वल, नापं जिमि क्यहे नं दु । सगं-सिगं बीधुंकाः मांपिन्त नं जितः नं हानं भव्य नकल-देमा भव्य ।

छें थ्यंवेले वाचा जाल, जि लं-लिं तोताः कथाय् ग्वारा तुला थय्क स्वयां न्हिच्छिया दुने मामं ला कथा हे मेगु याना तःगु-न्हूगु भयाःकापः, देलासा व फुंगखोल नं न्हूगु । छपाः निपा तस्वीर दुगु नं उगु थुवे, थुगु उखे यानाः लवय्क खाया तःगु । जि स्वयां च्वनातिनि, लि जक तिना तयागु खापाया नापं छ छम्हं घारांक मिक् ध्वानाः दुतछ्या हागु । जि भसंक वन-छन्त थ्यने हागु ! पिने अमि मां न्हाय् निम्हं जानाः खापा तिनाः न्ह्युन्ह्युं सिखः तया च्वंगु ।

जि मिखा तिसिनाः विचाः याना च्वना - “छ नाप गय् खं ल्हाय्गु, छु खं ल्हाय्गु, गय् यानाः खं छुइगु ?” अथय ला जि थःयासिबे थकालिपि व्याहा याय् धुं कुपि पासापिनि पाखें मिसा-मिजं सम्बन्धी खं ख गुं मखुगु यक यक न्यना तय धुं गुं दु । हानं ३४ दं न्हापा छ नाप क्षिता क्षिता ज्वीबले खं मल्हानागु नं मखु, क्यहे चां सःतइथें ‘पीभत’ धका मसःतागु नं मखु, अय् नं कथाय् एकान्त लाःबले खं ल्हाय् भचा हे छि थें मच्चं, मझालापुसे, छु थें छु थें च्वं ।

अय् धकाः छ नं सत्तिक व गु मखु, लुखाया लिक्सं छु मने लीका च्वन थें मस्यु, खासा कय्कुं थें कय्कुना च्वंगु जि तीजक वागः मिखा कनाः स्वयाबले छया सिबे वान्हि न्ह्य तिनि दुहाँ व ह्य लम्फा-चया जले बांलाक खं । लाःसा छं नं अय् हे मखाः खं वाय्का च्वन ज्वी - “चंपाचां थय् धाःगु, पुनमायाचां अय् धाःगु । छि ! लतं चां गय् गय् धाःगु ।” मखु ला ?

थथे छ नाप थय् खं ल्हाय्, अय् खं ल्हाय् धकाः ग्वसाः ग्वग्वं छको ला ननि मवासे साला हया नापं थ्यने ला धकाः नं मने वःगु खं, लिपा नसंचा ती जुल ला मस्यु जि न्ह्यः वल । छ नं लिपा खाता कय् तुं ग्वारातुला छत थें ।

कन्हेखुनु सुथे जि न्ह्यलं चाःबले खाता कय् च्वंगु फुंगे चिकंवां जक ल्यंदनि, छ दना वना च्वने धुंकल । जि कथां पिहाँ वयाः खवाः खी हे सिले मलाःनि छ थः छें, वना छत । बहनी लिहाँ वइ ला धकाः अनेक खं मने वाय्काः छंगु कलिसः वइला धका लैय् न्हाय्पं लाया च्वनागु सिस्ति, छ उखुनु लिहाँ हे मवः ।

छ नाप गवले नलुया, गुकथं भीसं जीवन छुना व खँया विचाः हे याश् मलाकं अबुजु वुटा ज्वी धुं कुगुलि ह्यपाः बीत जि ल्हासा वय् माल । मांया धासा मचा छद्म दय्काः जक छ्या हय्गु विचार । छं धाःसा लयलय् मोल्हीगु मतोतु । जि बांलाक चाः छ देकुती दुहाँ मवनेव मांया खवा खयूँसे च्वंकइगु । न्हागुसां अबुजुया तारंतार पौ वःगुलि जि ल्हासा वय् हे माल, वया । अबुजुयात कत छ्या हया ।

वय्त नं अबले कालिभोग्या लं नं बांलाक मचाःनिगुलि व हे कालविल कनाः ज्वीमाःगु कुतिया लं मवसे मगाः, थाय् थासे जिवं ज्यू मज्वीक भवर्लंगा ता छी माःगु व आका भाकाय् च्वलः वय् योगु । उकिं थःथितिपिं सकसिनं सगं छ्या हल, खयैवातां जक हे प्यत जाः ।

तर व सकतां खं छं खनि मखु, छ कथाय् च्वनाः ख्वया च्वन । लिपा
बेला बी त्येकाः तिनि छ थाहां वल, व नं निहस्यां घय् घय् पुकाः ।
जि छतका दां बियाबले छं लहा थर थर खाकाः स्वःगु आःतक नं
लुमंनि । हानं भागि याःबले गवय्तनि गवय्त तुति ज्वना च्वंगु नं जि
लोममंनि । धात्थेया खं जा मै, जि उखुनु तुयूगु मोजा न्हाना तयागु
जुयाः कन्हेखुनु चावहिलि वनेत हानं मोजा न्हानाबले उकी घःने पाखे
महामञ्जुश्रीया पालिकाय् धर्म श्री मित्रया मिखा थें ख्वबिया च्याः च्याः
खनाः जिगु नुगः काइँया मिना वःगु आ तकं मलंनि ।

न्ह्यागुसां जिपिं चावहिली चच्छि व सकोया महाद्यःवाहाले
चच्छि च्वनाः वयां सतिखुनु १० ताः ति इले लगाःचो थ्यन । अन च्वंगु
चीभाःया कस्तं च्वनाः सगं कथाः चिपं नं थो माःगु जुया च्वन । उकिं
जिमि बंजा पासापिं निह व भल्या नायो छह नं नापं भोळुकल । अथ्य
ला जिमित छें पिहाँ वयाखुनु चान्दे हे च्वते मातने, छेदी थनाः थनाः
हे गोसगं बिया हल, धां दिगुली नं लँय् दनाः गोसगं कया वया । कन्हे-
खुनु नं चावहिली सगं बिया हय् धुंकल । अन-लगाःच्वे ला धौसगं नं
विल । लिपा नय् धुंकाः भल्यानायां दनाः चिपचाप फुकं पोचित ।
जि ला छु याःगु ल्याः धकाः च्वनां कन्हे कूला याय्त ज्यू धकाः
धाल । धापू छु धाःसा अनंनिसें जिपिं सकलें छजाः जुल, चिपनिप
नं छुं मन्त । अनंलि जिमिसं तःवःपिं दाजु-किजा पासापिं नाप बेला
कयाः थय्क स्वया, जिपिं निभाःबीपाखे स्वया च्वनागु जूगुलि यँ, यल,
ख्वप स्वनिगलं खनेदु, दकले ल्यूने स्वयंभु । अन मत बियाबले जिगु
मिखां स्वयंभुया गःतगिने च्वंगु मिखा नं खने दु थें च्वना वल । छाय्
धाःसा उखुनु तक जिगु मिखां छंके बेला कयाबले छं ललःधा गु मिखां
स्व गु भल भल लुमंनि, उकिं याने खने दुथें मच्चंगु व स्वयंभुया मिखा
नं अथे हे थें खना च्वना । लिपा जिपिं चीभाः चाःहिलाः पूव स्वयाः
कहाँ वया, तःवःपिं सकलें यँ पाखे स्वयाः वल ज्वी माः । 'लिफः स्वय

मयः' धाःगुलिं जिमिसं मस्वया । ख हे स्वःसां अपिं खनि नं मखु, छाय्
धाःसा जिमि निखलःस्यां द्यवी चीभाः हे धकिं जुयाः पना च्वने
धुंकल ।

धात्थें ला मै, जिपिं पाखं कहाँ वया च्वनागु मखु, पाखं जिमित
कत हया च्वंगु । गुलिं जिमिगु तुति पाखं भवास्याक कत हइ, उलि हे
जिमिगु मन हासाक छें लिहाँ वइगु । जिगु जक मखु जिमिगु, छाय्
धाःसा जिपिं स्वहस्यां छें दु, स्वहस्यां छें छह छह लुमंकेपिं नं दु, अज
अमि ला छह छह मचत नं दु-छहस्या काय्, मेहस्या म्हाय् । जि,
जि छ हे छह जक जूले मनया इना वने मोगुलिं भन छगू हे सूरं
छंथाय् छंगु खवाले, छंगु म्हुनुइ, छंगु छुकी छुकी प्यप्पु वइगु । वयात
लिगनां लिगने मफइगु, मिखा लःलः धाया वइगु, अले थय्क अमिगु
ख्वाः स्वय्गु, अमिके नं थःगु हे किपालु खनिगु ।

समयं न्ह्यागुं याय्फु, वंयाय् मफुगु छुं महु । उकिं न्ह्याक हे
जिमि मंमदुसां जिमिगु हे तुति जिमित यंकां च्वन वं धाः धाःथे पर्वःथात
जनी चिकु चिकुं । जिमित मन तय् थें यानाः वाउँसे वाउँसे च्वंगु
सिमाहःया नाप नापं रंगरंगया गुँ-स्वां नं हया च्वंगु, भंगःतय्गु यइपुसे
च्वंगु सः लिसे याने-इने गांगांया मे नं ताय् दया च्वंगु । जिपिं कय्
'यरंखु' खुसी थय्वले जा थुइती जुल, अन हे बाय् । नय्नी धुंकाः न्ह्यः
मवःतले जिमित सँय् भाय् स्यन-छु लः, थुप्पा-काति, भे जा,
पिंज्या-दाजु किजा तता कयहेँ, किमे-कलाः, डा-जि, खयरं छ, खोरं=
व इयादि ।

कन्हेखुनु सुथे न्ह्याखुनुया भवय्व व सगंख्येँ कूला यानाः जिमिसं
'दुंगा' छिनाः 'यरंखु' पार याना । उखुनु न्हिच्छि धया थें पाः गय्गु ।
पर्वःया जंजं, जःखः सिमा दुगु लं चाःचाःहिलाः गय्गु अपाय्चो
ह्वाइपु मजू । गनं गनं न्हाय्पं हे सिचुसे च्वंक लःया सः नं ताय्दु ।
सन्ध्याइले 'सिपा' गां थय्काः अन चच्छि च्वनाः कन्हेखुनु 'चौतारा'

थ्यन । अन अडा नं दु, बजारे छह-निह अवुजुया हस्यूपि नेवाः साहुत नं दु । जितः हसीवं वना यंकाः पाहाँ-पिहिँ यात, अमिथाय् हे छथाय् बाय् लात । म्हंफु-मफुया नाप नापं नुगः हे तिक मिक 'भाजुया व्याहा याय् धुन ला, मत्त गोहा दत् ?' धकाः नं न्यन । जि छु लिसः बी, न्हिले थें यानाः पार याना बिया । पुलां नेवाः पासां सकतां खँ कना बिल । जिगु ख्वाः स्वयाः साहुं धाल-नुगः मझिके मो भाजु, लहासा थ्यन धाय् व सकतां लोमना वनि । तर जि मचाय्क हे भसु काः वल-गय् लोमनि ! मि कागु लोमंके फुसां, च्वापुं ख्वाउंगु लोमंके फुसां जि छन्त लोमंके फइ थें मताः ।

मनू धयापि मनू हे जूगुलि साधारण मनूतसें नं अथे ल्याय्हावले छेँ त्वःते मालाः नुगः मझिपि नँनेवाःतय् मन तय्त् छुं न छुं याय् माः धकाः स्यू खनी, उकि जिमि थः भल्यात, मेपि भल्यात व गांमांयापि मनूत नं जानाः अनेक प्रकारं ख्वाः-खी याना जिमिगु ह्याइपु लंकेगु खः । गनं मे हालाः न्यंकइगु, गनं जिमित नं साला यंकाः थःपिनि नापं प्याखं हुइकइगु व गनं गनं ला वनां वने मझिगु चिकिचा व्यागु लँय्-चय् पाखे ततःगोगु ल्वहँ व कय् स्वःसा सः हे ताय् मदय्क न्हाना च्वंगु चीचा बालागु खुसिचा खने दयाः धाथें थँ स्वयां परवत, कस्वयां समुदर' धाःगु सिन्हाज्या मे लुमंसे वइगु लँय्-फुसे लाक मझि मझि कय्ता खायाः उकिया तःलं वने माः धकाः धाइगु व मखुसा च्याना छगः ध्यबा दस्तुर बीमाः धकाः गथांगुया जगाः थें नं काइगु । अज्या थाय् गनं गनं 'खीँया' धकाः उखे नं थुखे नं सिमाय् खिपः चिनाः उकी रोपलाइन थें च्वंक दोके छगः खाया तःगु खनेदु । उकी मालताल जक तया छइगु मखु गुम्हं गुम्हं हथाय् हथाय्पि भल्यात नं च्वना वनिगु । छह बलाःह मनुखं छवे च्वनाः खिपः साला च्वनिगु । गवलें गवलें लः थाहाँ वया च्वनिबले लाक व खिपः साला च्वहस्या लहाः ल्यानुयाः वा खिपः छामुया वनाः लखे नं थ्यूँ हँ । गुलि ग्यानापुगु खँ । मी ला भचा

लँ ताःहाःसां चाःहिलाः हे वनिपि जुल, अनं वने मो ।

थथे भल्यातय् नाप ख्याः-खी यायां दुनें ह्याइपुसां पिनें न्याइपु पहः यानाः जिपि 'काःलः' थ्यन । अबले 'लिस्ती' थाहाँ वने मोक अडा फुक 'तातोपानी' हया तय् धुंङ्गु, उकि अन पुले माःगु जगाः भंसाः सकतां पुलाः अनंतुं बाय् च्वना । कन्हेखुन काःलखे मो-मी लहुयाः जिपि न्याः वया । काःलःया स्वधाः हिति भवारर हाया च्वंगु दु । काःलः धाथें हे काःलः, न्हापां ला लः थी हे मफु च्वीं च्वीं पू । लिपा तीजक तीजक लहाः तुति थुं थुं हितिधाले हे मोलहुया ।

अनं काहाँ ववं पर्वतया ह्याकिने लाक 'कोदारी' खुसि न्हाना च्वंगु दु । च्वं तापाक खने दुगु खुसि व हे ज्वी माः । अन थ्यंकाः ता छी ल्यनावले 'थ्व हे नेपाल व तिब्बतया सीमाना' धकाः धाल । धाथें थथे थःगु जन्मभूमि नेपाल नाप बाय् लःवले हानं छको नुगले धौ-वजि बाल । नेपाः-मां, थःमां व मांया भौ सकलें भवाताहाँ दं वल । अले ताया तःले न्हाना च्वंगु खुसियात ख्वबिया जगाः व्युव्यु खुसि छिनाः पाः गया । अथ्य ला जिमिलं भ्यातुक छुं कुबुया तयागु मदु । छह पासायाके मसलावः निव्व प्यवः व महि-पोस्तिगं भचा दुगु हिचा छपाः, मेह पासायाके खुकुरी छपु व लथल छगः कखाया तःगु दु । जिके छुं मदु, भिद्यः प्वः जँय् न्याक चिना तयागु दु । दां दिं फुक भल्यानायो याके, अथ्यनं व दोसाध खुसि तुति भ्यातुक कसाला तःगुलि उखुतु बल बल सँहाःह धाय्काः तिनि 'खासा' धाःगु गामे बासे थ्यन । अन तक नेपाले थें ज्याःगु पाखा दुगु, तर सिपौया पौ दुगु छेँ खने दनि । सिमा-सामा नं गाक दनि ।

अन लँय् गनं गनं स्वय् हे शिलानदी धाय् ल्वय्क ल्वहँ जक ग्वारा ग्वारा खने दुथाय् गनं दुरु दासि वः थें च्वंक कवाना च्वंगु कवाःलः व गनं कय् कय् थ्यंक चीचा बाला खने दय्क न्हाना च्वंगु खुसिया च्वय् पहाडे नकी तानाः उकी सिपू लायाः दय्कातःगु ता व

गोपु गोपुखे ग्यानापुसे च्वंक सिखः वःकाकां यातां व्यातां संक छी माःगु
कुछि जक व्यागु भोलंगा ता नं छिना वने माः । थुकि हे ज्वी मिजंत
धयापिनि दिन्या थेकाना महु धाःगु । ख नं अनं कुतुवन धाःसा दिपया
छु थेकाना ?

वयां कन्हेखुनु छवाय् 'छुम्यां' धा थाय् च्वनाः ततःमागु सिमा
महुगु बःबः पर्वः पुलाः 'कुति-गाले' थयन । गुगु नेपालं लहासा वय्वले
दकले न्हापांगु वने ज्याय्गु थाय् खः । उकि अन नेवाःतय्गु तःगूमछि
कोठि दु । मी नेपाले ३२ कोठि महाजन धाय् थें अन न ४० कोठि
धाय्गु चलन दु । अन चि, तँय् च्वामो आदिया व्यापार आपाः । छुं
भचा देशी (भारती) मालया पसः नं दु । नेपा.यापि आपाः भल्यातसं
जाकि मलेभता इयादि नाप चि हिलावुला याइगु जुया च्वन । मी
भल्यातसं नं अन नय्वु (छेंथू) यात बकु फुक लहानाः ज्यालाया
दामं चि छकु छकु कयाः थः थः गामे वनेत नेपाः स्वयाः वल । भल्या-
नायो नं नय्वु नाप बकु-बिकुयागु व अधलि-हागुदां (नेपाः मोह व
सँय् मोह) या लयाःचाः नं सकतां सिधय्काः खाय्मातय्त (सलजवा त)
ताथ्ये-धाला (सलया बाः, मा गु दां-दिं नं वैन वियाः 'गनं परदेश नय
मनंनिहा साहुमचा, बांलाक विचाः याना, यंकि' धकाः मानो म्हाय्मचा
वियाछुइवले दुवाते गुभाजुं खं लहाइ थें खं लहाना जिगु कुति थय्या
स.पौ ज्वनाः नेपा वल । उकी जि छंगु नां तक नं च्वय् मछालाः मांया
नांया नापं जल भोछि धकाः जक च्वया ।

कुति, पर्वतं चाःहूगु गाले लाःगु थाय् जूगुलिं साप चिकुगु
थाय् जुया च्वन । चिकुलावले ला च्वापु गागां छें पिहाँ हे वय् मजीक
लं फुक च्वापुया च्वापु ज्वी यो हँ । वैशाख प्वी थे च्वंकाः नं अन
नेपाले चिकुलां थें चिकु । जिमि ज्वना वयागु दाँलाइ, सिलखं मगानाः
अनया पुचिसांगां द्यःने फायाः द्यनेमाल ।

अन निन्हु स्वन्हु च्वनाया छह-निह कुति नेवाःत नाप लात—
आपाः सकोमित, यले ज्यासःबरेत छखलः निखलः दु । सकलें थःथःगु
ज्याय् दुना च्वंगु दु । छें पौ महु, कःसि जक, व नं चा जक फि चिंका
तःगु । ख्वाउँगुलिं यानाः चा नं खो, लः ज्वया वने मफु, मानो सिमन्टी
थें । आपाः छें २ तँ जाःगु । थाय् थासे ताचो (ध्वाँय्) व्वय्का
तःगु दु । भिद्यःया देगः छगः नं दु गुंवा थें च्वंक गोध्वाँय् व ताचो
व्वय्का तःगु । मी नेपाःया अडा नं दु । अनया हाकीम दिडा । मी नेवाः
साहु महाजनत व भल्यातय्त विचाः संचाः याइगु हे अनं । जात्रा, गुथि
इत्यादि ला नेवाःत दु थाय् दइगु हे जुल । बाजं-विजंनं—धाः, नाय्खि,
दापा, धिमे इयादि सकतां दु ।

जिपि अनं पिहाँ वयाखुनु व हे जिपि बाय् च्वनाथाय् हे छें
कुति-नेवाःत सकलें धयाथें मुंवल । 'तिम्बि याय्माः तिम्बि याय् माः'
(सगं बीगु) धाल । सकसितं च्या-चि त्वंकल । अले छह नायोचा ख्वाः
वःह बाभावंह साहुं धाल—कासा थकालि, आः छु याय् माल ? जि
ला थकालि धाःह गुह वुढा थें धकाः थय्क चाकःमकलं स्वया । तर
नयाना हःवले वया सित्रे लयाय्छह व हे छें थुवालं । धाल—छु याय्गु
आः, बहि पुइकिरे । धाथें ह्याउँसे च्वंगु छगू बहि प्वीकाः व्वना हल—
फलाना मिती फलाना साहुया नंनेवाः वंजाः फलाना नेपालं वःया
२ त्यांग्रा, फलाना मिती फलाना नंनेवाः २ त्यांग्रा, फलाना मिती फलाना
नंनेवाः साहु नेपालं वःया असुल जूगु अधलि तका ५ तका इत्यादि ।
अले जिमिगु नं निहसिगु नां च्वत । छह वंजाःला पुलां नेवाः जुल ।
मेहसित हाःहू यानाः त्यांग्रा पुइकल । जितः 'कासा साहु त्यांग्रा पुला
दीगु लाकी, दस्तुर विया दीगु' धकाः हिल । जि भसंक वन—सिलाचः-
रेबले पशुपती जक मदस्यातय्त दक्षिणा कयाः नं वय् ग्वारा ग्वारा
तुइकइ धयां थन ला थःत हे त्यांग्रा पु धाःगु ! जि सुंक च्वना च्वना ।
लिपा का, साहु मचातय्त नं त्यांग्रा प्वीके ज्यूला, च्वयाव्युरे न्यातका

दां । धकाः जिगु नामे ५ तका दां आमदानी चकल । अज्ज दे-भव्य-
न्याया च्वंगु पाखे लाःसा लाखे ३४ नहु तक भव्य नकाः फैयागु प्याःगु
छेंगू लायाः लांभा पुइकइगु हँ । लिपा धकाः सिल । थुलि याना च्वतलें
पुलां नेवाः बंजालं भल्यातसें दिका थकुगु 'खोम्बो' (छेंगूयागु वाक्स थें
ज्याःगु) चाय्काः सँयलं पिकयाः फिकल । 'तातो' (सलया ह्यजः खः
तय्गु) नं स्वह सलयातं कवाय्कल । खोम्बो थ्येवातसें यंकल ।

अले सकलें कुति नेवाःतय् नाप बेला कयाः सलम्हे च्वना ।
जिपि कुति देशं पिहाँ वसेंनिसें हे पर्वः च्वय् च्वय् भो भो फैत इमूँ थें
न्ह्याना च्वंगु खनेदत । यानं स्वयबले लहुतिपुन्हीखुनु मुथे जामाच्वय्
मनूत वना च्वंगु खने दया च्वनि थें । हानं याने-यिने ताथ्ये (खचरा
सल) व पोंगाचा (गधाः) तय्गु गंसः नं ताय् दु । जिपि व जिमि ताथ्ये,
सलतय् गंसः नं याने अथे हे च्वनिगु व ताय् दइगु मखाः जुइ ।

धात्थें मै, भी नेवाःत धयापि नं विचित्रपि जीव खः, न्ह्याथाय्
वंसां व हे पहः । नेपाःगालं पिने गांपाते जक मखु थन - लहासाय् थ्यंक
व्यापार याःवया नं व पहः मतं । छं सि हे र्यू, भीथाय् जूसा
लहासां थ्यंकःवःपिन्त चावहिली लँख वनेगु व जगन्नाथं थ्यंकःवःपिन्त
खुसिबहिली बा गुलिगुलिसितं थकाः थ्यंक काःवनेगु । थन ला
जिपि लहासा मध्यनि जिमित लँख वया च्वने धुंकगु । जिपि
'च्यानाःख्यः' थ्यंबले अन वथां हे लहासा नेवाःत मुना च्वंगु गुलि
ह्यस्यूपि, आपाः ह्यमस्यूपि । लिपा सिल अपि फुक भी पालाकतःपि
(नेवाःतय् लहासाया कुलछें या खलःत), भी थःथितिपि व भीगु कोथि
नाप सम्बन्ध दुपि जुया च्वन । अन हे सकलें चाकलि च्वनाः कुशल-
वार्ता जुइ, ह्यमस्यूपि नं ह्यविल । अले समीचीन न्ह्यायां पुजाभः व
सगंज्वलं न्ह्ये ने तय् हल । पालाया थकालि न्ह्यापां ह्याउं तुपुलि प्विकल,
अले सगं विल । छाय् थें मस्यु, अन च्वंगु मंगलाःतः उलि ह्याइपुसे,

नुगः मछिनापुसे मच्चं गुलि नेपालं पिहाँ वयाखुनु चान्हे च्वंगुलि
न्ह्याय्पंपिलि ग्वी थें नुगः ह्यगनि थें च्वंगु खः । लाःसा व मंगलाःतः च्वंपि
गुरुजुपिनि पालाकतत अप्पो दइन धकाः मन चक्कंगु ला ? अथवा
लया नं मयाक तक मुं हे थःथिति पासापिनि ख्याः स्वय् मखंक
'सिमाहल लासा लासे, नगुतिन फांगा फासे' धाथें ज्वीका वयागुली
अय् निह्यप्यह्य ह्यस्यूपि व उलिमछि थः नेवाः दाजुकिजापि छकलं स्वय्
खनाः जिमि मन च्वंगु जि धाय् मफु । छं मिजंत धयापि अज्याःपि हे
खः धकाः धाय् मते । धात्थें महेकुसे धया च्वना, उखुनु अन जिमि
मुयां मिखां खवि मवः । सकलें नाप न्हिलाः न्हिलाः हे सगं काय्
सिधय्काः सल्यय् कया । वरु स्यावजिया थासे गोफकी ।

अनं जिपि सकलें लहासा-दे दुहाँ वया । जः खः पोतला,
भयाकुरी व दध्वी चीमाः लुखा । थव ला छं तस्वीरे खं हे ज्वीमाः ।
च्वय् तुइसे च्वंक चीमाः कय् लुखा । भीथाय् स्वयंमु व मज्जुश्रीया
दध्वी लाक च्वंगु तःगो चीमाः लुमना वः । व लुखाया जः खः थोम्
पसः (वँसः) भो भो व छगू निगू साकं (होटल) नं दु । हानं माने व
जःमू चाःहीकाः लँकोर (उपाखा उलंथे देचाःह्यु) वःपि नं यक खनेदु ।
हानं ताथ्येतय्गु तुकुनुकु जक मखु बांबांलाःपि च्यांता सलतय्गु कदम
चाल व साइकलया तिनि तिनि नं ताय् दु । अनं भौमचा लँखया हयाः
देचाःहीकाः दुत यने थें पालाकतःपि सकसिनं ह्यभुनाः थःथिति
इष्टमित्रपिनि नापं जिमित पाःको (बहिया पिने च्वंगु बजार) चाःहीकाः
थःपिनि कथाय् दुत यन । धात्थें अन १० दँ लिपा अबुजु खनाः जि
ह्यय्क खय् मास्ति बल, अध्यनं खवि च्वनिनाः नेपालं मामं ह्याउं-
तुपुली लुका हःगु पाय्मोह निमोह तयाः पालि भोपुयाबले जि स्वर्गं
थ्यन । बहनी पालाकतःपि सकसितं बेलि याके माः खनी । नय्-नी
धुंकाः 'का, का, थौंतिनि थ्यंकः वःपिनि यानुल जुइ' धाधां उखुनु बाचा
तक नेपाःया हालचाल न्यना च्वन ।

स्वन्हु प्यन्हु तक ला जि नापलाः वःपि सँय् इष्टमित्रपि नाप खँ
लहालहां लिमलाः। अथे ला भी थाय् थ्यंकःवःपिन्त स्व वइ थें मन्दि-
ख्येओ ज्वनाः वय् मो। अथे वइ, “सोता साहुमचालाया म्हंफु मखु
ला ? लँय् तकलीफ ला छुं मज्जु मखाः ?” इत्यादि खँ लहानाः हसीका
वनि, थुलि हे। जि नं सःसां मसःसां अमिगु भाषां “म्हं फु, छुं मज्जु”
धकाः न्हिलाः न्हिलाः लिसः बिया छ्या। गुलि गुलिसिनं ‘नेपालं न्हू
न्हूगु वस्तु छु छु ज्वना भायागु दु ?” धकाः नं न्यं। अमित जिमि पुलां
नेवाः बंजालं “ज्वना ला थ्व थ्व वस्तु ज्वना वयागु दु, तर फुक वस्तु
थ्यंकः मव नि।” धकाः नापं ज्वना वयागु यू, भिंपू, तिनिखाः इत्यादि
मुख्य मुख्य वस्तु निता प्यता क्यना नं छुत। छाय् धाःसा मेमेगु बनाः,
ह्यखा पंखा, घंगला, रक्तचदनया जमू, पिता कापः, पुसाबाता व
मुसू जाकि, ग्वारनवाः-यलाचिंद्रा, मलेभता, पालु, छाः लाभा इत्यादि
इत्यादि भयातु भयातुगु माल थ्यंकः मव नि। जि अबले मस्युनि थनया
मिता-मिजं निखलकं व्यापार आदि सकतां ज्या उत्ति थ्यंक याइपि
खनी। उकिं व स्वःवःपि मध्ये मिसात नं यकं दु। गुलि गुलि ला नचा
नचापि ल्यासेत नं। अभिसं नय् थें नय् थें स्वःवले, नापं छुं हे मखु थें
यानाः ह्यथीक थीक फेत्तू वःवले ह्य हे चिकतु मि।

छन्हु सुथे जिमित पाला आज्जु दर्शन याके थ्यंकल। मी थाय्
जूसा भौमचायात आगमे किसली छाय्के थें। गुभाजु, थकालि छ्याजे
(पालाया मंत्री) व २३ ह्य पालाकतःपि नं दु। पाला आज्जु दुने मेगु
चुके खनी। ख्युंसे च्वंगु स्वान्हे थाहाँ वनाः छगू कथाय् यः तया तःगु।
यः छु, मूर्ति छुं मदु, पर्भा दुगु सिहासने ज्व ह्य थिक ताई नाई न्हाय्कं
छपाः व न्हाःने पात्र छगः थनातःगुली भःभः घाय्क नरसिरमाः,
सिगलिमाः व हृदयपत्रः कलाय्का तःगु। पर्भाय् छचा खेरं लुँयागु
वहःयागु किर्किपा तिया तःगु। न्हापां कबलि ह्युं (पात्र ह्यु) धाल।
पात्रे च्वंगु थँ फुकं पंकाः मेगु थँ छथल थन। गुभाजु जिमिसं ज्वना

वनागु वहःदेवा च्याकाः पञ्चोपचार पूजा यात। जिपि स्वहसितं
दक्षिणा छाय्काः यः भागि याकल। अले व हे पात्रया जल व सम्हे
चिपं थिया लिहाँ वया, मी थाय् यंलासिवा वना वय् थें।

मी थाय् त्वाः त्वाले कुकी-गुथि धयागु दु थें थन नं मी नेवाः-
तय् थज्याःगु पाला कचा पाला नापं यानाः २० गू ति हे दु। उकी
मध्ये दकले पुलांगु च्यातंग्याः पाला धाइ। मेगु घंगस्या, च्याति,
काकिमा, छुसिस्या, भवाला, घोरस्या, ल्हाकं कुं पाला, तहस्या, घिसि-
रपते, वमुस्या, लुबुस्या, गन्वेस्या, आदि पाला दु। गुभाजुपिनि
‘वज्रसत्त्व’ धकाः यँ, यल, खपया गुभाजुपिनि स्वंगू हे पाला दु। हानं
मी खचरातय् खचरा पाला व ‘छेवा पाला’ धकाः दँय् छको मञ्जु-
श्रीया जात्रा नापं याय् माःगु छगू पाला नं दु खनी। अथे नं न्हापां
न्हापां २ गू सरकार सम्बन्धी ज्या याय् माःबलें निसें दुगु जुयाः ला
मायु १० गू पाला, १० ह्य थकालि धाइगु चलन जुया च्वंगु छं नं सि हे
स्यु। लिपा मी वकील साहेब दय् धुंकाः नं आः तकं अडां छुं मुदाया
ज्या याय् माःसां थ्व थकालितय्गु सहीछाप याका च्वनतिनि। तर
आः ७ गू पाला जक दनिगुलि १० थकालि नामं थ्व हे ७ ह्य थकालि
च्वनाः सकतां ज्या पालंसाः न्याय्का च्वन। हानं पतला लामाजु
(दलाइ लामा) पिहाँ विज्याइबले नं मी वकील साहेबया नापं तःपाः
लँया यःने गा पाच्छायाः, ह्याउँ तुपुलिया कस्सं ह्याउँ सिन्हः तिनाः वने
माः। छाय् धाःसा सँय्तय्के अज्ज नं विश्वास दनि- ह्याउँ तुपुलि पूर्पि
व ह्याउँ सिन्हः त्यूपि मन्त धाय् व लहासा देयात लहासाखुसिं तोपू वइ,
लसितय्सं हानं दुःख व्यु वइ। उकिं मै, आः तक नं मी नेवाःतय् सँय्तसें
“भ्याय्बु” धकाः विश्वास पूर्वक हना तःनि।

भुकथं सँय् इष्टमित्रपिसं पत्याः याकाः मी आज्जुपिसं लहासाय्
वने ज्याना वया च्वंगु जुया च्वन। हानं मी थाय् जगन्नाथ थ्यंकः
वःपिसं जल बीके हइ थें, लहासां थ्यंकः वःपिसं मूसी तय्के हइ थें थन नं

नेपालं ध्यंकः वःपिसं लहाकताः (कस्यालि) तय मा गु जुया च्वन । उकिं भीगु वकुपुकं ध्यनेव भीसं ह्यस्युपि कोताः कोताः (सँय भारदार) तय थाय्, भी सम्बन्ध दुपि तत धर्पि सँय व्यापारीतय थाय् व भी वकील साहेबया थाय् नं छा-लाभा पालु-मलेभता, ग्वारानवाः, यलाचिद्रा इत्यादियात संगं पुसां पुइ थें कयचिनं तोपुयाः तयके छुत । कन्हेसुतुं निसैं जिमि चप्पा नय् हे मलाः, कथाय् न्याःवःपि हूलहूल जुल ।

छन्हु सुथे सुं गाहाः मवःनिबले जिमित मोखङ्गे (बहिली) भोर-मुचि भगवान् दर्शन याके यंकल नापं अबु नं दु । जिमिसं खाता (तुयूगु कखा गा धुं व वहःयागु ध्यो देबाया नापं मुकिवा (ध्यो काकाः ल्वीगु थल) नं ज्वना वनागु दु । बहि ला धाथें यें, यलया गुगुं बाहा थें । उखें लुखा, थुखें लुखा, चुकं चुक, बाहाः बहि सकतां सकतां नेपाः लुमंसे वः । खः नेपाले सेंगुइ जनबाहाले थें कैचि मार्कापर्सिं कमवाःगु त्वीसे त्वीसे च्वंगु पिलाक ब्यय्त कलिया सः बिया वइ थें, पासापिसं मिजंतय पुचले वहःयागु जाकि वत्ता ज्वना व ह्य कयनिबले हिं बुला थें खाः यानाः 'ह्याः वा जि' धकाः तुकि पयाताक संकइ थें, पीकु हाकःगु पर्सि सिनाः न्हयकु हाकःगु गां न्यया नं मखालाः कक लुनाः वइ थें ज्याःपि धा सा थन छह हे नाप मलाः । न्यताः च्वकां हि तिकिननि थे च्वपि, त्वीसे प्वात्या प्वात्या च्वंगु नादी च्वंगु लुंया धोतुं (लुं चुल्या) वा संखया धुंको संखया चुल्या) ब्यय्त ताथू वा होचू रेसमीकापः) या हांजु (लंच्व ताःहाकःगु भोत) चुल्याय् चुल्याय् ध्यंक थत कया तःपि जं कय घुतुं (पेटीकोट्) व वाम्हं च्वय् हांजुया यःने ख्वातुगु दुव सा दुगु लंचो मदुगु बनाःया तःपाः लं फिनाः नं ग्यासेर (तिनिखाः) कुं दुगु पांदें (धोधो दुगु नंबुयागु लंया य ने चीगु मेखला थें च्वंगु कापः) चिनाः तःगुलि लिबां न्ह्यबां छुं सीमदुपि आच्याःपि (तताकयहेपि) धोधोदुक नाप लाः । अमि गुलिगुलियां मोति-भिपू भुना तःगु पत्तु (खकुं लाःगु छेले तीगु तिसा) नं पुया व पि दु । अमिसं छको निको

छथः संकइबले पुचः पुचः यू भुना तःग 'बौ' (जंत्र) मयातुगुं अमिगु ख्वातुगु लंयात नं गा वंका भी थाय् प्यंथइबले 'खण्डे खण्डे, भिन्दे भिन्दे स्वाहा' धकाः प्यंजा ३ व थलि थें अमिगु नुगःपायात निव्व थला तःगु खनाः नुगले तिक ममिसां अमि न्हयपंया ऐको (छगु प्रकारया इयररिङ्ग) वा इयररिङ्ग हे सनिगुलिं मिखा हे तिनिमिनि धाः ।

अन जिपि प्यतजागु छें थाहाँ बना । प्यते छ्वालं कःसि, कःसि म्वले लुंया दरालि दुगु व पग्वालं पिने छ्वालं पग्वाले हे लिधंक देवदेवतापि ताना तःगु व वयां कय लुंया कपौ । क सी प्यकुने प्यंगः लुंपौ दुगु देगः, गुकी लुंगजू, गोध्वाय्, कुंपा, हितिमङ्ग इत्यादि नेपा या लायकू थें म्म धाः । उकी मध्ये छगः देगले वसुन्धरा व मेगुली ग्यानापुसे च्वंछ क्रोधमूर्ति ह्यास्कामिनी अजिमा । मेगु निगले खापा मचाः । अनं काहाँ वयाः च्वते नं ह्यास्कामिनी हे निह्य-छह भचा क्रोध मूर्ति व मेह्य शान्त मूर्ति । मातने शुद्धजीव राजा (सोनचेन गोम्पो) व मेमेपि यःपि यक दु । हानं बांवांलाःगु क्वेचिया खाः दुगु कंध्यूर तंज्यूरया सफू गम् नं दु । फुक थासे धुं च्याकाः देवा लुलुं कहाँ वया, यद्याःया उपाखा ऊवनेबले व कोनेयाः खुनु मत ब्यू वने थें । पाःगु थुलि हे-भी थाय्सा धुपाय् ज्वनाः देवा वा पाल्वा च्याका मत बिया वय्गु, थन च्याना च्वंगु ततःप्वाःगु देवाय् थःपिनि च्याका वनागु देवा तुलुतुल ध्यो लुना वय्गु । थन चिकुगुलिं अथे च्याकाः ज्वना जूसां देवा छप्वातंया ध्यो नाइ मखु इताः दुथाय् छकूचा जक नाया च्वनि । उकिं थथे देके वइपिसं देवा छप्वातं हे ज्वाःदेवा च्याका थें यानाः सलंसः देवाय् ल्वीत गाः । अले जि भवास्व लुमन - "छ नं जिगु लिसः पौ मथ्यंतले मतब्यू वनां च्वन ज्वा कयहे भत नापं महंकाःद्यः पालाःद्यः, भिद्य व लुति अजिमा या थाय् । गवलें गवलें ला जिगु पौ मथ्यना च्वनिबले-कोखं काः काः लाय् लाय् बुयाः नुगः मछिनिबले लाःसा मामं खेलू इताः बियाः सिसि यःया थाय् नं छः ज्वा मखुला ल्हूचले ?

‘छुं मज्जीमा, याकन लिथ्यनेमा, छुछु ज्वीमा’ धकाः वरदान नं पवन ज्वी मखुला ? तर देवं सिन्हाज्यामेया मिसायात थें अमङ्गल वरदान ला मज्जु खनी छन्न, छाया धाःसा जि थौं तक नं स्वाना हे च्वना तिति ।” न्हागुसां जिपिं अनं काहाँ वयाः छेदी थ्यन, अन दध्वी लाक्क भोरमुचि भगवान् । बिज्याका तःगु, भी स्वयंभूया मूह भगवांय या सिबे भचा तःधिकाह । वया ल्यूने वया सिबे यक्क तःधिकाह भगवान् नं दु । मेपिं सहस्रभुज लोकेश्वर मैत्रेय बोधिसत्वपि नं दु । ततःप्वाःगु देवाया कुं फुकथासे हाकुका गःसां व हे देवाया जलं यानाः तलेतले थें हे अन नं अंगले अंगले च्वया तःपिं अनेक देवदेवतापिनिगु लुँया तिसा ज्वाह् थिना च्वन । अन स्वां जाकि तिनेगु, सिन्हलं तिकेगु चलन मदुगुलिं भगवान्यात खातां वरखाय्का धुं च्याकाः नेपालं ज्वना वयागु यलाचिद्रा ग्वारानवाः छायाः छायाचिवा (दण्डवत याना । अन भो भो च्याका तःगु वह देवा, लुँदेवा मध्ये छप्वाः लुँदेवा तुंछे-यापिसं छाया तःगु धाल । व हे देवा त्वंके बियाः जिमिसं ज्वना वनागु ध्यः थंके बिल । अबले तक जि देवा धयागु दकले तप्वाःगु सेंगुया गुम्वाय् च्वंगु देवा धकाः च्वनागु । थन ला खासिचा खासिचा पाय् प्वाःगु देवाय् छपु जक मखु इललल इताः तियाः च्याका तइगु । व लुँया देवा हे ३६३॥ तोला मछि ग्यंगु हँ । व देवा लाखे नेपाल भापाया कवि चित्तधर ‘हृदय’ गुह्यसित भी जुजु महेन्द्र धुगुसी तिति ‘कवि-केशरी’ दर्जा बिया बिज्यात धाल — वया आज्ञा तेजधर साहु लहासाय् वले तःगु हँ, व देवा बेकुं च्यानाः पाकोर (लहासादे) चाःहिलाः देवा छायाः लिहाँ व.ह्म कन्हेखुनुं निसं जँ स्याकाः ब हे ल्वचं मन्त हँ । भी नेवाःत धयापिं नं थुलित धर्म ह्यःपिं जुया च्वन । उकिं हे ज्वी भी नेशःतय्सं संयूतयूत क्वानाः अप्पो लबः काल धकाः स्यूसां अमिसं तं मन्वेकुसे नुगले मस्याकुसे लिपा लिपा तक नं “नेवाःतसें नेपाः वनाः नं व दांयात धर्म कर्म हे फुकइगु खः, भीसं धर्म याःसां अमिसं धर्म याःसां

उकिया पुण्यया अंश मीत नं वइ ” धकाः मन तया च्वन तिति । सलंसः द्रलंद्रः पांय् (सैय् मोह ३३३॥) दां न्ये बिया च्वन तिति, त्याय् बिया च्वन तिति । धाथें भीसं नं लहासां क्वाहाँ वयाः अबले अबले लुँवहः, हाकुदां क्वत हयाः आः थौंकन्हे देशी नोट व पाउंड आदि विदेशी दां क्वत हयाः देशयात तःमिज्वीकाः सख्या.पा. पंजादां, समे, बाहा पूजा इत्यादि धर्मकर्म याना वया च्वनं तिति ! तर भीपिं नेपाः वयाः नेपाःयात ल्वय्क ज्या थाय् मसःगुलिं नेपाले भीगु इज्जत माःछि मज्जु ।

अनं जिपिं तारायः धर्मपालपिं व चतुर्महाराजपिन्त लिफः लिफः स्वस्वं पिहाँ वया । पिने गुगुं पौ दुगु, गुगुं कःसि जकगु नितँजाः स्वतँजाः छँ । चुके चुके भी भो मानें चाःह्रीका तःगु व अगले अंगले भी थाय् गुंलां बहिली व्वइगु बिलंपौ थें अनेक जातक बाखं सेंगुंया शान्तिपुली स्वयंभुपुराण च्वया तः थें न्यंक च्वया तःगु दु । भयाःया फुसे व कारनेसे स्यांवो (गुजि गुजि काःगु लिबिं) खाया तःगु दु । अनं दँय् छको मुलां (नीछदो बरेत मुनिगु) बले भिक्षुपिं मुनाः धर्म सम्बाद याइगु थाय् इत्यादि नं स्वयाः पाकोर छचाः चाःहिलाः जिपिं लिहाँ वया ।

थ्व पाकोर हे लहासाया मुख्य बजार खः । भी नेवाःतय्गु आपाः पाला व क्वथा थ्व हे बजारे लाः । लँय् जःखः निखें पसः, पसःसां फुकं पसःकवः मखु, भयाः व लुखा । भयाले जक गोयू (कापःया लापाचा, भंगः चानाः तिका तःगु भयाःकापः) तथा तःगु । मूलासाया न्हाःने चोकची (डेस्कचा) व ल्यूने छ्यागम् (दराज) । बँय् सिपू ताना तःगु । हानं फुक धया थें पसले ग्वाखे बा तसी जाकिध्वः छप्पले नेपाःयागु मोह छमोह भलिं तिकाः भिद्यः धकाः धुं देवा च्याकाः पुज्याना तःगु दु । उकियात नं किर्किपा, हृदयफो इत्यादि तिसां तीकाः थःभ पिनि क्वथायात अप्पो च्वछाय्गु कुतः याना तःगु दु । मूलासा छु मानो छगू तखत थें मखमलया वा क्वय्चिया फुंग,

ग्याहं (भिंगुचीनी) महासुचि लाया तःगु व माःसां मोसां न्हावलें
दागम (दुने भुवा दुगु पिनें पिचुक तँयकापः वनातःगु) छप नं ध्याक्वे
लाक तया तःगु । चोकची न्हावलें धयाथें वहःया धाक्याः (तौ व पुसा)
दुगु चिनिया कयो वा यांथिया कयो दया च्वनिगु । अज्यागु पसले
च्वना च्वंपिं छह निह नेवाः साहुपिन नं तुतुं लँया दध्वी लाक भो
भो तयातःगु समीनीतय्गु थोमपसः (बँपसः) नं स्वभं जिपि थःपिनि
क्वथाय् लिहाँ वया ।

भी क्वथाय् नं कुने अथे हे पसः । तले क्वथा ३ कू दु—छकू
वने-क्था, छकू घने-क्था व मेगु भुत्-क्था । वनेक्वथाय् मूलास या
ल्यूने छयागं व जव पाखे घागं नं ताना तःगु दु । घागमे मुसुमुसु न्हीक
च्वलुं पाना तःपि चायापि, भौंयापि आर्यतारा, सपलोचनि तारा,
मञ्जुश्री आदि घःपिं भोलाक दु, शाक्यमुनि छह जक लुंसियाह ।
जःखः चिनिया तामचीनया स्वांथले चिनिया रेसमया स्वां तिया तःगु ।
अन नं न्हाःनेसं थना तःगु ७ गः वह या तिखलाया नापं वहः देवा
च्याका तःगु दु । छखे पाखे थाय् थासे घः च्वया तःगु धारणि संप्रह
सफू तुतः सफू व निगू स्वंगू नेपाल भाषाया वाखं सफू नं पँचिना तःगु
दु । गनं धुं तिया तःगु खने मदुसां मूलासाया न्हाःनेसं च्वंगु चोक्ची
क्वसं च्वंगु च्वेकं (धुं हे पाय हाक गु धुं च्याकेगु वाक्स) या हतं
न्हिच्छि तांवाँय (भिंगु धुं) या कुँ नस्वाक पिहाँ वया च्वनिगु । देपा
पाखे बनाथू कस्मिराथू व तिनिखाः पँचिना तःगु । श्व क्वथा वहनी
ज्वीव त्रिगु घने क्वथा ज्वीगु व घने त्येव च्याना च्वंगु मतया जले
घागंया घःपिं स्वस्वं फसं मत भाराक सनिवले छ बाहाय् जक तय
धुनेवं जनवाहाय यात क्वालखं लूगु स्वचनावले पिलिक् खंगु लंगु
किपालु स्वस्वं जि याकःचा घनेगु । घने-क्वथा ला धाय् हे मोल अबु
घनिगु क्वथा, कस्तूपा थना तःगु बनाःया बोत्यंया घ ने च्वंगु क्वेचिया
दसनायात ल्वय्क नाइक पा थना तःगुलिं चिकुलां नं जाराजारा वय्क

तांनो थें च्वंक लुमुगु जिगि जिगि च्वंगु क्वेचिया सिलः । पाकां कार-
चीपि भरेयाना तःगु कुंग । कय् मलः व भंगः बुत्ता दुगु महासुचि
निपाःखपाः लाया तःगु । भ्याले न्हाय्कं तया नं पिनें लाप्चा, भंगः-
मलः भरे याना तःगु ग्यू ताना तःगु । भुत्क्वथा भी भुत् थें मखु
दनाः दनाः हे ज्वरे याय्गु । देवल थें च्वंक तःजागु भुत्, उकी न्हावलें
हे छगः कसि देहुनाः च्याखू पिकया तइगु । उखे पाखे तसी कयो,
धुपेन (तामचीनया बाता) ह यां (आलुमिनियम्) या थलवल पँचिना
तःगु । चप्पा, च्या, छुचुं, ध्यो इत्यादि नय्गु वस्तु खने मदय्क वाक्स
वा दराजे तया तःगु व छखे लीया स्वह मलः दुगु सकले लीयागु हे
बुत्ता दुगु खोति (चादानी) देहुना तःगु, माल धाय् व ह्या वी जीक ।
अन लकामितसें न्हिन्हि सुचुका थकइगुलिं भी नेपाःया भुतुली थें
धलिमे खपः, वँय् कचिगः उस्त मदु ।

भी नेपांले जक गुथिगानां तःक्यं भाःमखं धयां थन नं न्हिन्हि
लिमलाक व्यापार याय्गु वखत न्हाःने थ्यंकाः नं जिपिं नकतिनि जक
ल्हासा थ्यंगुलिं पाला-भ्वय् न्याय्के माल । अथे ला मेपिं सुं थ्याके
माःगु मखु, भी फुकिजे आगमे पुजा थें पालाकतःछि जक । ज्या ला
पालाकतःपिं सकले जानाः यात, तर खर्च फुक भीगु । जिपिं न्हू थ्यंकः
व पिं धकाः न्हापां मयंकु । लिपा नय् त्येकाः धया थें च्वना यंकल । अन
पाला-आज्जुया देपाय्सं गुभाजु च्वना च्वन । न्हाःनेसं सुं दि (कोखा)
ज्वाँय दुगु पुजाभः व सिन्हलं किका तःगु थापिंचा छगः नं दिका तःगु
दु । 'का का, सिन्हः निं तिकि' धाल । गुभाजुं सिन्हः तिकल, स्वां बिल
सुं दि बिल । जिला गपाय्चो मः दुगु कापः ल्या धकाः कखाया, लिपा
क्थाय् थ्यंकाः सिल व ला भौं बाला चाना तःगु खनी । हानं थाकुलिं
व थापिंचां त्वीसे च्वंक थँ भचा इलाय् तिकिनंका बिल । जियासिबे
न्हापां पुलां नेवाः वंजालं त्वंगुलिं धात्थें थँ धकाः हुसक त्वनां का, व
ला हिं धकाः जुया च्वन । जि नं ननिं मवाना, घुतुक बोनिना झ्या ।

मेह बंजालं नं अथे हे यात । सुं न्हिनं मन्हू फुकं छुं मखु थें यानाः
फेत्तुत । बमाधम देमाव्व न्ह्याकाः भव्य नकल । जि धाःसा ला छकू
छकू नय्त थाराथारा न्हू, खलचा म्हुत्वी थीके ग्याः । उलि ला जि
दुचाय्कः वयावले नं मग्याः । बाहाय् पिका खुनुला साःमि धाक नया
हे वया । धाथें मै, उखुनु न्हापांनिसें वंगु जूसा धाः लःयाकाः हे वय्
मालिगु, च्या-वि त्वनाः वनागु भाग्य हे जुल । लिपा भव्य नय्
सिधय्काः गुभाजु दना वल । जि ला भी गुथिगुथी थें कोपेत वल धकाः
चवनां थुंइलां (लेखक) बहि छगू ह्या विल । अले व बहि धीकाः धया
हल - 'थौं भी पालाय् निह्न नँतेवाः भाजुपिं दुध्याःगु लसताय् श्व
भव्य न्याया च्वंगु खः, उकिं वय्कःपिनिगु विपये भी पाला आङ्जुया
धलके छु चया तल व व्वना न्यंकेत्यना - "अँ, धव्यकः भाजुया नां ला
किसिमागः धकाः छिकिपिसं सि हे स्यू । न्हूह्न साहु मचायागु पत्ती-
जातः फल सकतां न्यना दिसं - साःगाः गोत्र, भ्यातनाः नक्षत्र, किलि-
किलिचा राशि व दंवि बाहाँ जूवले नां जूवले - "चकाः भंगः")
सकलें हररर न्हिल । हानं गुभाजुं व्वना हल - "अँ, थुह्न भाजुया गोत्र
सुलंसकि, स्वकं नक्षत्र, खासा राशि व चा बाहाँ जुसेलि नां सुलया
थिक हे जुल ।" सकलें न्ह्यगु दीव हानं गुभाजुं 'थाकलि, नोकु
छ्यांजय् ध्वीं ला, पाला कत पिं सकसिनं ज्यू ज्वी मज्यू ज्वी क्षमा
याय् माः ।" धकाः धाःवले सकसिनं पाःलाक 'महादया !' धाःवले
जि ला थारा हे न्हुल । लिपा थःथःगु चिप व्व पोपो चिनाः ज्वनाः
सकलें थःथः कथाय् लिहाँ वन । जिपिं नं मझाः थें, ह्याइपु थें, छु थें छु
थें ज्वीकाः लिहाँ वया ।

वयाकथं थाहाँ वयाः कथाय् ग्वारातुलां न्ह्याः वःगु मखु, म्हुतु
खाइक हिं सवाः वयाच्वंगु दु, मने थःगु न्हूगु नां लुमना च्वंगु दु, दु ।
गबलें गुभाजु व पालाकतःपिं खनाः तं पिहाँ वइगु, गबलें थः 'चकाः
भंगः' हे खः थें च्वना वइगु । धाथें मै, निह्छितक वनेज्यानाः बहनी

ह्याःचाः सिधय्काः थःगु लासाय् याकःचा ग्वारा तुलेवले ला जि
चकाः भंगः ला खःनि । अज्ज धाथेंया चकाः भंगःतय् ला खुसि छगू
जक दथ्वी दया च्वनिगु, व नं चिन्त्यागु खुसि जूसा ला उखे सिधे
थःपिनि जो खने दया च्वनिगु तिनि । जि जुलं छगू जक मखु सलंसः खुसि,
सलंसः पर्वत पंकाः थन थयंक याकःचा च्वना च्वने माःगु । अय् नं छु
याय् छको ताःहाकःक भसुका तया, न्ह्याले ला ज्वले ला छं थाय्
न्ह्याःने थयना च्वना ।

कन्हेखुनुं निसें चम्पालिं वनेगु तनखन जुल । अबुजु कथाय्
तया थकेह्न दुगुलि वंजाःतय् नाप जि नं वनेगु याना । व नं सल गयाः
वना च्वंसा ४ न्हु मझि वीगु जूगुलि कुवाय् (छंगूयागु नांचा) च्वनाः
न्ह्याइपुक वनेगु विचारं लासाफांगा, चखु-च्याखु (चप्पा छिचा च्या
छिचा) आदि माःमाःगु सकतां वकु चिंकाः 'सोक' लिखांनिसें कुवाय्
च्वनाः वना । लः ह्याःगुलि कुवा व्वाः । अन नं जः खः सिमा-सामा
मदुगु नांगा पहाड दुगुलि उकी न्याःवनिगु भय दु । अध्यनं माझित
ग्याःगु मखु, निगः कुवा च्वथंचो चिनाः निह्नस्यां जाः (चतं) संकाः
व्वाकइगु । न्ह्याइपुक वने धातयें ह्य हे चींकु मि । याने याने गां खने
दइवले जक निमा प्यमा सिमाचात खने दइगु । कुवा मसंक न्ह्याना
च्वनिवले मेमेपिं पासापिनि न्ह्याइपुसे च्वंक ह्याः-खी यायां स्वपच्या
(फुतिखुफुति दुगु 'सो' धाःगु हानाः पचीस थें हितेगु) हितु हितुं
वना च्वन । जि स्वपच्या हिते मसः हानं ह्याः-खी याय्त गाक भाय्
नं जि मसः नि । अले नंनि मवासे छन्त लुमंकेगु सिवाय मेगु न्ह्याइ-
पुकेगु लं हे मदु । ववं 'छुसू' या सत्तिक ब्रह्मपुत्र व ल्हासा खुसिया
दुवाने थयन । अनं निह्छि वनाः बहनी छथाय् खुतिसिथय् कुवा
दिकल । वाचा फपूला मपूला हानं यंकल । सुथे १०।११ बजेती 'जगाः'
धयाथाय् थयन । अनं ताथ्येयात कु-का कुव्वीकाः थःपिं सल गयाः
पहाडया कंक वना । 'तात' गामं बाया वनेथाय् पहाडे च्वे तःगोगु

चीभाः खनेदु । व हे 'चंपालि' गुम्बा खः । दुने मुख्य मैत्री बोधिसत्व व मेपि थपि नं दु, अंगले ला च्वया तऱ्गु हे जुल । प्यंगू दिशां वइपि व्यापारीत गुंला खः १२ निसं हे छुंदी (मेला) थ्यनि । थव गुंला खः ४ खुनुनिसं च्यान्दु फि हुया लहासां वंपि व्यापारीतसं च्या, तिनिखाः, यू, भिपू, वनाः इत्यादि मीगु, थःपिन्न ज्यूगु मुलं ला गु मालताल न्याय्गु, हुंदिआ काल बिल याय्गु, लहासाय् थःपिके दुगु मालताल न्याय् मीगु कोछीगु व मालताल ल्हाकेगु ज्या नं अन हे ज्वीगु ।

अनया हाट बजारे थोम् पसः तःवइपि आपाः मिसात हे । फुक हे भः भः धाय्क, तत जिक तिसां तियाः धंधंधाः खवा वपि । छह निह चिनिया खचरानीत नेवाःनी-नेवाःनी थें च्वंपि नं दु । छह ला मै, छु धाय् ! सत्य मिच्याक बांलाः । वयात जि ताउत खया च्वने मफुत, छयँ हीकाः मेपाखे खया । तर जिगु मिखा जि मचाय्क हानं उखे हे वन । वया थोमे मालताल व्रव्वं जितः हे स्वया च्वंगु खनी मिखा चूलात, जि हानं स्व गुलि थें व फिसिक न्हिल । अले ला जि नेपाः थ्यना च्वंगु होस हे मडु छन्त बाहाय् पिकाः खुनु वइनी सगं बीत फेत्तुका तःगु जितः नं छखे महासुची छपाते फेत्तुका तःगु दु । छंगु उखे थुखे सुकुन्दा, पुजाभः, ख्येवाता, थापि, ख्वला इत्यादि सकतां दु । अज्या थाय् मामं छन्त सगं लःल्हाय् त्यंबले छं मांयात थय्क थंस्वःगु जि नं छन्त हे स्वया च्वनागु जुयाः भी मिखा चूलात, छं ख्वाः भचा ह्वाउँकाः कच्छुनाः सगं फल ।

अन छगू ल्वहतं सिया तःगु थाय् दु, अन सकलं नेवाःत जानाः कलस पूजा यानाः व मैत्री बोधिसत्वया देगले पताः छाय् माः । लहासा वज्रसत्वया थकालि गुभाजुं पुज्याइगु व पताः जक खाता स्वानाः स्वानाः दय्कइगु । थव पताः व्रय् रतिनि अन बने ज्याय् जीगु । थुगुकथं व पताःयात भी थाय् यद्याःया सुचं बीगु योसिया

हलेपताःयात थें महत्वविया तःगु दु ।

मेला सिधय्काः २ न्हुति लिपा थ्येवा बन्दोवस्त यानाः खुसि सिथं सिथं पहाडया कंकं वयाः 'चिसों' थ्यन । अन भी थाय् मज्जुश्री ति पाय् जाःगु पर्वते विघ्नान्तकया देगः दु । उकी लय्सिवा ज्वलं पुज्यानाः भव्य नय् माः-दे भव्य । अय् धकाः अन देशे दक मखु, लहासां वनापि नापं अनदक नेवाःत व खचरात जक । ज्वरे याय्गु ज्या फुक खचरातसं याइगु, व नं वजिया सिवे सँकय्गु व ला आपाः ज्वीक । धाथें नेवाः खचरातय्गु फुइँ खय्गु अन हे । छं सी मखु अमेरिकाया-पिसं जक फाडरल्यांड (बौया देश) धकाः बिलायतयात व थःपिनि पुलांगु जात धकाः अंग्रेजतय्क साप माने याः धाइ, थन नं अमिसं नेपालं वया च्वंपि नेवाःतय्क 'अगुला' (ककागि) धकाः साप हे माने याइगु । थगु देश, थगु जाति धयागु नं गजव हे, जन्म मखंगु थाय्थापि मनूतय्क सुं हने मापि पाहाँवया च्वथें सनिगु । थज्याःपि खचरातय्क बांलाक कत्ताना तय् फुगु जूसा गुलि ज्या वइगु ।

अनं लहासा वय्गु लँ खपु दु—'फिसः पाखें' वल धाय्क फिसः जक छी माः, 'थागु' वल धाय्क जंगलं वय्माः भाःपाः दु धाःगुलि जिपि 'धाः' पाखें वया । अन पहाडे च्वय् निगू पाकु दु—'धा ह्यांजु' व 'कोखंबु' । निगुलि पद्मसंभवयागु । जिपि 'धाः ह्यांजु' थाहाँ वना । पाकुया कय् गुम्बा दु, ४१५ ह्य घेलुंत (मिक्षुत) व अन लः स सःतिक दुगुलि वाउँक स्वांमा-सिमा नं पिना तःगु दु । छह घेलुं पासा कयाः जिपि पाकी वनेत खिपते घानातःगु सियागु स्वान्हे थाहाँ वना । लिफः ला स्वय् फुगु हे मखु सप्त पाःताः । पाकी दुने थय्काः हानं अनं मेगु हतं छेगू खिपः ज्वनाः थाहाँ वनेगु । अन भतं क्यनाः क्यनाः पद्मसंभवया विश्राम याःगु थाय्, पद्मसंभव वंकाःवले लहाः बां सी दुगु धकाः क्यना यंकल । दुने पद्मसंभवया ल्वहँया मूर्ति दु देपासं शक्तिह नं ।

अनं 'धा' लिहाँ वयाः कन्हेखुनु याः (चामोसा) गयाः वया ।

याः धयापि सल थें मसं, छकुति हे ह्य मस्याक बासे थयन । छथाय् रुयले धुर (पाल) प्यनाः बाय् च्वनाः कन्हेखुनु संध्याइले लहासा थयन ।

जिपिं लहासा लिथ्यं बले स्वकुतय् नाप व्यापार याय् त थिक जुया च्वन । थपिं पुलांगु जाति जूगुलिं स्वय् हे घरानी पहः वसे सोभासे च्वं । उकिं थुपिं नाप व्यापार याय् साप हे अपु । आपाः थुमिसं वहः हे ज्वना वइगु — त्याः त्याः गु व चिनिया छाप दुगु 'चुको, डाको, तामिमा' । जि धाःसा अमिगु भाय् छकुति हे मसःनि, उकिं बौया कस्सं च्वनाः बनेज्याः गु स्वया जक च्वना ।

थपिं नाप बने ज्याना च्वंसां अबुजुया मन नेपाः पाखे स्वया च्वने धुंकल, उकिं नेपाः वय् माःमा गु ज्वलं ताः लाकु लाकु हल । मृसी तय्के छय्त माःगु धुं, छुकुं (दुरुखो) न्याउरीखंनु (हलुवावेच) कसू मिसि, बःसि व नंनु नं वकु विकु चिकल जि सकतां स्वया च्वना — मांयात, छन्त व बयहेँ चित नं गुगुं ज्वरां, गुगुं भचा भचा पाक लंयात जिनंजि कय्चिं, मुलाय्या गा, तिसायात धकाः लुं २५ तोलाया धोतुं (चुल्या) दय्के बिल । अंगू ला धाय् हे मोल मांयात नवरत्नया अंगू, ताराकमल हीरा थुनागु पन्ना छगःया हे भि निसः मोहति मछि हाकुडां वंगु । मेगु हिना अंगू, तुसिपु वुत्ता अंगू, छुछु अंगू छपुच हे । उकी मध्ये छन्त धाःगु पत्ती थाकावाल अंगूया चहक खनाः छको ला जि नं अबु नापं नेपाः वय् माःसि वल । धाथें मै, छन्त खा. स्वःवःबले छिमि अबुं न्याकु थें जि नं व अंगू लंगु अंगू पचिने न्याके दुगुसा गुलि जक न्याशुइगु ज्वी !, तर नकतिनि वयाह जि वय् धाय् मज्यू, अथें व इच्छायात भसुकालं लहाकाः अबुजुया काहाँ बने पूजा भव्यात छयाजेनं धाःधाःगु न्याके-निके छ्या ।

लहासाय् काहावने पूजा भवय् साप हे तःजिक नके माःगु जुया च्वन । पालाकतः व थःथिति इष्टमित्रपिं जक मखु वकील साहेब नापं थ्याके माःगु जूगुलिं फयां फच्छि तःचो याइगु जुया च्वन । अथे ला

मेया ला हे महु थाय् हाकु छय्ला, तःखाः, न्याखुना छु दइ, अयनं फैया लां चाःगु गोर्मा (तुश्क जाकिचुं तयाः खेका तःगु ला) मास्यी (कचिला) नांगा छय्ला (हलु तयाः मना तःगु छय्ला), तोपा छय्ला (तातू जक मनाः पालुक वाला तःगु ला), लागो-लापी, बुद्धा पुकालाया नापं स्व थनाः पुका तःगु व क्वेँ नापं तयाः दाय्कागु ला, छ पत्या ज्वी मखु छकूला धकाः फैया लुच्छु छकू छकुति देमा हे तोपुइक तय् हःबले धाथें मुं पाखा हाः धाःगु थन हे खना । अज्ज भी नेवाःतय् ला आमकन लगाच्वनिसें हे जातया ल्याः मदय्का वइपिं, हानं नेपाः लिथ्यंकाः पीबातका ध्यवा पुलाः नीच्वने मानिपिं जूगुलिं भी ला थन च्वंतलेयात सय् हे जुल धाय् माल । तर वकील साहेबपिनि जाथुसुवाः नं नेपाल-निसें व्वना हयाः सुनानं मथीक ज्वरे याकाः नइपिं जूगुलिं वय्कःपिन्त जक अनया हे जाथु सुवाःत वयाः ज्वरे याःवइगु जुया च्वन ।

थज्या गु तःजिगु भवजे भी नेपाःया गुथिगुथी थें मयोगु व्वति काय्गु व थनया पालाभवजे थें चिप व्व थया यंकेगु नं चलन महु खनी, अथें द्रं द्रं वाना वनिगु । जि ला नुगः हे स्याना वल — उलिमछि दां खर्च ज्वीक यानागु भवजे थुलिमछि सिन्ति वं खनाः । तर व फुक पालाया लःकामितय्सं मुनाः कन्हेखुनु सय्तय्त पलें (छगू प्रकारया माना) दानाः दानाः मिया छइगु व सय्तसें नं 'भ्याय्बुइ खाला' (नेवाःतय् नसा) धकाः लाकालुकु यानाः न्याइगु जुया च्वन । अले तिनि जि भचा मन च्वन-भी न्याक ध्यवा अप्पो खर्च जूसां लःकामितय् निगः ध्यवा खंगु व हानं अन्न सिन्ति वय् मलासे मनूय न्वे हे लाःगु खनाः ।

कन्हेखुनुनिसें अबुया ह्याउंतुपुलि पुयाः इष्टमित्रपिं थाय् बेला काः जुल । गनं गनं जितः नं व्वना यंकु । अन अबुं "थ्व ला छिकिपिसं सि हे सिल जि नेपाः बने ल्याना, कुस्थो (मालिक) पिसं जितः थें थ्व मचायात नं निघाः तया दीमाः, न्वानाः ख्यानाः क घाना दीमाः, स्यना कना दीमाः" धकाः लहाः वास्वा वास्या याना दीबले अभिसं नं "धन्दा

कया दीमो भिधाः (मालिक) जिमिसं कुगु चाःगु ग्वाहालि ह्याय्
मयाय् ।" धकाः धया हइगु व न्हाथासं च्या त्वंकाः खातां क्खाय्का
हइगु । हानं थव ह्याउंतुपुलि यानाः सँय् असामितय्त् थव नेवाः धात्थे
नेपाः वनिगु जुलं धकाः विधास जुयाः वीमाःगु याकन याकन बी
हइगु जुया च्वन । उकिं धात्थे धाय् धाःसा थव तुपुलि लहासाय्
'किसि प्यादा तय् छ्यग्गु' ज्या व्यू धाःसां पाइ मखु ।

छवाःति लिपा वकु-बिकु फुकं छेंगुलि मुंके सिधल, लहासांनिसं
कुति थ्यंकयात धाला (सल ताथ्येया वाः) फुकं बियाः ताथ्ये नं कोजित ।
अले अबु व बंजाःत २ हसितं च्यानाख्यः तक तः बया । नापं पाला
कतःपिं व २।४ ह मेपिं नेवाः साहुत नं दु । कहाँ वःपिन्त संगं बियाः
मेपिं सकसितं सन्हे बिल । अनं अबुयात भागि यानाहस्या मिखां
खबि वःगु दिकां दिके मफु । खबि हुयाः हुयाः ताथ्येत खने दतले
स्वया च्वना । 'भासँ तु भासँ तु' धाय्क नं गंसःताय्दतले न्हाय्पं दुयाः
दुयाः न्यना च्वना । व गंसः तापाना ववं लत्याति लिपा अबु नेपाः
थ्यन । थःथितिपिं सकलें बयाः लें स्वया यंकाः छें दुत यन । वाःछि-
नीन्हुति ला स्वःवःपिं हूल हूल जुल । मांया अमित न्हिलाः न्हिलाः
लचना याना जुजुं लिमलाः । छं, छं धाःसा बहनी ज्वीव कथाय् च्वनाः
नुगःमछिका च्वन ज्वी मखुला ? जि, जि ला धाय् हे मोल, थन बःन्ही
बःन्ही तुतः तातः ब्वने धुंकाः बनेकथाय् याकःचा ज्वीव भीगु पुलां-
बाखं पुत्तु वीकाः हाइपु लंका च्वने माःह हे जुल ।

थथे तःवाः मछि हाइपुक च्वने मलाकं नःला सनेगु थ्यंकः वल ।
नेपाले थें छेंखा पत्ति नःलासने मोसां पाला थकालिपिं सकलें मुनाः
वकील साहेबया थाय् नःला संवने माः, न्हिन्हि पालंपाः दापा था वने
माः । छन्दु भीगु पालाया दापा थाय् पाः । जि नं वना । मेमेगु मेया
नापं "करमसं च्वसे हलगु विहलपे माल थनि, जोगि जुया देशान्तर
वने" धयागु वीरकुशया मे नं हाल । अले जिगु मने वल - धन्य

वीरकुश राजा, थःत वानाः बिसिवंछ कलाःया विरहं थःगु राज्य थ्यंक
किजा हुमकुशयात लःलहानाः "मामयाके बेला कयाः सुदर्शना मालवने"
धकाः माः वन । तर जि, जि जुलं गज्याःह्य धाय् निगः प्यंगः ध्यवा
कमाय् थाय्था नितिं छन्त तोताः थन थ्यंक बया च्वना, धिक्कार हे का
थज्याःगु बंजाःज्या ला !

पालाय् न्हिन्हि लिमलाः । जोपस्ता, सबै, मथ, बालसाही,
सीतलसाही इत्यादि जिनंजि महि छीमाः । नखः सिधय्व सँय् इष्टमित्र-
पिसं 'संकपालि' (नखःया महि) तय् हइ तिनि धकाः आशा याना
च्वनिगु व वकील साहेबया तय्के छ्यत्त नं पाःलाः पालां हे महि यना
वीमाः । उकिं न्हाक छुसां मगाः । ख नं थज्याःगु महि भीसं दँय् छको
मोहनीं सिवाय् लाछि मलाछि छी फुगु नं मखु ।

कूछि भव्यखुनु सुयां कथाय् ज्वरे याय् मो, पालाय् हे कूछि
भव्य । स्याकोलाकोखुनु नं थ थःपिनि कथाय् भिद्यःया थाय् स्वने-सिने
यानाः लय् सिवा ज्वलं पूजा याःसां नय्गु पालाय् हे । लाय्कुली पाला
थकालिपिं सकलें वनाः पूजा याःवनेमाः स्वनेगु जक थन भुयूफसि
मदुगुलिं तःपुलें स्वनिगु, उकिं सँय्तसं 'भ्याय्बुकि लवु लोसाः (नेवाःतय्
लें नखः) धकाः धाइगु ।

चालंखुनु सकस्यां थःथः कथाय् चालं यानाः न्हिने ह्याउंसिन्हलं
तिनाः ह्याउं तुपुलि पूपि थकालिपिं न्ह्यःन्ह्यः तयाः पालाकतः सकलें
लाय्कुली वने माः । जि नं वना । सकस्यां फयां फच्छि तःजि क छाय्पा
वइगु जुया च्वन । क्वय्चि लंयात लव्यक उरुस्तं (रुसया वाय्चाया
छेंगु) या तुपुलि, लँयागु वा यांथियागु धोतुं व प्वाय् प्वाय् अंगू
न्हानाः अज बुहा बुहात छन्ननिहस्या ला न्हाय्पने सिखलं साय्कागु
तुकि सुया वःपिं नं दु । मेपिनि आपाःस्या क्वथाय् मीत तयातःगु
भिपूया लडि स्वानाः भिपूमालं क्वखाया वःपिं नं दु । सँय्-समीनीत नं
सकलें बजार हे बन्द ज्वाक थोम्पसः दुकयाः दुकयाः हूल हूल खःवइगु

जुयाचवन ।

पायाःया ई ज्वीव हाकेवा स्मसाने सी स्वंकइपि तसे तःपुलै
ज्वनाः गोरखा अडां पिहाँ वल वया ल्यूल्यू जिगिजिगि च्वंगु वसः
तिसाय् नं स्वांमाः क्वखायाः स्वानं छुना तःपि थकालिपि सकसिनं खं
ज्वनाः न्याः वल । खं भयातु धकाः नेतमदुयः न्याकइबले लहाः ज्वना
हइ थें थकालिपिनि खं दुगु लहाः फया हःगु दु । दकले लिपा वकील
साहेब तासया लं फिनाः लुँगजू दुगु सी कुसां क्वीकाः जःखः भी नेवाः
खचरात तयाः सल प्याखं ह्वीकाः भाःबले नेवाःत सकस्यां मन स्वकु
थाहाँ व ।

फुकं पालाया थःथःगु नाय्खि म्वीकाः पालाकतः मुना वया
च्वंगु दु । भवालापालाया जक धाः नं थानाः वनिमाया पाया लुमंसे
वय्क 'हलुमांचुलि' धकाः स्वाःपाः च्वया त गु हासापाय् पाःगु धाल
प्याखं हुइका हःसां पायाः वःपि सुं खानाः सना मवः, असंपायाः थें
धिकिहिं न्हाना च्वन । उखे थुखे न्यनां न्यने मजीक पर्का म्वीका च्वंगु
दु । गनं गनं ज्वाः पर्काया सः नं ताय् दु । हानं पर्कां लानाः गुलिस्यां
वसः मि नःपि नं उलिहं मदु । थुकथं पायाः पाकोर चाःहीकाः गोरखा
अडाय् थ्यनेव अन न्याःनेसं हाकेवातसे तःपु लै त्वाकले दिका बिल ।
अले थकालिपिसं भुयूफसि पाले थें लै पाल । वकील साहेबया दों
सुबेदार छहस्यां पाल । उखे स्वया च्वंपि सँयूतसे 'हा ! लवु, हा ! लवु !'
(हा, लै) धकाः ध्वात्तु ध्वां ध्वां लाय् लाय् वुया च्वन । सँयू कुचेवा
(माहाँ) तसे चीका च्वंक च्वंक नं भी खचरातसे "फाक्यू, फाक्यू"
(चिलाहुँ, चिलाहुँ) धकाः अमित ख्यात्तु ख्याना च्वनिगु, मानो उखुनु
अमिगु हे राज थें ।

धात्ये धाय धाःसा लहासाय् नेवाःतय् थ्व मोहनि नखः नेपाले
स्वया नं तःजि, न्याइपु । न लैय् फुलपातिखुनु बहाइया तुपः सलं
पीन्हुया बिसिबःपि मेसं च्वइगु भय, न तलेजुइ हेके वनेबले थें हिं कीगु

धन्दा । भवानी पूजा धकाः अपाय्चो मोहनि-पायाः न्नाय्का नं हि
खुइगु ला गन चवाहाँ छगः हे स्याय्मो ।

जि नं जात्राय् चाः हुहु लहाः उलि उलि सनाः छको नाय्खि
थाना । 'नैनेवालं बाजं थात' धया थें समीनीतसे जितः तु क्यनाः खं
लहाना च्वन । जि लुमंसे वल - गुंलाबले छको जि नाय्खि थाना वया-
बले छं छिमि पाजु पिंथाय् भयाले च्वनाः स्वया च्वंगु । छन्त नं अथे
हे छिमि पाजुया म्हाय्पिसं जितः क्यनाः क्यनाः छु धाःगु ? लाःसा
"गपाय् चो लहाः संका वःगु छिमि भाःतया हंचा बहनी चिकं थाके
मालि तिनिका" धकाः ला धाःगु मखुला ? मखुसा छाय् छ छयः हाकु
तिनाः लुकुबी माःगु भयालं ?

असं चालंखुनु असं साहुतय् कथाय् चालं । मेपिनि सिन्हः
तिकेगु धकाः उखुनु निसें हे वं वयात वं वयात पाहाँ हाना ज्वीगु व सात्तु
सालायंकाः पाहाँ याय्गु चलन खनी । थथे थःपिनि नखत्या च्वला सिधय्काः
सँयू इष्टमित्रपिं थाय् 'साकंपालि' तय्के छुछुं हे स्वन्ति नखः थ्यंकः
वल । लक्ष्मी पूजाखुनु नेवाःतय् कथाय् मत-मित च्याकाः लक्ष्मी पूजा ।
थुक्रियात सँयूतसे 'छुंमि लोसाः' (मत नखः) धाइगु जुया च्वन । भी
खचरातसे नं उत्तिकं हे थ्व नखः माने याः । ह्यपूजा खुनु सुथस्या चप्पा-
चिप्पा नय् धुनेव हे पाला-पालाय् वनाः ज्वरे याः वनेगु । बहनी ह्यति
ह्यति पुजाभः तयाः धलं दनाः ह्य पूजा याय् माः । संगंयात सिसावुसा
जक तःसि, चाकुसि, कालजंवि मदुसां कोखा जजंका छतानि थन तःजि
ज्वाल ज्वाल थिक तास, तिनिखाः रंगी चंगी लुँदुगु कय्चि चापाःया
जजंमो दुगु व जजंकाया नापं खोसि न्याउरीखंबु मिसि बःसि इत्यादि
गंगु मसला तय्गु । क्रिजापुजा धाइ, तता हे मदु थाय् छु याइ, नेपाले
ततामिसं व्वति तया च्वंगु 'तःसि व्व' जक लुमंका च्वनेगु ।

थथे न्याइपुक निगुलि नखः सिधय् व थन द्वीवात (धाक्रेत) हूल
हूल काहाँ वइगु जुया च्वन । हानं गामे गामे बने ज्याके छय् माःगु व

गुलिगुलिम्यां शोष नं पिकाय् माःगुलि शुथाय् साहुतयत् न्हाक बंजाः
दःसां मगाः थें च्वनिगु, उकि खचरात नं ग्वाहालि काय् मालिगु । न्हापां
ला भ्वलकत खने दय्कः वल । थपि ल्हासा सहरं यक हे तापाक च्वपि
जुगलि थौकन्हेया सभ्यतां भ्याः भचा हे मकीनि धाःसां ज्यू । वसः-इसः
हे नं यचुक पिचुक पुने मसः । उकीसनं तातापाक लँ ज्वी माःपि जुगलि
थ्वः थ्वः मुना ज्वीगु व थपि सुरा नं साप सुरा । हानं भचा हारां नं
हारां । अथ्यनं थपि नाप नं बनेज्याय् थाकु मजू, अमिसं हे नयवत
(ल्वहँल्याः) ब्वना हङ्गु खनी । अमिसं खँ-खँ ल्हानाः मू-माः कोछिना
बी । अमित छयाङ्ग रिङ्ग (थ्वँ खर्च) भतिभति बीव गाः । अथे हे
होरवात नं अज्यापि हे । अज्ज थमि ला लं नं पाकपा (छँगू) यागु ।
थ्वः थ्वः मुना वइ, वकुका वकु ह्वापा (फ्याकधोँया छँगू) ईपा
(गुँखिचाया छँगू) वँकाः (वँचुवँचु धाःपि न्हिप्यं तथ्वाःपि जन्तुतय्
छँगू) तंपा (वाँय्चा) इत्यादि छँगू ज्वना वइ । आपाः थमिसं पुस्याः,
भिपू, नंबु इत्यादि न्याना यंकइ । थमि खँ ल्हाइगु हे नं भचा छाः पहः
वः । हानं भीसं मेपि नाप बने ज्याना च्वनाः अथवा मेगु ज्याय् लाना
च्वनाः अमित भचा नत्वीगु लिपा लात धाय्व हे तंम्वेकाः 'छु जिमिगु
वसः भ्वाथः धकाः हेला यानागु ला ?' धकाः धाय् लाकइ । थमि नाप
नाप हे धया थें सिलिवात नं वइगु, थपि भचा सुचुपिचु । थपि आपाः
भिभिपि 'सिलिङ्ग सल' व ताथ्ये ज्वना वइपि । उकिया मुलं भचा भचा
सकतां माल व आपाः वहः ज्वना वनिपि । मेपि छखलः अमदुत दु ।
थपि दँय् छको जक वइपि मखु, वरावर वइपि । थमि भचा साप तं
मभि । हारां नं उत्तिकं । भी थाय् नेपाले पूर्वपाखेयापिनि खुकुरि संकाः
संकाः ल्याः याइ धाइ थें थपि नं न्हाबले चुपि व तुपः भ्याना ज्वीपि ।
निगति खँ जुलकि स्याना थकेत नं लिफः मस्वइपि । थमिसं लँय् वइबले
गनं च्या चि दाय्के मलात कि फैया ही हे चप्पा वालाः नया वइ धाइ ।
हानं थमि गुलि गुलिम्यां मखमलयागु वा बनाःयागु लँने भिभिगु तंपाया

मुगुजि तयाः फिना वइपि नं दु । मिसातय् तिसा आपाः पुस्या व भुयूगु
भिपू । ल्हासायापि व ल्हासां ससत्तिक च्वपि तिकमुनितयत् मज्यूगु
थ्वपूगु भिपू मुनायंकइपि हे थपि ।

भीसं नेपालंनिसें थन ल्हासाय् थ्यंक बथाः धाथें बने ज्याय्गु
थ्व हे द्वीवात नाप । छ उदेक चाइ थ्व द्वीवातयत् मि जक मियां मगाः
आसिवाः नं तया छय् माः । खँ छु धाःसा अमित पत्याः ज्वीकाः अपि
छथोसित मी धुन कि थःपिसं जक हानं हानं न्याःवइगु मखु कि मेपि
गाहा नं ब्वना हइगु । हानं अमि छगू चलन दु, अमि लक्ष्मी पिहाँ वनि
धकाः साप ग्याः, उकि अमिसं भाः भी कांजिनाः दां बी त्येव दांयात
वान्यानाः बा फययाः थःपिनि लने छको हुयाः तिनि बी । अले अमित
माल ल ल्हायत् न्हिले पिनाः पिनाः "जीमा, भिने मा, आकिवं थ्वया
भिदुगं माल न्याय् फय्मा" इत्यादि धकाः मानो सिस्ति बियागु थें दान
बियागु थें लः ल्हाना बीगु । अले लय् लय् तायाः न्हिलाः माल ज्वनाः
"दिसँ न्दै सोता, दिसँ न्दै भिदा" धकाः वनि ।

मेपि, दुप्पा (भूतानी), मुसुमां, चिनियात नं दु । थपि भी थें पसः
व कथा दुपि हे जुल । थपि नाप गबलें गबलें व्यापार जू, तर लवः
च्वथंच्वः जक थ्यू । अथे हे खाम्पात छखलः दु, थपि ल्हासाया ततःधपि
महाजन हे जुल । थपि नाप जोडे जुयाः व्यापार याय् साप हे थाकु ।
द्याःत्याःया ल्याः स्वय् मोपि, ध्यवाया पर्वाह मदुपि । उकि थपि नाप
मिले जुयाः व्यापार याय्गु हे बुद्धिमान्नी ।

थ्व हे व्यापारया हूले बहिया छास्कामिनी अजिमाया छगू
जात्रा दु, भी समेयः न्हाके थें दुने च्वनाः कुबुया हइगु । अनेक प्रकारया
दंफु, खंजरी, भुस्याः आदि संय् वाजं थाना जिगिजिगि च्वंक कय्चिलनं
छाय्पा हःह द्यायात अथे हे तःजिक वसतं तियाः मिखा दुगु द्याःलाकां
न्हानाः सुचि नीचि याना तःह छह बह्लाःह भिक्षुं कुबुया हइगु, स्वय्
हे मयानु छ्वाः वः । संय्तय् भापू दु- इथिमिथि जुल धाय्व व द्याः

लहने हे मफय् यः ।

शुक्रथं ५६ ला तक मिखा हे कने मलाक बने ज्याज्यां नेपाले सा चिकुला फूथें च्वंकाः सँयतय् दावा धांगु (न्हापांगुला) लोसाः थ्यंकः वल । थ्व सँयतय् तःधंगु नखः । सिल्ला थ्वः पारुखुनुं निसें थ्व नखः दनिगु । 'गुथूक' धकाः भी सा छेला भू याय् थें आमैं खुन् काति त्वनाः चान्हसंनिसें बहिली देके वना. पारुखुनुं निसें साःभि नयाः बांलाक पुनाः कथाः लहाःवइबले थें ध्याकाः ध्याकाः 'पे' धकाः अनेक प्रकारया कविता-मे हाला ज्वीगु व स्वन्हुतकं पस-पिसः तिनाः द्विता ज्वीगु । गुम्बा गुम्बाय् नं बरेतसें पूजा-पाठ यानाः बाखं नं कनिगु जुया च्वन ।

द्वितीया खुनु भी नेवाःतय् पोतला लामाजु दर्शन याःवनेगु दिन । पोतला छगुलि जिगिजिगि ताचो, ध्वाँय्, दिक्मान् व्यय्काः छाय्पा तःगु । पोतलाया ततःगोगु तुयूगु किलासे लहासा पाकोरं हे खने दयक ततःपाःगु पौभाः व्यया तःगु व च्वनिसें कय् ख्यले थ्यंक खिपः प्यनाः उकी अप्सरा, गन्धर्वत व्यया वःगु धका, मनूत व्यय्का हइगु । लहासाय् बहिया पिने लाखय् प्याखं थें ज्याःगु अनेक द्यःप्याखं ह्योका तइगु । पोतलाय् दुने कोताःत व ततःधंपिं लामाजुपि मुना च्वनिगु । चिनिया अम्बा, दुप्पाया पंजु व भी वकील साहेवपिं नं सकलें पोतला लामाजु दर्शन या वनिगु व लामाजुं सकसियां नाप कुशलवार्ता यानाः थःथःपिनि देशे सुख शान्ति दु-मदु इत्यादि खं नं न्यनिगु । अन छथाय् खप्से महि व मेमेगु नं ज्वलं द्रुं चिना तइगु व फैं ह्यं ह्यं सुख गंका तःगु नं पपं चिना तइगु । अन न्ह्याम्हं सँय् तसें 'मिमलप' (प्रसाद) भाःपाः लुतां काःवइगु खनी । अन हूल त चोगुलि तले लाःपित त्यत्तु त्यलाः न्हुत्तु न्ह्यीगुलि सँय् मिपाही तसें कथि भ्वाभ्वां दायाः चीका च्वंसां ४६ ह्य मनूतय् त घाःपाः ज्वीगु व गबलें गबलें ला मनूतसें न्हुत्तु न्हुयाः सि हे नं सीगु हँ । उखुनु लामायाथाय् मेपिं सँय् त सुं वने मदु । भी नेवाःत जक न्ह्याह्य वंसां ज्यू, वियात गु इले भांदिवा भोछुना वनेगु

जुयाः वने माः । लामाजुं रेसमया गोध्वाँय् घाना त गु लुँ या कथिचां भागि याका हइ । अन च्वना च्वंपिं लामापिसं सुंदि (कखा) छपु छपु कखाय्का हइगु । व सुंदि खनाः सँयतय् ई चुलुचुल वंका च्वनिगु ।

अनं जिपि पोतलाय् देके वना । न्हापां अनया मुख्य द्यः चेंहेसि (करुणामय) दर्शन याना । अन थाय् थासे व्यया तःपि द्यःपि, खाया तःगु पौभाः, च्वयातःगु अंगःया खँ लहानां मव्याः । न्ह्यागुं तःधं, न्ह्यागुं आपाः न्ह्यागुं तःजि । अनं जिपि न्हापा न्हापायापि १२ ह्य पोतला-लामाजुपिनि सीह्य स्वथनाः दय्का त गु १२ गः हे चीभाः स्वःवना । भोलाक दय्का तःगु छखा छखा गुम्बाया दुने व व लामाया जन्मकाः छि खाःगु अमूल्य अमूल्य रत्न सकतां उकी उकी तयाः लुँ हे भुनाः दय्का त गु । उकी स्वांमाः थें पुस्याः माः, भिपूमाः मोतिमाः कखाय्का त गु व मेमेगु भिभिगु वस्तु नं सकतां अन हे स्वथना तःगु दु । अन छथाय् छधी व्वकिलुं धी नं व्यया तःगु खना । व भवा च्वकामका ल्हासे हिमालय बान्कि वः, छह्य बह्य ह्य मनूखं जक लहने फइ । मेगु लहासा दे न्ह्याक सुचु मजू धा सां, थनया मनूत मोलहुयाः यचुक ज्वी मसः धाःसां गुम्बा छगु ला थुलि यचुकाः, पिचुकाः, सुचुका तःगु दु कि कचिंगः जक मखु धू छफुतियात नं अन च्वनेगु अधिकार मदु, वय् हे न्ह्याय्कं स्वय् ज्यू ।

तृतीया खुनु बरेत दे नापं ह्याउंसे च्वंक लहासाय् दुहाँ वइगु व सेरा, धेपुं, गन्धेया २१ दो बरेत नीन्यासः दँ ह्यः भगवान्ना नापं वःपिं भिक्षुपिं कपिल वस्तुया लाय्कुली मू थें व हे बहिली मुनिगु । २१ न्हु तक ला लहासादेशे थभिगुहे वां (अधिकार) । छुं जुयाः थ्व २१ न्हुया दुने छुं मुदा मामला जूसां कास्यालं स्वइगु मखु छोचिस्यागुं (अधिकार कयातःपिं भिक्षुरिं स्वइगु । अपिं दुहाँ वयाकथं न्हापां नागराजायात लखं दु ख ज्वीके मज्यू धकाः व लहेकुं (अडा या लहेचेवा (कारिन्दा) तय् २१ न्हुया थ्व धर्म शासनयात छिमिसं बांलाक

ग्राहालि याना बीमाः धकाः उदि न्यंकइगु । ध्व बरेतयूत न्हि न्हि क्या
त्वंकैत क्या दायकइगु मुतूवाले मनु छह दनैजिलं मयाः । क्या मदायाः
त्वहं मी ह्याउंक लुयाः मबाइइ मिक कम्बाइगु ।

उखुनु निसें न्हि स्वको बहिया भुइख्यः थें च्वंगु तःधंगु चुके बरेत
सकलें संघ मुनाः पाठ व धर्मसम्बाद याइगु व सिधयूव बहिया न्याप्वाः
लुखां पिहाँ बइगु । अन न्याभाय् हे च्वनाः व बरेतयूत दातापिसं गेतम्बा
(दान) याना च्वनिगु । ध्व गेतम्बा याइपि आपाःयानाः खाम्पात व मी
नेवाःत । धाइगु नीछरो तर इरे यायबले २५ दो ज्वलं ज्वरे मयासे
मगाः । मी भाय् जूसा न्याःपञ्चादी व न्याःसमेवले धे कजीया थ धिति
इष्टमित्रपिसं दानशालाय् च्वनेगु व भुइख्यले बाहां छ वने माः अथे हे
ध्व मोलम्या गेतम्बा याःवनिपि दातापिन्त नं अमि इष्टमित्रपिसं
ग्राहालि यावने माः । ध्व मी बौद्धपिसं स्वभावं हे धर्म थूगुलि पट्पार-
भिताया दानपारभिताय् चतुर्बह्व विहारया मुदिता भावना दुगुया
लक्षण खः ।

सिपुन्हीखुनु चान्हे मी बचाःवा गोरा थें पाकोर छचालं चप्पाया
तोर्मा (गोजा, तःनेवः, बःनेवः) दय्काः उकी ध्योयागु अनेक बुत्ता ततं
मनु पशु पक्षी इयादि ज्यानाः छगू हागसया स्वर्ग हे दय्कइगु । ध्व
स्वयूत चान्हे पोतला लामाजु नं विज्याय् माः । नाप नापं मी नेपालं
कस्यालि बिया हया तह कसि नं फयां फच्छि छायापाः हइगु । अज्ज
अमिगु भाषां 'लार्जि फेसो' किसि विज्यात) धकाः बाइगु । किसि नं
छह यः भाःपाः अथे विज्यात धकाः वचं तय् माःगु जुया च्वन । हूल,
तस्सकं हूल ज्वीगु । मी कोनेवाःखुनु थें गांगामं यक यक मनूत बइगु व
अथे हे समीनीत माःमाः हुना ज्वीगु । धन नं मिसातयूत सात्तु सालाः
व्यय्के यंकै यः हँ । जि नं न्हापां खंगु जात्रा जुयाः स्वः वना । गय् गय्
जुयाः जि ल्हासाया मुल्याहातयूगु हूले दुने लात । अथे ला जितः अमिसं
हुं याःगु मखु अथे नं अमि थःअवे बारपुर संवले व मिसातय् भाय्

ध्वात्तु ध्वाध्वां वंबले जिला कात्तु कानाः सासः हे ल्हाय् थाक् थें जुल ।
अज्याः थाय् मी थाय् कथाय् बराबर बइहा कुचेवा (पुलीस) छहसे
'अय् सोताला' धकाः ज्वनाः हुलं पित महगु जूसा जि तस्सकं कसा
नइगु । लिपा ला अन चुपि-चापि सुयाः घाः पा नं जुल खनी । छह
ला सि नं सित धाल ।

मेगु छगू बहिली च्वंछ करुणामयया जात्रा नं दु, रथे तयाः
सालाः पाकोर चाःदीकइगु । व नं जात्रा याय् लच्छि न्हावनिसे थः
मालेगु धकाः चान्हे चान्हे तुतः च्वने थें मे हाले थें हालाः माः ज्वीगु ।

थुगुकथं सँय् लोसा सिधया वंसां उकिया यधं गोन्हु तक नं
मतं । मीसं मोहनीं साकंपालि तय्के छ्या थें सँय् इष्ट-मित्रपिसं नं मीत
'खप्से महि' तयाः भाग तय्के हयां च्वन तिनि । प्रकृति तीजक चिकु-
लाया गावः उलाः वसन्तयात मिखा व्वल । वसन्त जक छाया सुकं
च्वनि । व नं ला व हे ताके याना च्वंछ । उकिं वं नं ल्हासा देशया
छचालं दुगु लिखाया चहचकि हे मेगु याना बिल । अन थाय् थासे दुगु
वःसि, फौसि, खोसि व स्याउ आदिया सिमाय् वाउंक चुलि जायकाः
गुगुं गुगुं सिमाय् वुं नं हय्का बिल । नाप नापं मेमेगु नं रंगरंगया
स्वां हय्काः लिखायात दुगंछि छ यपाः न्हाइपुका च्वन । द्वीवात सकलें
धया थें कोजी धुं कुगुलि लिमलाक वने ज्याना च्वने माःगु मखुत ।
उकोसनं आपाः गामे वना च्वपि वंजाःत नं धमाधम लिहाँ वया च्वंगुलि
सकस्यां लिलाः । उकिं नेवा तय् थुथाय् हे भचा नेपा लुमनाः ह्याइपुइगु
खनी । अथे ला सुथे न्हिकं यायबले व बहनी तुतः च्वनेवले स्वयंमु,
करुणामय, हारति धका नां काक् पत्ति धया थें नेपाः लुमं । धाल्येया
खं जा मै नेपाः लुमनि धयागु हे छें लुमनिगु, छें च्वंछ लुमनिगु खः,
ध्व धाय् माःगु खं मखु । उकिं नेवाःतय् ह्याइपु तंकेत छें पिवाः मार्फि
(जाधु सुवाः) छह जक लयंकाः कथा हे सुचुक सुचुक 'लिखा' वनिगु ।
अन नयाः त्वनाः ल्याःखी यायां भाः मामयां द्विताः न्हि छ्यानी

वश्यु । अथे हे जिमिसं ह्याइपु नं लंकेगु, छगू निगू मस्यूगु थाय् नं सीकेगु विचारं मेपि छद्म निह्य पासापि नाप सल्हा यानाः गुम्बा गुम्बाय् यः सीकः वनेगु कोछिना । अथे ला सेरा व धेपुं गुम्बा अपाय्चो तापाःगु मखु, म्नी थासं ल्हुतिति हे धया थें जक पाः, अज्ज सेरा ला सुथे न्हिकं यानाः थाक्चों (कःमि स्वयंवेले थःने पाखे भ्यास्याहाँ भचा थध्याक छ्वाइछ्वा छें बांलाक खनेदु । उकी गोध्वाय्, ताचो ज्वय्का तःगु नापं सकतां सी दु ।

न्हापां जिपिं १६ ह्य पासापि मुनाः सेरा वना । सेरा धाय्गु जकं गुम्बा, व ला छगू देश धा.सां ज्यू । आपाः छें २ तँ जाःगु । व हे य दुगु पत्ती छें जक ३ तँ व यःया फुसे लाक गजू, कुं पा दुगु पौ नं दु । अन मुख्य य ह्यग्रि । मेपि बुद्ध बोधिसत्वपि व अंगले च्वया तःगु चित्रया खं ल्हानां मव्याः । छगू कला प्रदर्शनी धाःसां ज्यू । न्हाथाय् स्वःसां ह्य.उंक चीवर पुनातःपि बरेत सित्राय खने मदु । थन बरेत १६०० ह्य दु धाइ । गुं बाया धाखाय् च्वंगु छें जडा दुपि निङ्मा लामा-तय्गु गुम्बा । अन च्वनाः गुम्बाय् विघ्नवाधा मज्जीकेत तःगो दवदव थानाः शान्ति स्वस्ति याना च्वनिगु । मेपि बरेतय् धर्मशास्त्रया अध्य-यन व बराबर धर्म सम्वाद नं याना च्वनिगु ।

जिपिं वनाकथं जिमिसं ह्यस्यूपिं बरेत दुगु पत्ती छ्वा छें जिमि ज्वना वनागु खानदान दिकाः देके वना । धुं, देवा च्याका, खाता छाया, गनं गनं ध्य लुलुं निगू स्वंगू गुम्बा चा हिला । थाय् थासे ह्यस्यूपिं बरेत नाप लात । अपिं नाप नं कुशलवार्ता यायां जिपिं जिमि छ्वाःखः तिम्बि । याय्गु छें वना । अन थयंवेले अन च्वं पसं च्या-चि दाय्का तय् धुं कुगु । मोल कुस्थो, मोल घेलुं धया नं मज्यू अभिसं स्वय् फोहर जुयाः मयों धाःगु थें च्वनाः चाम्बारे सोताः' (नीगु खः साहु) धकाः च्या लुना बिल । अले अन नय् नी यानाः लिहाँ वया ।

धात्यें म्नी नेवाःत अथे धर्मे श्रद्धा व देव देवतापिनिगु विश्वास

नं दुपिं जूगुलिं व बरेतसें गुम्बा गुम्बाया द्वलंढः दां धित्तु धिनाः त्याय् बी हश्यु ।

थुगु प्रकारं जिपिं छन्दु धेपुं गुम्बाय् नं देके वना । व गुम्बा सेरा स्वयाः भचा तापाक लहासा देशं पश्चिम पाखे लाः । अन नं सकतां अथे हे धाःसां ज्यू । बरेत जक ७००० मछि दु धाल । उकिं छें सेरा स्वयाः आपाः दु । मूयः महिष सम्बर । मेमेपिं यःपिं यक यक दु ।

गन्धें भचा तापाः लहासां ८६ कय्ति हे पूर्व पाखे वने माः । पाखं छपाउति थाहाँ वनाः पर्वते च्वनिसं उखेपाखे कय् भ्यास्याहाँ ल्वीक गुम्बा । अन बरेत ३३०० ह्य दु धाइ । यः मुख्य जेरिम्पोछे (मञ्जुश्रीया अवतार) । मेगु सकतां अथे हे । अन जिपिं बासं च्वनेगु यानाः वना । अन नं म्नी ह्यस्यूपिं बरेतसें च्या-चि दाय्का बिल, थुकपा (काति) दाय्का बिल । अनं कन्हैखुनु लिहाँ वया ।

धात्येंया खं जा मै, लहासाय् धर्म व संस्कृति थ्व हे गुम्बा गुम्बां यानाः लयना च्वंगु धाय् माः । ख जा थन बुद्ध धर्म दुहाँ व.गु जुजु लहा-थो-री न्येन्चेनया पालंनिसं धाइ । हानं लिपा खोनचेन गम्पोया नाप म्नी नेपाळ पुत्री भृकुटिया ब्याहा जुसेलि ला व धर्म संस्कृतिया नं रूप कयाः पलाः न्हाका वःगु खनेदु । गुकी थ्व हे स्वंगू गुम्बा व उकिया कचा गुम्बा—हामुची, धीप्, फोरंखा आदि गुम्बाया बरेतय्गु लहाः खनेदु । विशेषयानाः ह्यामुचो तत.धंपिं, विद्वानपिं लामाघेपा (शीलवान् स्थविर भिक्षु) त दु । थमिसं भगवानं मिसातय् नाप व्यवहार याय्गु विषये आनन्द भिक्षुयात कना बिज्याःगु खं बांलाक पालना याना च्वंगु खनेदु । उकिं आपाः थिरिम्पोछे ज्वीपिं अनयापि हे । अनया मुख्य यः भैषज्य तथागत । धात्यें स्वय् हे लहातं हलः छगः ज्वनाः सकतां ल्वय् व हे हलः छगलं लाय्के धकाः भाला कया च्वं थें च्वं । अथे हे अनि (भिक्षुनी) तय् निति लहासा देशया दुने छगू अनि गुम्बा दु. मेगु छगू फोरंखा पाखे नं दु । फोरंखाय् ला छगू गिद्धयात ला नकइगु दिप नं

दु। अथे ला लहासाय् दकले तःधंगु दिप यरवा धाइ। अन जूसा उइ नं ज्यूगु जुया च्वन। तर अन थ्यंक यंनेत तापाःगुलि आपाः सीपि 'सास्याः' दिपे यंकइगु जुया च्वन।

थ्व खं छन्त धाय् मागु मखु, जन्म जूपि प्राणीत सकलें सीमाःपि उकिं गुलिखे नेवाःत थन नं सी धुंकल, थन - लहासा थ्यंक वया च्वन धकाः कालं मलयंकु। उगु साले नं छह नेवाः सित, भी पालाया सकोया जोशी। थन थःथिति, फुकी दाजुकिजा न्यागु धाःसां पालाकतः। जोशी-स्यस्य, बरे-गुभाजु ज्यापु-उदाय् धयागु थन मदु। सकलें पालाकतः। नेवाः जातिया नेपाः दुहाँ वक नेवाः याय्गु स्वभाव थन हे जक ल्यंदनि धाःसां ज्यू। सकलें पालाकतः मुन। पालाया खाता हल। वया ककाया काय् किजा मेगु हे पालाय्। वयात धाय्के छत, खाताया नापं व नं थ्यन। मेमेपि इष्टमित्रपिसं नं खाता, धुं, ध्यो तय्के हल, थ्व हे थनया व्याहा खः। वन्नसत्वया गुभाजुपि सकलें थ्यन। अले तुयूकापतं दुखापिखां तीकाः कूताले तल। भाजं-भिजं, सु-सा छुं मोसां प्यह गुभाजुपिसं कुवुयाः हामुची तक यंकल। अन तक स्याः न्याःपि खया नं वने माःगु जुया च्वन। अननिसं ह केवातसें कुवुयाः सास्याः दिपे यंकल। पालाकतःपि सकलें धयाथें दु, जि नं वना। थ्व सिथं यंकेंगु ज्या सुथ न्हापां हे याय् माःगु जुया च्वन, छाय् धाःसा थन उखुनु हे दिपं लिहाँ वयाः वःलाछि व्यंकाः कँयलः काय् माः।

दिप छु। छगो तःगोगु सुलुस्याच छितेगु ल्वहँः थें भ्यस्यहे लुगु ल्वहँः। उकी सिपँय् दिके थें सी दिकाः कूताः जक कम्बाना हल। वया ककाया काय्हासें च्याःगु धूँ छपुं सीया सँय् थीका बीव ह्वाकेवातसें सीहसित वसःइसः त्वकाः छयँले खिपतं चिनाः चय्यपाखे साय्काः धमाधम ला खानाः व ल्वहँते गा.वंथाय् मुंका तल। छचालं ततःधिकाःपि घोट (मिद्धत) मुना च्वंगु दु, गुलि भाराभारा पपू संका च्वंपि, गुलि गलः तथकत यानाः ताक याना च्वंपि। अमित न्हापां कँयनि कुवा

कुचा यानाः नकल। लिपा छयँयात तःगो ल्वहँतं चियाः तच्छयानाः व ला नापं वालावाला संकाः तोता बिल। छतिं छकू छकू थःला मथःला पलखं हे सुचुक नयाः बोत चिला बन। गुलि गुलि ध्वया नं बन। अले व हि-हा दाः दी किना च्वंथाय् चप्पा वालाः सकतां हुत्तु हुया बिल। ल्यं दुपिं घोटसें व नं लाकलुक यानाः नया वन। अले ह्वाकेवातय् अन हे लहाः-लही हुयाः बजि-बजि नय् धुँसेलि सकलें लिहाँ वया।

पालाय् थ्यनेव घःसू पुजा भव्य। धाथें मै, जि उखुनु व हे सुथे न्हापां च्या त्वना वनागु सिवे बजि छपौ, ला छकू घुरकः छय् मफु। श्मसानया व हे दृश्य जक भिखाय् वया च्वन, च्वन - व गिद्धतसें पुलिकँय् छकू छकुतिं घुतुक नुना छःगु, आतापुति सात्तु सालाः ल्वाना च्वंगु व विशेषयानाः ह्वाकेवातसें ला, हि, दाः छु भ्याः छु भ्याःगु ल्हातं बजि नया च्वंगु जक लुमनाः भव्यव्य लहाः हे मव। चान्हे नं न्ह्यः हे मवः। जिपि ननेवाःत निहं छग्वारा चिना च्वना। मने छुछु खं लुया च्वन - थ्व सः न्यनाः वया कलाः गय्च्वंक ल्वइगु ज्वी, ख नं गय् जक यानाः सह याय् फइगु खं गुलि लांलां तक खि कयाः च्व कयाः उसाय्-मदु लहिनाः थःगु न्ह्यःने भाःत सिका च्वंपि ला वना बना वंक ल्वय्यो धासेलि थन थ्यंक, व नं थ्व जू व जू धकाः मसीक मन्त धकाः वगु 'कचिकां हिना पौ या भरे गथे भाःत सित धकाः सौसाः वनेगु ? उकिं ला अबले सती वनेगु चलन दनिबले चण्डाल पासायागु जालं भाःत मन्त धकाः सः न्यनेवं व पतिव्रता भिसा "छि कायया संसर्ग वने न्हा" धकाः सती वना छःगु।

धाथें ला थन वासः नं छुं याय् खंगु मखु। २३ न्हु ज्वर वल थःथःपिके दुगु पीत्तदन, संखवति छु छु वासः नकल, मथ्यू, सँय्तय् थें थ्वं दाय्काः त्वंकेंगु इत्यादि वासः मीसं याय् छाःगु मखु, मं मं ज्वर तच्चो जुया वल, कला ह्य ह्यायाः ह्यायाः ज्वरे हाल - सित। अले जि ला च्वनां च्वने मफया वल। व भिसा छ हे थें च्वना वल, व हाल-खल

ज्वी धकाः मने लुया वःलिसे छ हे खःगु, हाःगु, मूच्छा मूच्छा ज्वीक
संगु थें च्वना वल, खना वल । हरे मै, छन्त अबलेतक छुं साक भिक
नके मनंनि मनं तुना थें छजु भः भः धाय्क पुंके मनंनि, न लुदंका नाप
नापं गनं ज्वी नन । खः का छको निको फुकिजे पूजा-पा ना ज्वीबले नाप
नाप च्वने नं उलि हे का । व नं हने मा पिं आवा, कका, दाजुपिनि
न्यःने, नतु हे मछालापुसे च्वं । हो, लिपा उलि नं नाप च्वने मखंका
थथे बाया च्वने माःगु । उकिं हे ला ज्वी लहासा नेवाःतय्त् म्हाय्मचा
वीमयो धाःगु । सँयय् जूसा व्यापारे वंसां नाप नाप खुनु वने ज्यू ।
... जि मचाय्क हे जिगु भसुकाः वल—“धाय् ज्यूगु मखु, ला-हिया
शरीर, जि नं छुं जुयाः ... थन अथे हे जूगु जूपा छं नं मै, अथे
हे ... छु छु जक याय् धुंका ज्वी जि धाय् मफु ।”

मुथे ज्वीकाः भचा आनाहाँ न्हः वल । उखुनु अथें । प्यन्हु
दुखुनु भि पूजा । सुथंनिसें वहिली व थ थ पिंथाय् खाता छपु छपु ज्वनाः
मदुखुनु थ थिति इष्टमित्रपिसं ज्व्या हया तःगु ध्यः लवन । लँकोर
चाःहिलाः खिवातय्त् चप्पा नकल, पश्वगितय्त् ध्यवा दान बिल ।
गुभाजुपिसं वज्रसत्वं थ (सफू छगू) ज्वना वया सी थाय् कथाय् पाठ
यात । पालाय् लय्सिवा ज्वलं पूजा यानाः भवय् । उखुनु नं जि नाकं
नसा काहाँ मवं चिच्छि मने व सकोमिया कलाःहस्या थासे छ हे जक
लुमनाच्वन, च्वन, उकिं कन्हेखुनु मुथे न्हिकं यानाकथं थाकच्चे थाहाँ
वनाः लहामु अजिमा (छास्कामिनि, यात कीगः तिनाबले सारा गुम्बाया
जवपाखे जामाचोकुने सिकापाकुया हः खनाः पालाया पासापिं छहनिह
नाप सलहा यानाः अन वनेगु कोछिना ।

धात्थें कन्हेखुनु हे माःमाःगु ज्वलं सकतां ताथ्येयात कुज्वीकाः
सल गयाः वना ज्व्या । ह या कय् धुंकार धयागु गां दु, अन हे बाय् ।
कन्हे खुनु सुथय् गामं पिने ख्यले सकस्यां लं-लि तोताः पहाड गयाः
थाहाँ वना । न्हापां ला भी जामाचोया जलिल्वहः थें मखाः ज्वी धकाः

च्वनां मखु खनी, पाः साप तःस्वाः, प्यपां प्यपां चुयाः वने माः । हः थ्यनि थे
च्वंकाः छथाय् फहिला वने मा, उखे पाखे खने मदु, पचिपचि यानाः
कय् कय् पुयाः पलाः तय् माः । धात्थें अन जिगु पलाः छपलाः
तोफ्यूगु जूसा ववै पू माले मालिगु । तर थौं तक नं अनं कुतु वयाः सुं
नेवाःत सित धयागु मदुनि हँ, उकिं थें जि नं मसित । हतं दुने कथाचा
थें २०१५ ह मनु च्वने ज्यूगु पाकु दु । अन चीभाःचा छगः व ल्वहः
छगले पालि ख्वाय् सीदु । व सुरतवज्रयागु धाल । अनं नं दुने वनेगु
हः छहः व जःखः थां गुंगः दु । थ्व सर्पया बिलु थें कैचा कैचा ल्गु
थांयागु बाखं ला छं न्यना हे त गु दु । व हतं दुहाँ वनेत फेफे तुनाः
वनेमाः, मत च्याकाः वने माः । अन मतं भचा खने मदुबले जि ला
भसंक वंक भी निह्वां कयहेँचा व मेमेपिं त्वाःया दाजु किजापिं नाप
जलिल्वहः थ्यना च्वंगु । दुने मनु छह जक न्हंगु हःयाथाय् भी निह्वा
जक प्यपुंका लाःगु । मेपिं मत ज्वंपि पासापिं गुलि न्हापा व गुलि लिपा
लानाः थथाय् लाक ख्यूसे च्वंगु व छ ग्यानाः जितः कस्सिक ज्वंगु ।
का, जि ला अन छह पासाया लहाः धकाः ज्वना च्वंगु । अले जितः
भचा चिकु थें जुयाः अन वय् ख्वाउंसे ख्वाउंसे प्याः थचाः वः थें जि
चाल । अन दुने ध्याक्वे लाक गाः छगाः दु, अन हे गुहेश्वरी विज्याना
च्वंगु धाल । धात्थें व गाले च्वंगु लखय् भीथाय् गुहेश्वरीया जल थें
स्वां-सि व धालाथ्व वास वः । अन पूजा यानाः काहाँ वयाः ख्यलय्
च्वनाः भवय् भी नया ।

अनं व हे पहाडया ल्यूने पाखे च्वंगु गुम्बाय् वना । अन भिक्षुत
नं दु । अनेक देवदेवतापिनि मूर्तिया नापं 'सुरतवज्र' धकाः वेतालिं
चिकाः गुजिलं फिका तःगु छगू मूर्ति नं दु । स्वयाः लहासा लिहाँ वया ।

धात्थें मै, संगीत व योगया अनेक सिद्धि क्यनाः पोतला लामा
नापं लय्ताय्काः नेपाःया न्हाय् तथा वंहा सुरतवज्र महा आचार्य नाप
सम्बन्ध दुगु थाय् जूगुलि भी नेवाःतय् नितिं व थाय् अत्यन्त महत्वपूर्ण

जू। उकिं आःतक नं लहासा नेवाःतसे व थाय्यात तीर्थ थें हना तः।

थथे आचार्य सुस्तवन्न लुमंकु लुमंकु शाक्यादावा (बछला) थ्यंकः वल। थुकियात सँयतसे भगवान जन्म ला धकाः साप माने याः। थव ला गबलें गबलें अनालां यानाः तछलां लाः वः।

लच्छि यंकं धया थें गुम्बा गुम्बाय् भिक्षुपिसं व निङ्गमा लामापिसं (तन्त्र चर्या याइपिं) पूजा-पाठ श्यादिया नाप नापं पौभाः व्वयाः उकी क्यनाः क्यनाः थ्वीक बाखं कना च्वनिगु। म्नी नेवाःतय् नं बहिली, हामुची, लुं देवा हिलेगु, खाता, धुं ज्वनाः घाःघाःपिं थाय् ध्यः लू वनेगु व अक्षोत्तीया खुनु तःगू हे पालाय् गुथि दु। कथा पत्ति बहि-खाता, भिद्यः पूजा याना पुलां ल्याः कोझिनाः न्हूगु ल्याः छुङ्गु नं थुखुनु हे। पुन्हो खुनु ला धाय् हे मोल स्वांया-पुन्ही हे जुल, पूजा, भव्य, सकतां-सकतां नेपाः लोमं।

थव खँ छन्त धाय् माःगु मखु, उथाय् तक नं म्नीगु आपाः पौ लहासा व नेपाः थाःहाँ काहाँ ज्जीपि नेवाः साहुतसे हे हय्-यने याइगु तिनि। उकिं लं नं अबले तक न्ह्याह्य लहासा साहु नेपाः थ्यंकः वः सां पौ ज्वना वःगु दइ धकाः आशा याना च्वंगु दु जुइ, हानं सुं लहासा वनिगु दु धकाः सीव चिट्ठि छपौ बिया छःसा ज्यू धकाः नं मने तः ज्जी मखुला ? अथे हे थन नं न्हापा अबुं पौ व पो ज्वना वः थें नेपालं वःपि नँनेवाःतसे नं पौ व 'तोकु' धकाः कस्यालि पो-पी नं ज्वना वःगु जुया च्वन। उकिं सुं नँनेवाः नेतालं बलकि च्याना रुयः तक वने मलाःसां व्वां छ्यू कथाय् तक वनाः पौ वा तोकु काःवनेगु चलन दु। गबलें गबलें ला 'स्वांपो' धकाः नेपाले छुं तःधं पूजा वा छुं तःधं ज्या याय् माल धाःसा 'थन थव पूजा जुल वा थव ज्या याय् माल' धकाः च्वया तःगु पौ सहित स्वां-सिन्हः दुगु समयज्वलं पो थ्यंकः वइ। अले पालाय् भव्य न्याइ, सकसिनं व सिन्हः तिनाः स्वां छुनाः नेपाः हे थ्यं थें न्यंक खँलहा-बल्हा याइ।

थुगुकथं मां, नेपाः व छ लुमंकु लुमंकु नाथो मदुगु जःमू थें घौ-पाला, न्हि-ला यायां दंदं फुना वन। छको नेपालं पौ थ्यन कि तुरन्त हे व्वयाः नेपाः थ्यंके माः थें च्वनिगु। मां नाप, छ नाप खँलहा-बल्हा याना थें न्यनिगु। हानं काल-बिल व ज्या-खँ धाधां व समय-जमू मचाय्क चाःहिलां वनिगु।

छन्हु छगू कथाय् नँनेवाःत थ्यंकः वःगु। म्नी पालाकतः मखुसां म्नी व्यापार सम्बन्ध दुगु कथा जूगुलिं मिले जूपिं पासापिं नाप च्यानाःरुयः तक लँस्वःवनेगु कोझिना। धात्येंया खँ जा मै, व थ्यंकः वःपिं नँनेवाःत नाप कुशलवार्ता यानाः खँ-खँ लहाय्गु सिवे नेपालं वःगु पौ छपौ याकन प्वलाः उकी मेमेगु खँया नापं "भौमचा ... प्रमुखन जल भोझिसयां आनन्द फया थुका" धयागु वाक्य छगू व्वनेगु इच्छां हे जितः अन तक साला यंकुगु खः। ख नं अबुजुं थःगु पती छंगु नां च्वय्गु गबलें तोमफीकु। वना, इले हे नँनेवाःत थ्यंकः वल। अमित हसीकाः छगू निगू नेपाःया समाचार न्यना। तर मन व हे पौ दुगु तातो पाखे जक, उकिं खँ लहाना च्वंपिं अथें तयाः जिपिं राइ ह्य ल्याय्-ह्यत जानाः व तातो व्वय्के हया। अमिगु कथाय् यंकाः अन कथाय् च्वंपिं बंजाःतय् न्ह्याःने तातो प्यनाः स्वया। पौः दुदु पिनि प्वलाः स्वयाः लय्तायाः लिइँ वल तर गुलि पुत्तु प्वीकाः स्वयाया जिगु पौ मदु। नुगः मझिकाः जि अथें वया। उखुनु बहनी व्यलि हे मयासें घना।

कन्हेखुनु न्हिच्छि अथें जि भुगुलुं। बहनी व हे हियागः नँनेवाःत थ्यंकः वःगु कथायापिं निह्य मनू व व हे कथाया पाला गुभाजु नापं थ्यंकः वल। जि ला हसं थाय् तोतल। काचाक चोक्ची भोस्वी धुन। अमिसं जिमि मेपिं पालाकत-पिन्त नं सः बिया थके धुंकल थें। व गुभाजु 'स्वयादिसं साहुजु, संसार थथे हे खः' धकाः खँ हे छी मलाःनि राइ ह्य पालाकतःपिं थ्यंकः वल। अपिं वःगु ताय् व जि थय्क थँस्वयां

अपि ला फुकं जमदुत थें धाय् ला कर्नपाका छुनातःपि द्यः धाय् जिला
ग्यासें हे वल अले जि “छिपि फुकं छगों जुयाः जितः छु याय् लनाः...
...!” धकाः हाले धुन । अले व गुभाजुं “साहु, काय् मचा जुयाः
अथे अधीर ज्वी ज्यूला, थज्याः वले ला खःनि चित्त चीफय्के माःगु”
धाधां तीजक कचिकां हिना पौ प्वल । फुकसिनं वयात त्वलहँ स्वया
च्वन । वं पौ व्वना नं हल —

“काय भाजु ... यात अशुभ संवत दोलछि व पीच्या साल
मिति ... ला गाक व ... वारखुनु ... रोगन छिमि
अवुजु ... स्वर्गारोहन जुल । थन माःगु सतिगति याय् धुन,
आमकन नं माःगु सुचिनिचि सकतां याना छ्व—छंमां ...” आदि
आदि छु छु धाल मयु, जि बांलाक ताःगु मखु । पालाकतःपि सकलें
थ्यन, सकसिनं थःथःगु तुपुलि त्वय् धुंकल । जि ला मेगु छुं हे धाय्
मफु, “यो ... वु ...” धकाः जवसं च्वंगु द्यःगमे भोसुना
बिया । मिखाया न्ह्याने अवु गोतुइकाः त्कोक गां फाय्का तःगु, मां स
चच्चः पुयाः नुगः दादां खया च्वंगु व छ व क्यहेंचां मांयात घयघय्
पुनाः खया च्वंगु दृश्य वया च्वन, च्वन । हानं वाइस्कोपे ‘भात्त’ मिं
मेगु थाय् खने दइ थें मेगु दृश्य वल — “जि नं थन सीसा ! ...”
अले छिमि नापं जि नं ह्यौय् ह्यौय् खया छया ।

भचा सकलें सुंक । लिपा भी पालाया गुभाजुं व सीपौ हानं
छको छगः छगः आखः व्वना स्वत । अले अन द्यःगमेसं च्याना च्वंगु
देवा कतकयाः जिगु लहाः ज्वनाः व पौ मते थीका विल । कथा नापं
मकसं नवय्क व भों च्यानाः नौ जुल । लिपा जितः अनेक प्रकारं होकाः
जिमि वंजाःतय् माःगु ज्या-जि वानाः सकलें थःथःगु तुपुलि लहातं
ज्वनाः कथां पिहाँ वन । जि जक चच्छि वंजाःतसें चाःहीकाः भुगुळं
च्वना च्वना ।

कन्हैखुनु सुथे भी थाय् खौ भ्या, काय् थें धुं छकूचा भ्याः

कयाः ख्वाः-खी सिला । वंजाःतसें पालाकतःपि छहनिह व्वनाः गुम्वा
गुम्वाय् द्यः लू वन । न्हिने ‘भिभवय्’ पालाकतःपि सकलें वय् माःगु ।
वल, भवय्-भी नया’ सकसिनं जितः विचाः याना वन । थःपिसं स सःथे
धीर्ज बिया वन । अमिसं धाय् फुगु, याय् फुगु उलि हे मखाः ।

छन्दु-निन्दु अथें वन । भी नेवा त सकलें धया थें विचाः वल ।
सैय् इष्टमित्रपि नं २४ ह्य वल । सकसिनं अवुजुया शील-स्वभाव, इमान-
जमानया तारीफ याना वन । अथे हे ज्या याय् माः धकाः जितः
अर्ति-शिक्षाया नाप नापं भलसा नं बिया वन ।

वाःछिति लिपा डाकं नेपाःथागु पौ छपौ थ्यंकः वल १७ न्हति
बिकाः । सकतां खँ मांया भाषां च्वया तःगु, मां आखः मसःगुलि मेपि
स्वीतं चका हःगु ज्वीमाः । उकिं छंगु नां मदु । क्यहेंचिगु नां नं मदु ।
कय् लाक मामं नेपालयागु काल-बिल स्वयत् व मेगु छें ज्या विचाः
याय् जितः नेपाः वय्गु तिवः याना तःगु दु । धाथेंया खँ जा मै, व
तिवःया दुने मांया भी मिह नाप तयाः याकन छय्चिया ख्वाः स्वय्गु
इच्छा सुला च्वंगु दु । न्ह्यागुसां जि नं हथाय् चाया वल, तुरन्त व्वयाः
हे नेपाः थ्यंकः वय् मास्ति वल । तर ल्याः चाः याय् माल, ज्या-खँ
लःलहाय् मोल, बल्ल निला लिपा छह पासाया बज्जाःत नाप नेपाः वय्गु
बदोवस्त याना ।

वया । जिमित नं अवुयात थें च्यानाः ख्यः तक पालाकतःपि व
इष्टमित्रपिसं तःवल । अन नं पालाया पासापिनि नुगः मछि, ख्वा ख्यूसे
ख्यूसे च्वं । गुलिसिनं अमि छें छें वीगु पौ विल । गुलिसिनं छुं दुविस्तागु
वुखँ व छें कला पिन्त वीगु कस्यालि नं विल । फुकं बांलाक, लुमंक
तया ।

जिपि सल गयाः भचा वय् धुं बले भेपुं गुम्वा खने दत, मानो
ताचो संकाः जिमित बेला बिया च्वं थें । यानं हे छको नमस्कार यानाः
सल न्हाका । वं न्यूतं बाःगु ल्हँया पहाडे चाय् ल्हँयाहा तःधिकःसे

च्वंहा भगवान् वः छह दु । अतं गां गां पुलाः लहासा खुसि-सिथं सिथं
यातां प्यातां खाया च्वंगु तिसिमा व वाउंसे वाउंसे च्वंक पिना तःगु
कय्गू, बकुलाः आदिथा वुँ स्वस्वं छुसू थ्यन । अनं स्यामे (सियांगु
नांचाय् च्वनाः ब्रह्मपुत्र खुसि छिनाः छगू फैं, च्यांप्रा यक दुगु गामे बाय्
च्वना । हानं खुसि सिथं सिथं वयाः न्याफसो पाः गयाः थंथ्यंकाः लिफः
स्वयां याने पोतला व भयाकुरी गुम्बा खने दत । अले निगू गुम्बायातं
भसुकाः निथु छायाः पःया काहाँ वया । मनूत जुयाः जक दया च्वंगु व
लैय् चिचीचा जाःगु पर्वचात यक दु, थाय् थासे च्वापु नं खने दु ।
उकिं अन सुलचं मदय्क मगाः ।

पःया पुखू तस्सकं तःधं । ह्याकिं ह्याकिमं यानाः थपाय् हाकः
सीमदु । सिथं सिथं लँ । दुंगाया च्वनाः च्वनाः न्या लाइपिं माभित्त
चाःचाः हिला च्वनिगु । अन लः हँय्त जक मखु मेमेपिं रङ्गरङ्गयापिं
लः-भंगःत व भीसं छको निको जक आकाशे माःहना वःगु खनिपिं
कलःखात नं अन पुखू सिथे यक यक खनेदु ।

अनं भचा वय्व भारा गलि । निखें ल्वहँःया नांगा-गुँ । दथुइ
खुसि । जःखः पहाडे हःहः दुथाय् खुँत मुला च्वनिगु भय । उकिं अन
थ्येवातसें तुपः थनाः ज्वना वइगु । अन दथ्वी छवाय् च्वने माः । अन
अंग्रेजी डाकघर व तारघर नं दु । १०१६० खाति छेँ दुगु गां छगू दु ।
सँय् सरकारया छगू भोम् नं दु ।

अनं वयाः मेगु छगू लँय् लाःगू तःधंगु थाय् - ग्याचि । जि छगू
ज्या हे दयाः अन वना । सँय् ल्हय्कुं (अडा) व गुम्बा ला दइगु हे जुल,
अंग्रेजी अडा व मी गोरखा अडा नं दु । डाकघर तारघर नं दु । अज्ज
मी नेवाःतय् छगू पाला नं दु । लहासाय् थें बखत बखते नाय्खि
थाय्गु व नखः हनेगु चलन नं दु हँ । जि नख बले मलाःगुछिं छुँ स्वय्
मखं । मेगु भारतं वइगु मालताल आपाः अन हे जुकाः ह्य् माःगुलि
अन वकु कुबुया त पि ताथ्ये व पोंगाचात भो भो वया च्वंगु खनेदु ।

उकिं साकं नं यक दु । वरु अन फय् वय् यःगुलि सुथ न्हापां हे पसः
चाय्का तइगु व बान्हि पुल धाय्व हे पसः-पिसः तिनाः भयाले गोयू
तयाः पासा पासा मुनाः गफ सफ याना च्वनिगु बा हिला च्वनिगु ।

अनं निगू स्वंगू सँय्गां पुलाः फिखाछेँ थ्यन । अन छ्वालि
निबालि वः हँ । उकिं अनया तत गोगु छ्या चप्पा साप हे साः । सँध्यगू
व बकुलाः नं यक खनेदु । अन गांगामं व्यापार यावइपिं दुइवात यक वः,
उकिं मी नेवाःतय्गु कोथि, पसः ज्यासः, नं त गूमछि दु । हानं भीगु
अडा नं दु । कुनी थें अन नं हाकीम दिइ । अन नं फय् वय् यःगुलि
अथे हे न्हापानं पसः चाय्काः न्हापानं हे तीगु । अन नेपा पदःगु देगः
चीमाः दु, गुम्बा दु । उकी थाय् थासे गोध्वाँय् स्वाना तःगु, ताचो
व्यय्का तःगु दु । मैत्रेय तथागतया छगः देगः । छचा खेरं छेँ दय्काः
दथुइ वः । जम्मा ७ पु स्वान्हे दु, उकी १५ पु स्वान्हे थाहाँ वनेव भगवा-
नया ख्वाः चूलाइगु व मेगु हानं २ पु स्वान्हे थाहा वनेवतिनि छ्यँले
च्वंगु चीमाः चूलाइ । तँतँ पत्ति गुम्बा । घेलुंत च्वनाः पाठ पूजा-धर्म
याना च्वनिगु । अनसं पौभाः वइगु अंगः धाय् ला पक्खाः धाय्
छगः दु, उकी मैत्रेय बोधिसत्वयागु कारचीपी पौभाः वइगु । व ह
निं मी तिनि खयःया घंटाघर पाय् जाः जुइ ।

थथे स्वय्गु न्यनेगु यक दुगु थाय् जुया नं नेपाः थ्यंके हथाय्
चाःगुलिं अन चच्छि हे जक च्वना वया । वय्त अन नं फलेपालाया
थकालिं तिम्वि याकेगु चलन दु खनी । पाहाँ-पिहिं यानाः त्वकु-पो
२३ पो नं ज्वंका हल ।

अनं छगू गामे छवाय् च्वनाः जःखः कं भाः थें छमा निमा
सिमाचात दुगु खुसि व्वाना च्वंगु स्वस्वं थः सलयात नं अथे हे व्वाकेभनं
वया । भचा जक वय् धुनेवं पाः गय् माल । सल गन व्वाय् फइ ।
बुलुहँ ल्वहँयागु ह्याउँपाः गयाः च्वय् मध्यवं बाय् कन्हेखुनु न्हापानं
ह्यंगु पाः गयाः च्वय् थ्यनेव सल त्व ताः कच्चा वयाः बाय् थ्यंका ।

कन्हैखुनु साक्या ध्यन । पहाड च्वय् दय्का तःगु गुम्बा । अन लामाया तखत हे तःले महिष सम्बर दुगु धाइ । अन कंच्यूर-तंज्यूर व मेमेगु सफू नं यक यक दुगु सफू क्वथा दु । छाय् धाःसा अन तिचवती सफू थाइगु पारकं (प्रेस) दु । छगू छगू सफूया थासा छखा छखा छेँ पंचिना तःगु । पसः, वजार, थोम्-थीम् नं दु । यले बरेजुपिनिगु ज्यासः पसः नं दु ।

अनं निवाय् स्ववाय् वयाः धिप्री मैदान ध्यन । गनं गनं खुसि नं दु । सल गयाः हे खुसि छीगु । अन सँय् सरकारया मोमया नापं व भिखां न्हाय् मदुगु ख्यःया दथुइ गुम्बा, ज्यासः बरेत व गनं गनं खुसिचाया सिथे सिथे छमा व क छेमा नं वाउँक खने दु । अन निवाय् च्वने माः ।

अनं लहासाया लँय् दकले सकले ग्यानापुगु, ज्यूसेज्यूसे ज्वीक दुःख सी योगु थाय् लंकोर पाः । जीवने दकले दुःख सी नंगु हे अन । उकिं हे ज्वी लहासा वनिपिन्त साइते मलाइ धकाः घौ तयाः सगं विया हइगु व थःथितिपिसं नापं सकसिनं सगं वी माय्का तःगु । मी छस मन् स्वाय्त गुलिसिगु भितुना माःगु ! गुगु मीगु समाजया सभ्यताया चिं खः ।

अथे ला जिमिसं नं अनयात माः धकाः लाभा, लभू, अय्लाः गाक्क ज्वना वयागु दु । थ्येवातसें छँगूया ह्विचाय् थ्वं थना हःगु दु । सुथ न्ह पातं जक मखु फसे लाइ धकाः चान्हे बाचाती हे थना हःगु । गनं गां बा छेँ खने दुगु मखु । मिच्याकाः च्या दाय्का च्वने लाःगु मखु । व हे थ्वय् चप्पा वालाः नय् माःगु । विषयागु फसं कयाः कपाः स्याइगु द हे दनि, हानं पाः गगं थपाय्चो स्येँ-स्येँ वइगु कि सास हे चव्वुइ थें ज्वीगु । विचरा सलत नं अथे हे पवीं पवीं यानाः वया च्वंगु दु स्वय् हे कन्ना चायापुसे च्वं । तर न्हाक्व हे दुःख कष्ट जूसां छंगु ख्वाः स्वय्गु आशां जितः ह्येका हया च्वंगु दु । उकिं छं नेपाः ध्यनेव थ्व फुक

दुःख लोमंक मयना याइ तिमि भयागु खँ वःकयाः बल्ल पाः च्वय् ध्यंका ।

अनं सासः हे मफिसे हतपतं क्वहाँ वयां फय् मं मं तच्चो जुया वल । ख्वाले कि ख्वाले फसं कल । माकःतुपुलि गलबन्दी हित्तु हिना नं मुत्ताः दुगु मखु । थ्येवात 'हुर वल थें' (ख्वाउँ फय्) धकाः हाळा हल, जि ला हंसं थाय् तोतल, अयनं हानं छको छ नाप लाय्गु आशां सुप्रेम सार्थवाह, सिंह सार्थवाहपिनिगु बाखं लुमंकाः जि नं करुणामय लुमंके धुन, तारेमाम् नांकाय् धुन । थ्येवातसें जिमित सलम्हं क्वकयाः वय् भोसुकल, थःपि नं भोसुन । य ने फसं जिमित फिया फांफां फाय्कां च्वन । हानं व फुक च्वत्तक त्वका नं यना च्वन । अथे फि वीका यनि-बले जिमित नं वं ल्यहेँ थनि थें थनि थें च्वं । भाग्यं फसं हे फय्यात वीके यंकु थें ह्वीं ह्वीं सः वय्क न्हायना ववँ पलख लिपा ताय् मदय्क तापाना वन । अले 'सोता, फिदा, नुनु, याकन नु, भाग्य जुल' धकाः उर्वमे सल गय्काः व्वाके हल । बल्ल बल्ल पाःक्वय् फँगले थ्यंबले मानो जिपिं स्वर्गे थ्यंथें जुल । फय् नं मवल । दमदिम नं तन । ग्याःगुलि हंसं धाया च्वंगु दु । अन हे वासं च्वना । अन नय्बुं च्या दाय्काः मामं थें विचाः यानाः क्वाक्क चप्पा नकुबले व चप्पा साःगु वयान यानां साध्य मजू । छ बाहाय् पिका खुनु न्हिने छिमिथाय् क्वथाय् तयाः पाहाँ याःगु सवाः लुमंसे वः ।

का, भचा लिपा ला च्वापु गाः । न्हापां ला वा वल धकाः च्वनागु, लिपा वा तन फुति जुजुं पवात्त पवात्त कपाय् थें च्वापु जुया वल । थ्व च्वापु न्हापा फय् वय् न्हाः गाना ब्यूगु जूसा जिपिं नेपाः ध्यनिगु हे मखु सकलें अन हे समाधी च्वना छइगु ज्वी । भाग्यं धाय् ला छंगु ख्वाः स्वय्गु इच्छां त्याकुगु धाय् मय्गु जि मसी, अथे हे मेपि नं सुं मसी । चच्चि अन लुमुक यनाः नेपाः म्दंका च्वना । कन्हैखुनु सकस्यां न्हाः वयां च्वनतिनि नय्बुं च्या त्वनेगु मखुला फिदा, धकाः

ध्वंसैलि तिति दनाः च्या-चि त्वनाः अनं वया । लँ हिमालय कंकं वय
माःगुलि च्वापुइ निभालं कल कि च्वापु च्वलः वय् यः हँ, उकि उखुनु नं
जिपि हथाय् चाः । सल नं कुती बाय् ध्यनिन धया थें भचा च्वाय् वः ।

अनं जिपि सोनाम् गुम्वाय् देके वना । अन आपाः छँ १ तँ
जक जाःगु गुंवाया द्यः दुगु छँ जक ३ तँ जाः । घेलुं त नं दु । वय्
मेमेगु गुम्वाय् थें सिपुति सिया तःगु व अंगले नं न्यंक द्यः च्वया
तःगु दु । अन खाता छायाः धुं देवा च्वाकाः लुइंक द्यः दर्शन याना ।

अनं वयाः कुति थ्यंवेले जिपि छँ थ्यं थें जुल । ख नं अन सँदे हे
तितिसां नेपाः पहः वय् धुंकल । नेपाः तुपुलि व पुतु दुगु भाँत फ्यूपि
तामाङ्ग भाय् व खय् भाय् ल्हाइपि भल्यात थोथो खनेदु । नेवाःतय्
नं गुलिस्थां लं सुरुवाः, गुलिस्थां भाँत सुरुवाः फिनाः नेवाः भाय् नं
ल्हाना जूगु ताःवेले मी नेपा गाले चाःहिला च्वना थें च्वैन । उकि जिमि
मिखा उवे थुवे मद्यक चाःहिल । तर मिखां चाःचाः हिलाः छत्वाः
नित्वाः पर्सि लु हे ल्वीकुसां धुलं धालं गयाः भ्वीसे हाकुसे च्वंगु पिलाक
खने द्यक घय् सुया तःगु तामांनीतय्गु जक । अले मिखाया गय् च्वंक
आशां घात धकाः ऋसुकालं कना विल ।

जिपि हथाय् चायां लु याय्, छगू ला निन्हु स्वन्हु न्ह्यः कुती नं
च्वापु गाःगुलि लँ मचाया च्वंगु, मेगु थ्येवातय्के बकु बुभे याना कयाः
नेपाःया भल्यात बन्दोबस्त याय् साःगु । उकि मंमदु मंमदु ३४ न्हु व
कुति गाले च्वने हे माल । धोविया हथाय् ज्वीवं चान्हे निभाः त्वइ
मखु थें ।

बल बल ४ न्हु दुखुनु सकोया भलया नायो थ्यंकः बल । भलया
मालाः बकु फुक इना विल । अले जिपि नं अन कुति-थकालियाके बेडा
कयाः तुति तप्यंक न्यासि वया । धातथें न्हापा ८ न्हु मझि वीगु चाबहि
४ न्हुं हे थ्यंका ।

जिपि अन थ्यंवेले लँस्वः वःपि वया च्वने बुंकुगु । मां जां

बखिमाः वय् ज्यूगु मखु छ नं मवः । अन पुलां वंजाःत व दाजु-किजा,
इष्टमित्रपि ८१० छ ति दु । मसला-मिसला विल, कुशलवार्ता यानाः
अनं जिपि वया । बहनी छँ थ्यंवेले तोप हे तल । जि खनेव मां खल ।
मांया व तुयू पर्सि खंवेले जि नं सः हँहँ पनाः मिखा ललः धायाः खय्
मास्ति बल । हानं चाकः मकलं छको स्वया तर मिखां मागु वस्तु
ल्वीके मफयाः अः खः खयि जकं मुंका हल । अले मांयात भागि
यानाकथं जि नं खया हे विया । जितः भागि याःवःपि छ व वय्हेँचा
नं खल । गथि अःखः ज्वीयो ! थ्यंकः वयाः सकलं लय्ताय्गु थासे
अथे सीगु छँ थें खय् साःगु । सकसिनं मी भोद्धिसितं वल्ल बल
होकाः लिहाँ वन ।

हानं अबु मदयाः मी न्हाक नुगः मझिसां जि ल्हासं थ्यंया सगं
ज्वनाः लँस्वः वय् मखंगुलि सकलं धया थें थःथितिपिसं गंक गंक नं स्वः
वयां त्वःतल । उकि अमित मूसी नं लंपाः तयाः हे तय्के छय् माल । तर
अबुया थें जि मूसी तय्के छय् मा धकाः ल्हासां नंबु तया हयागु
मदु । उकि मझि मगाःपिन्त नंबुया पलेसा कस्मीरा न्यानाः तय् माल,
तया छया ।

न्हागुसां नेपाः थ्यंस्थंलि नेवाः ज्वी हे माल । गोन्हुचां मदवं
पीवातका ध्यवा पृलाः पूजि कया हल । जि नी च्वना । नापं छ व वय्हेँ
नं नी च्वनेत पासा च्वंपि । थुकी छगू न्हिले मास्ति वइपुगु खँ लु धाःसा
नी व्यंके धुंकाः तिति छ थ्यने हइ धकाः च्वनां, नी च्वनेत नुचिउखुनु
हे थ्यने हल । अथे सँय् तितिहा, पू च्वनाः नी ज्वी मानिह जि नाप
घने धुंकुवेले छ नं ला समीनी जुल मखुला ? अले जि नापं अबुसं-
वहलाः च्वनाः छ नं शुद्ध ज्वीगु जुसैलि मिसात नं नापं ल्हासा छया
हया तःसा गुलि ज्यूगु । सँय्तय् थें नापं च्वनाः व्यापार यानाः न्हाक
दःसां दक मुनाः नेपाः का हय् दइगु मखुला ? लु खः लु खः पुलांपिनिगु
बुद्धि । जि ला बांलाक भ्वीके मफु ।

अबे हे छन्दु भाषां निन्दु भाषां मेगु निलाति बंबले अबुया खुला लल । शुद्ध ताहां लाःगुलि पाहाँ वनेगु जक खुला मब्बसे सकसिनं “हु थें दुगुयात ल्वय्क ज्या यात” धकाः हाइ हाइ याक मांया मन लुदंक दकिलां तःजिक पाहाँ वना भव्य यात ।

भव्यबले ज्याय् च्वंरःपिं वंजाःनीतय् नग मझि ख्वाः खनाः अमिसं छुं मधाःसां जि भसंक वन —अभि भाःतपिं लहासाय् च्वना च्वंगु खुदं फ्वीन । उकिं भव्य सिधय्व हे हीके छय्पिं वंजा त माले धुन । छह ला पुला नेवाः हे जुल, मेपिं निह जक न्हूपिं कोछिना । अज्याःबले लाक्क लहासां पौ छपौ डाकं थ्यंकः बल । उकी च्वया तल —

“सँयतय् स्थोले लाय्कुली) कुना तवह्म स्यापां ग्याबु बिसि वयाव गोरखा अडास सरन बल । वकील कपटान साहेवन नेपालस च्वयाव मुहा यायगु धक विचार यानाव च्वन तिनि मामि (सिपाही) व अफीसरत हूल वयाव गोरखा अडा घेरे यानाव तले थाक्चव्य् थ्यंक नं स्वाहाने छुनाव थाहाँ वनाव स्यापां ग्याबु लुटय यानाव यंकल । उकिं सकलेन ग्यानाव पाकोरस सकस्यां पपल तित । निन्दु लिपा पाकोर लँस पसल दुपिं सकलेन ननिस्याकस (थानाय्) वा धक काक्यु (उदि) न्यकुसां नेवालत सुं मवं । सँयत वंपिन्त ‘स्यापां ग्याबु सँय रैति जूया निमित्तिन गोरखा अडास बिसि वना च्वंहा ज्वनाव यंगु । सँय सरकार व गोरखा सरकारया विरोध छुं जूगु मखु । उकिं पाकोर लँस कोथि थोम् पसल बांलाक चायकाव न्हापा थें च्वव’ धक न्यंका हल धाल । उकिं आव ला पसल भति भति चायकु दत, अध्यनं सकलेन ग्याक न्हापाया थें बानलाक बन्द व्यापार मज्जनि । हानं लिपा छु ज्जी गुगु ज्वी धाय फुगु मखु । साहुया सम्पत्ति जिमिसेन विचाल याय मफयाव हिना मिना जुइकाव च्वने माल धालसा जिमित बानलाइ मखु । उकिं थ्व फुक बनवस्त यायत साहु हे छय् मभासे जी मखु ।”

अले जि व याय् थ्व याय् मदयाः तस्सकं हथाय् चाल —

“उलिमझि सर्वे अन तिनि !” उकिं व्वां वनाः वंजाःत छय्त् जोशीयाके साइत कया हया । न्हापां ला वंजाःत थी हे मदु । लिपा जि नं वयगु धासंलि तिनि बल वयगु कोछित । तर जैशीकथाय् न्द्वनं “आः ला लँ हे मचाःनि वने जी मखुनि । हानं च्यान्हु फिन्हु त्वाः छको वा ?” धकाः धया हल ।

जि, गबले लहासा वनेगु ज्वी धकाः विचाः यानां च्वना तिनि चीफ साहेव भीमशम्शेरया टंगाल दरवारे देरो दक धया थें लहासा साहुपिन्त मुंकल । जि नं वना । भैंवैठके कुति, केरुं, ग्यांचि, फिलाछे आदि थाय्या नेवाः साहुपिं थोचा-थोचा मुनाः खँ लहाना च्वन । सुच्चा सर्दारपिसं स.स्यूपिं साहु साहुपिके गन गन बाय् च्वनेगु थाय् दु, गन गन नय् च्वनेगु वस्तु काय्गु दु, गुखें गुखें वंसा सत्तिक थ्यं इत्यादि खँ न्यना च्वन । जि छुं स्यूगु मखु, अमि खँ लहाःगु न्यना जक च्वना । लिपा सत्तिसं “हानं माल धाःसा सःते” धकाः बेला बिया हल । जंगबहादुर महाराजया पाले थें सुनां सुनां छु छु ग्वाहालि याय्फु धकाः मन्यं उकिं अबले तुंछें साहुपिसं खुला तक पलटनयात लही धाःथें सुनानं भाला काः नं मदुगुलि तुंछें साहुया मचातसे थें लुँया कलिं नं सुनानं न्हाय् मखं ।

उथाय् कंफुकोट, तोसाखानाया जक लिमलाःगु मखु, सीलखाना, बारुखाना, धानगोदाम इत्यादिया नं लहाःदी मदु । मानो समे-पञ्चादां न्याः थें फुक थासे माल सामान ज्वरे याना च्वंगु दु, दु । जि ला छको-निको ग्यास्यहेँ नं वः—खइला वनां ! तर थःगु न्हय्पुस्तां हि चःति हाय्काः कमाय् याना त.गु सर्वे ‘जूजू थे ज्वीका, स्वाय्से’ धकाः नं धाय् मफुत । छगु ला अबले जिः नेप ले प्युंका तय्गु ‘या’ मदु थें च्वन । उकीसनं वंजाःत जक वय्त् माने हे मज्जबले वय् हे माल । लँ चाल धयागु सीव हे हानं लहासा वया, व नं न्हापाया थें कुतिया लं मखु, कालिम्पोंग जुनाः ।

छको ला लँया हूल कूठ व रेलया घरघर सःया नापं सीटीया तीसलं थाराकनु न्हू। अध्यनं सिलगरी रेलं कडां वय्वं नेरालीत पुचः पुचः खंबले भचा मन याउँसे च्वन। कालिम्पोङ्ग थ्यंखले ला नेपाः हे लिथ्यन धा सां जिल। अज्याःगु हे पर्वः, अज्याःगु हे स्वांमा-सिमा, अज्या गु हे बोलि बचन, छह निह्य ला म्नी थ.थितिपिनं दुगु जुया च्वन। अन हे छहसिथाय् कोथो बाय् च्वनाः कन्हेखुनु हे ताथ्ये व दोबस्त यानाः कंसखुनु अनं वया। अन नं ननेवाःतय् त्वां प्रा पुइकेगु चलन दु खनी। वहि पुइकाःनिह्य वंजाःतय् त्वां प्रा पुइकां तोतल।

लँ, कुतिया लँ थेंज्या गु हे, गनं पर्वःया जंजं वय्गु गनं पाखं थाहाँ काहाँ ज्वीगु। पेदोंग, जलेला, धोमो, स्यासिमा जुकाः खुन्हु दुखुनु फारी थ्यन। तर फारि धाःगु न्ह्याइपुगु थाय् मखु। तस्सकं चिकुगुलिं छुं अन्न मसः। छु सलकि अलछिन ज्वी धाइगु थाय्। छु ह्लाः छुमा घाँय् थें लयाः सलतय् वा ताथ्येतय् नकइगु। न्ह्यागुसां थ्व फारि ग्याँचि, मिखाछे व लहासा आदिया लँपु लाःगुलिं अन नेवाःत व सँय् वंजाःतय् वकु-विकु थतकत याय्त मनूत च्वना च्वंगु दु। छगू निगू ज्यासः-पसः नं दु। अंग्रेजी डाकघर व तारघर नं दु। अनं निवा-य्ति स्वांमा सिमा छुं मदुगु धुइना धाःगु फिइय् बाय् च्वनेमाः। तापाक न्ह्याथाय् स्वःसां मेगु छुं खने दुगु मखु, च्वापुया च्वापु जक खनेदु। अनं भारा गलि पुलेव तिनि भचा मिखा याउँसे च्वंक स्वांमा-सिमा व वाउँसे च्वंक वुं खने दइगु। गुगु लहासा थ्यंकं दु धाय् माः। थाय् थासे लँया च्वय् च्वय् अंग्रेज लडाइवले सँय्तसे दय्का तःगु भोम् (किला) नं खनेदु।

अथे ला मै, जिमित च्यानालयः तक लँस्वः व हे वल। तर न्ह्यापा न्ह्यापाया थें न्ह्याइपु मजू सकस्यां ख्वाः चक्कं मजू। उखे थुखेया छगू निगू कुशलवार्ता यानाः जिपि लहासादे दुहाँ वया।

धाथें ला मै, उथाय् तक लहासां सुं मनू पित छ्या महःनि

खनी, दुहाँ व पित्त जक न्ह्याथासं वःसां दुत कया च्वंगु दु। हानं गुम्बा गुम्बाया बरेत, चितुंत (भिक्षु अधिकारी) कोता-कोतातय् नं सुयां ल्वापु याय् ह्याः-मयोसां माःमा गु लडाइया सामान दुनें दुनें ज्वरे नं यानां च्वंगु दु धाल।

धाथेंया खँ जा भीसं लहासाय् अधिकार कया तःगु स्वमफाःपिं सुं विदेशी शक्ति 'छिमिगु देशे थ्व गोरखातय् छाय् थुलिमछि अधिकार' धकाः थनया निह्य प्यह्य हारांहारापिं अफीसरतय्त छुनाः छुनाः तंस्वेके बिया तःगु दु खनी। अमिसं लहासाय् दक नेवाःतय्त स्यानाः दक धन-माल लुटे याना काय्गु धकाः ग्वसाः ग्वया तःगुलिं भीसं थ पिनि दुधन सिसितइ धकाः न्ह्यापा व्यापारीतय्त उर्दि ब्यूवले सुनानं थःपिनि सर्वे गनं सिसि तय् मडु धकाः न्यंका ह गु जुयाच्वन। थ्व खँ ४६ ह्य नेवाःतय् भरे वय पार याना च्वंपिं नेवाःतय्त दां स्याय् बिया सेका १८ तक नं व्याज नया च्वंपिं सँय्तय् थवं थः "थज्याःपिं सोभापिं नेवाःतय्त गय् स्यानाः सर्वे काय्गु!" धकाः खँ लहाःगु भी हे वंजा छहस्यां ताःगु हँ, उकिं हे ग्यानाः जितः अथे पौ च्वया हःगु खनी।

न्ह्यागुसां जिपि लहासा थ्यसेनिसें थन छुं अपाय्चो तःधंगु गडबड मजू। नयाः त्वनाः ग्याः थें चिकु थें व्यापार नं यानां च्वना।

छन्हु लाय्कुली वकील साहेवं दशथकालिपिं मुंकाः लामाजुं द्रंगुली घाँथाः स्वीवा (क्षमा पवनेगु) याःगुलिं म्नी नेपालया जुजुं क्षमादान बियाः मिले जूगु तार थ्यन धकाः न्यंका हया दिल। अले छु मानि, गोरखा अडाय् धूमधाम भवानी पूजा-भजन इत्यादि जुल। पालाय् नं पाला आज्जु पूजा यानाः दापा-दिपा थानाः लय्ता भव्य न्याल।

थथे मेल मिलाप जुसंलि नेवाःतय् थः थः सँय् इष्ट मित्रपिं नं लय्तायाः अमिके काय् मानिगु नेवाःतय्गु दां जक बिया हःगु मखु, न्ह्यापा थें माःगु तक ग्वाहालि याय्, बांलाक ज्या या धकाः भलसा

नं बिया हल ।

उगु उगु हे वखते तंय्, च्वाभो, पाक्पा (छेंगू) नं एकहट्टी जुयाः अंग्रेजी कंपनी थिके जुजुं वःगु व उथाय् हे छारुंकाजियात काजि दर्जा ककयाः भयासाः दर्जाय् तयाः, जागीरदारतसें खेप व्यापार याय् मदु धकाः नं उर्दि विल । उर्कि उथाय् कोता कोतात इष्टमित्र दुपि नेवाःतय् नामं आपाः खेप चले जुल । भी नं व दैय् यक हे व्यापार जुल धाय् माल, चप्पा नतले हे लिमलाः उर्कि मेगु छुं खं विचाः याय् मलाः ।

थ्व हे व्यापारया हूल कूले ६ हल्ल पोतला लामाया हल स्वथना तःगु लुंयागु चीभाःया ज्वारात-तिसा खुयाः म्यूह चितुंयात वेस्या मिसा छह नापं ज्वना यंकाः केले याःवले वं लांलां न्हवनिसें आपालं ज्वारात खुयाः नेवाः साहुतय् व सैय् बंजातय् नं मियागु दु धकाः प्वःगुलि उथाय् ज्वारात धाल धाय् व सुनानं थी मछालाः बजारे ज्वारातया भाः हे मदया च्वंगु । अज्याःवले गतं गतं छजो हीराया टप मी हल । स्वय् हे लुइनापुसे मिच्याक थो । अट यांनाः व २०० पाँय्ति दां वंगु टप ११० पाँय् दामं न्याना । छन्हु जि सुं-सां मदुवले बनेकथाय् च्वनाः व टप पुत्तु श्रीकाः आइंलास तयाः स्वया च्वना - नोर्बु धोलना च्यामकुस्योयात (कोतानी) बांलाःगु टप छजो धया च्वंगु, थ्व टप वं खन धा.सा २५० पाँय् धाःसां पुलि ।

अबले हे मनू छह स्वान्हें थाहाँ वःगुलि कावाक व टप गमे दि जक दिका, न्हःनेसं पेमाधोलमाया म्हाय् वास्याहाँ न्हिल—सोतालाया लु स्वथना दियागु ? स्वय् ।

जि “छुं मखु !” धयागुलि जि क्यनि मखुत धया थें ‘खै, छुं मखु, जि ज्वाह थिक खनागु छको ला क्यना दिसं स्वय् !’ धयाकथं जिगु मुले चुयाः गमे लहाः छ्याः टप बत्ता काय् लाकल । जि ह-ह्रि हे गरखेसे च्वनाः छन्त बाहाय् तयाः ४५ ला लिपा छ वःखुनु बहनी नं

न्हापाया थें हे छ खाता कय् तुं यने त्यंगुलि जि तीजक छगु लहाः ज्वनाः सालाकयावले वय्थे मवय्थे यानाः जिगु ह्यय् थीक खाताय् फेत्तू वःगु लुमंसे वल । अले जि भवा लिचिला च्वना ।

वं बत्ता चाय्काः धाल—गुलि वंगु टप थ्व सोता ?

वयात जि छको स्वया । वया मिखा व हे टपे जक । स्वय् हे व टपं सुयाः थत लवःगु, बांलाःगु खना च्वं थें । अय्नं जि धया—थ्व टप मीगु मखु, च्यामकुस्यो छहस्यात व्यु धकाः छह छोंपुं (सैय् व्यापारी) नं बिया थकुगु ।

वं व खं ह्येकथं धाःगु थें यानाः धाल—अथे धया दीमते सोता, थ्व टप छजो जितः बिया दिसं, वरु गुलि माः माक्व कया दिसं ।

जि धया—२०० दोर्जे (पाँय्, ३३३॥ सैय् मोहया) व्यूसां बी मज्यू भमुला, करपनिगु वस्तु ।

वं भवा ख्वाः च्याकाः बेकोमिखां स्वत—भ्याय्वुत (नेवा.त) धयापि थथे हे का, सिति काय् धयागु मखु, माक्व कया दिसं रे, थ्व टप छजो जितः ययाः मखुला व !

रखुनु वं भीगु बाकिगु दां बीत ज्वना वःगु दु थें, मिखा फुति याना थें याकावालं छकले दय्क सैय्नोद् पिकयाः “का, माक्व कयादिसं, सच्छि दोर्जे दु” धकाः न्हःने तया विल ।

जि लिसः बीत विचाः यानां च्वना तिनि, वं स्वय् मगाः धाल धया थें हाकनं लिसा काल—का मगाःसां मेगु १० गूदोर्जे दां ८१० न्हु त्वाः छिगु मेगु दांया नापं हया बी, जिल ला ?

जिगु दोछि-भिन्यासः कंपनी लवः नय्गु आशाय् प्वं दाल । अय्नं ज्यूसा ह्येका काय् धकाः “मेगु आमया सिवे बांलाःगु छजो टप हइगु दनि व कारे भमुला” धयाया माने जूगु हे मखु, छय् संका च्वन । हानं जि ह्येका—स्व भमुला, आम हे काय्गु जूसां न्हःने टप मखन धाय् व छोंपुं नं गुलि धाइ, गुलि धाइ, उर्कि थौं चच्छि नि तोता थकि,

कन्हे मू कोछिना तय् ।

“का, का, भ्याय्वुत भयापि न्याय्व दःसां मगाःपि अगोस्ति ।
मेगु २० गू दोर्जे दां हयाबी, हाला च्वने मते” धकाः वत्ता याकवाले
तयाः जि मेगु छुं लिसः हे बी मळाकं सरासर वन । जि अथे आताहाँ
स्वया च्वना । न छुं धाय् फु, न लाकः वने हे फु । अथे ला थन याक-
वाले थ्यं बालाः लाका काःसां छुं ल्याः दुगु मखु । लाःसा वं नं अथे
हे लाके बी धकाः मती तःगु ला छु छु । छाय् धाःसा स्वान्हे क्वाहाँ
वनेत छको लिफः स्वयाः ‘दिसं न्है मिदा !’ धकाः मुसुक् न्हिलाः लुकु-
वित । अले जितः तिक्क मिन — जि नेपाः काहाँ वयाः सेंगु देके वनावले
२३ ह्य मिसातसें मझाःमिखां स्वःगु व जि अमि पाखे मिखा मव्वयागुलि
अमिसं भचा आशां द्याः थें यानाः “गपाय्चो तिन्हूगु व !” धया थें
याना वंगु । ख नं उथाय् तक जा जि अमित वास्ता तय् माःगु अवस्था
नं मखुनि, छन्त जि न्हापा ल्हासा वय् न्हाःयाह्य थें हे खना च्वनागु
तिनि । तर अमिसं स्वय् न्हापा न्हापा छ थ छेँ चाहिना च्वंवले ४५
लाया दुने जात्रा-जित्राय् वा देके-दीके वनेवले जि गिजे यानाः स्वः थें स्वइ
धकाः च्वंगु ज्वी । उथाय् ला जि ल्याय्छाचा तिनि, यांथ्यां मस्यूनि ।
उकीसनं थौं कन्हेयापि मचातय् थें आखः व्वनेगुली अथवा मेगु छुं
ज्याय्-खँय् मन छय् माःगु मखुगुलि जिगु मन भचा मिसातय् पाखे जक
व्वाना च्वंगु बखत तिनि ।

न्हागु थजु वं जितः भचा मझिका थकल — जीवनया लं मेगु नं
दु धयाथें क्यना थकल । अले जिगु मने अनेनेगु खँ लुया वल — धात्यें वं
जितः अथे मिदा धकाः छाय् न्हिलाः स्वया वंगु ! न्हापा ला अथे गबलें
मधाः । ला.सा वया जि य हे यल ला ! जि नं व टप लाकः हे वने
माःगु थें ! धात्येंगु खँ सीके दइगु । ख नं सकलें धया थें नेवाःतसें थन
कलाः तथा तःगु दु, गुलिस्यां सीक, गुलिस्यां मसीक पाःगु थुलि हे जक ।
तर मै, जि मिजं जुया नं, मिजंत धयापि भवः थें धकाः धया तःगु दया

नं ५ दँ तक जि नैया कयतां चिना च्वना । छाय् धाःसा जि न्हिन्हि छ
लुमं, छं चा-चच्छि बाय्माल धाय्व खाः ज्याइगु लुमं, हानं सिंहसार्थ-
वाहया बाखं नं लुमं — थ्व ल्हासा देशे लसित यक दु धाःगु । उकिं व
न्यादँ ला जि थन दक मिसात धात्यें लसिचा-लसिचात थें हे भाःपा
च्वना, खना च्वना । ख नं छद्म निह्य नेवाःतय् थनया मिसातसें दुःख
नं बिउगु जि खना । हानं हिन्दुस्ताने ग्वाःपसः तथा च्वनिपि मिस्त दु थें
थन नं मोजा-पञ्जा थाना वीपि मिस्त मदुगु मखु । तर संसारे-अःखः
न्याःखः दुगु सन्सारे मभिपि जक मखु द्यः थें द्यः थें भिपि मिसात नं
थन यक यक दुगु जुया च्वन । होकागु मखु मै, मी हे पालाया छद्म
पासायात मिसा तल धकाः सीकाः साहुं पितिना हःवले वया कलातं हे
कत्ताना, माःगु तक छेँ-ज्या याना नं उखें थुखें मालताल कयाहयाः व्यापार
याकाः तुति च्वीकां तोतल । लिपा जूवले व पासाया कलकत्तां हया तःगु
मालताल न्हागु कथाया नं बाना जुया वन । अथे हे छद्म मेह्य नेवाःया
साहुं क्यनाः कथा हे चाय्के सफया च्वंवले वया कलातं साहु साहुतय्-
थाय् वनाः विन्ति भाव यानाः थोम पसः तथाः २३ दँया भित्रे साहु
फुक पुला नं थगु नं कथा चाय्कां तोतल । थुकथं यक हे समीनीतसें
नेवाःतय् कत्तानाः कःधानाः तुति च्वीका तःगु दु । तर अज्याःपि
मिसातय् मी नेवाःतसें बांलाक थः नालाः विचाः याना मतः । ला.लाः
थें बाय्थः प्वाय्थः यानाः लँय् लुगु लँय् सं तन धया थें नेपाः वय् त्येव
वांछया थकइगु । न छुं नय्त्वनेगु वन्दोवस्त याना थके माः, न थाय्
बाय्था हे । छुं जुयाः छद्म निह्य मिस्त नेपाः हे वःसां नेपाले न्ह्यथुपिसं
व जहानपिसं ला.लाः थे याइगु । अले गुलि लिहाँ वइगु व गुलि नय्
त्वने च्वनेगु पदः मिले मजुयाः अथें सिना वनिगु । उकिं मेपि समीनी-
तसें नेवाःतय् कलाःपिन्त भचा क्खं मिखां स्वयाः हेला याइगु । ख नं
नेवाः भाःतपि नेपाः काहाँ वय्व गुलिगुलिसिनं जक हानं पसः चले
याना च्वने फइगु, आपा सिनं ला हानं सँभ भाःत काय् मालिगु व

गुलि गुलि 'अनि' (भिक्षुनी) जुया छ्दगु । थये जुयाः नं अमिसं नेवाः
भाःत काय् दुगुलि थःपिन्त 'भ्याय्बुकि किमे' (नेवाःतय् कलाः) धकाः
फुङ्ग याना ज्वीतिनि थ्व धकाः गजव ।

छ्दहु मांहा वल, मेगु मालताल भचा नं कया यंकल । वं थ्व नं
धाल - सोतालाया उलिमछि दां वंगु टप नं बिया ह्य् ला ?

जि धया - सो नीला, (साहुनी) जि क्यनागु नं मखु, यानं हे
भमुलां खंकाः बीमखु बीमखु धाय्क लाका हःगु, व नं सच्छि व नीगू
दोर्जे दामं छोंपुं माने हे मजूनि, जितः गुलि थ्याइगु मस्यु ।

“अयूनं का” धयाः व वन ।

जि “ज्यूसा लित बीके हति नीला” धया छ्या ।

गन लित हइ । च्यान्हु फिन्हु अथे वन । छ्दहु जि ग्यामुकं छको
चाःहिलाः लिहाँ वयावले धिक्कुमी लैय् लाक्क मिसा छ्दहस्या च्व फाना
च्वंगु लिक्थं खना, लं जंधुली थ्यंक फाता प्वीका तःगु । जि वयां च्वना ।
न्ह्यःने थ्यंकाः दना वलं ला व हे भमुला ! जि खनेवं ख्वाः ह्याउँसे च्वंकाः
नेताः गाःवंक न्हिले थें जक याना वन, बांलाक नतुया मवं । जि कथाय्
लिहाँ वयाह नेपाः थ्यना च्वंगु - छ्द छको उसाय् मदु लाय्काः कःसी
वासःचिकनं बुया च्वंगु, मोमो धाय्क नं क्यहेँ चां जंधुली चिकं पाका
च्वंगु, जि ल्यूनं स्वया च्वना । जि खनेवं क्यहेँ चा मेगु हे तोह चिनाः
दुने वन, जि अन ल्यूनेसं दुगु छं मखं । जि नं नि मबासें तीजक क्यहेँ चां
थें च्वंक बुका बी धकाः जंधुली थि जक थिया, मस्यु जि थियागु छु
पात थें छं लिक्क स्वत । जि खनेवं ख्वाः ह्याउँसे च्वंकाः नेताः गाः वंकाः
“मयो जि बाः, मामं छु धाइ !” धकाः छ्द कच्छुत । क्यहेँ चा वल ला
धकाः थय्क स्वयां, का, जि ला थःगु कथाया लुखाक्वय् धकाः थ्यना
च्वंगु ! धात्थं मै, जि उखुनु चर्छि न्ह्यः मवः छ्द छको छको, व छको
छको लुमना च्वन, च्वन ।

व ! न्हापां जि खनावले १२।१३ दँति जक दुह्य मचा भीथाय्

जूसा अबले ६१० दँ दय्क तकं तपाःलं फिकाः तःपि मिसामचात थें
मांहा नाप वइ, “भमु, भमु” धाय्, न्हिलाः मांहा नापं थ्येथ्येपुं वनि ।
व छ्द थें च्वं धकाः अबले जि मस्यु । तर आः व खँ लुमंकाः स्वय्बले भी
निहा नाप नाप हितः ज्वीबले छ्द गय्च्वं व नं अय् हे च्वं - तुयूचा ख्वाः,
मिखा बाला बाला चि, हिसिचा दु । वया बौ व दच्छि जक दुबले मदुगु
हँ, व नं सँय्तसे स्याना छ्दःगु । उथाय् ल्हासा व अंग्रेज लडाइ सि जक
धःगु व तिच्चते चीनया अधिराजत्व दुगुलि चीनसरकारं अंग्रेजतय्गु
लडाइया खर्च फुक पुलाः अंग्रेजतय्त ल्हासां लित छ्दःगु लोमंकाः
चिनियातय्गु छुं हे अधिकार मदु थें याना व्यूगुलि चीनं तंम्वेकाः
चीनी सेना ल्हासाय् छ्या हल । पतला लामा अंग्रेज लडाइबले चीने
विसि वं थें भारते विसि वन । लिपा चीने ल्वापु-ख्यापु विद्रोह जूगुलि
पलटनयात नसा व तलव नं मध्यसेलि अम्बान् सहित अपि सक्छें विसि
वन । विसि वने मलाःपि चिनिया सिपाहीत व चिनिया व्यापारीतय्त
नं सँय्तसे मालाः मालाः स्यात । उकी मध्ये भी कथा नाप न्ह्यापांनिसें व्यापार
सम्बन्ध दुह्य चिनिया व्यापारी ताङ्ग-शेन-शङ्ग छ्दह नं लात । वया
कलाः पेमा धोलमा समीनी जुया नं नेवाःतय् थाय् लाना च्वंगुलि जक
ल्यंगु हँ । मखुसा ला वयात नं मेमेपि चिनियातय् कलाःपित थें सँय्तसे
कः फायाः स्याइगु ज्वी । न्यने हे ह्य पीसे वइगु खँ । मेपि भी गोरखा
अडाय् शरण वःपि चिनियातय्त जक भी कपटान साहेवं शरण कयाः
कोता कोतातय् थाय् व चिनियातय् थाय् नं वनाः निखलकं लय्ताय्क
खँ-खि ल्हानाः सिपाहीत पासा बियाः हिन्दुस्थान थ्यंक तय्के छुत । थ्व
गुण निखलःस्यां लुमंनी खनी । लिपा लिपा तकं कपटान साहेबया नां
काःनि । अनं लि पोतला लामा भारतं लि थ्यँसेलि “चीनी सम्राटया
आज्ञां” धकाः बिया तःगु पोतला लामाया “धर्मगुरु” पदवि नापं
“भगवान बुद्धया आज्ञां” धकाः हीकाः १३ ह्यह पोतला लामां थःगु
प्रसस्ति चले यात ।

अननिसं चिनियात जक मडुगु मखु कि ताथू-ह्वेचू व लुँ दुगु भिमिगु क्वेँचिन्, यांथि व भवीया धोतुं, अंगु, कयो इत्यादि चिनिया माल व रिंजि धोर्जे, दुतां, दुनि आदि च्या नं च्वय्यागु लं ल्हासाय् दुहाँ मबल, मेमेगु माल ताल नेपालं वइ थें चिनिया महासुचि, च्याडी आदि चिनिया माल नं कलकत्तां जक हइगु जुल धाल। उकिं ८।१० दँ ति हे न्हापा न्हापाया थें केशरी, तंपा, धुँया क्वय्, धुँया लेंगु, नम्बु व मेमेगु मचुया च्वंगु मालताल नं सुचुक ज्वना वनिपिं, न्याना यंकइपि चिनियात मडुगुलि क्वथाय् थोपू माल आपाः ल्यना च्वनिगु जुलहँ। लिपा लिपा तिनि हानं छह निह चिनियात खने दयाः महि पसः, वासः-पसः, होटल पसः इत्यादि चिनिया बाना दुगु पसः व सँ खाकेगु ज्यासः नं चाःगु जुया च्वन।

न्हागुसां व वीर मिसां भाःत मडुसां अमि कोताः छह थःथिति दुगुलि नेवाः साहुत व छोंपुं छोंपुं त नं वःकयाः व्यापार यानां च्वन। न्हाय्यात नं स्यने कने यायां थपाय् धिकः यात। लिपा जि हानं थन थ्यंबले ला व मचा मेह हे जुया च्वंगु—छ स्वःसा स्वय् हे मो - लाउं जक मखु, पहः चहः नापं छुं मपाः। पाःगु छुं दःसा वसः हे छता जक। धाथें वयात नं छन्त थें कैँचि मार्का पसिं सिकुसा च !

छ ! छ ला धाय् हे मोल, जिमि मामं स्वयाः खनाः जातकं त्वय्काः हंका थकुह। मचाबले हे नापं पां देखा कया तयाह। अबले मचा हे जुया जक खः, हंका धयागु, पां देखा काय् धयागु ला धाथें जीवने न्हाइपुगु हे खँ खः, कलाः-भाःत गुकथं हने माः, थः थवे गुकथं हनाबना-विचाः संचाः याय् माः जक स्यनि कनिगु मखु निहय्पूया माया-मतिना नं गुकथं याय्माः व नं छगू छगू दत्तले स्यने कने याइगु। व सकतां खँ छुं नं लुमंनी ज्वी। लोमंसां लिपा लिपा धलं दंबले बाखं बाखने व देखाय् ल्यू च्वं वनाबले न्यना वयागु लुमं ला ? उकिं छ नाप नं जि अथे हे हना च्वनागु, छुं नं जितः उलि हे ग्यंक सकतां

सकतां याना च्वंगु। तर विधाताया विधान हे अःखःगु धाय् ला मीसं थःपिन्त लवःखतं जीवन न्हाके मसःगु मस्यु, अनुजुयात कत छ्या हय्त जि ल्हासा वया छु 'भीगु' धाय् छं यइ ला मयइ ला मस्यु, अथे नं जि धाय्— भीगु न्हाइपुगु जीवने कुमिचा दाल।

जि, ख्वख्वं वया। छुं नं जिगु लिसः पौ म थ्यंतले क्यहेँ भत नाप ख्ववि मत व्यू जुल, थनतक ला छुं मखु नि, छंगु मन मुक्तं जिगु हे पाखे कसाला च्वन तिनि जि नेपाले दुबले थें। जितः लँय् छुं मज्जीमा, यानागु ज्या साफल्य ज्वीमा धकाः हे मने ज्वी मखुछा ? तर थथे मत व्यू ववं लिपा जूबले सुथे सुथे न्हापानं न्हापानं न्हालं चाइगुलि गबले सेंगु इ गबले जनवाहाले व गबले गबले गुह्येश्वरी थ्यंक नं वन थें, अन छको निको पासापिनि भाःतपिं ध्वद्दुक नाप लानाः पासापिनि मछालापुवले थः नुगः मछिकाः लिहाँ वय् माःगुलि मेमेपिं देके वइपि विधवा मिस्त वा थः थें हे भाःत सँदेशे लाना च्वपिं मिस्त नाप स्वयंभु, अजिमाद्यः, जनवाहाद्यः मूचीभाःद्यः नं पालंपाः उला छत खनी। धाथेंया खँ छु धाःसा उथाय् थ्यंबले छ छह एक नम्बरह्य द्यःउँचा जुइ धुकल।

ख नं आधार मदय्कं छुं वस्तु नं ल्यना च्वनि मखु। छन्त उथाय् आधार नं छंगु हे धापू अनुसार जि हे जक तिनि। उकिं जि छको "सिलु वने ला !" धकाः खँ छुनाबले छुं धा नं धाःगु दु— "जि ला छ मदय्कं च्वने मफु, जितः नं व्वना यंकि।" अले जि निहलाः निहा ल्यपू सिलु वनाः सिलुमे थें जूसा छु याय् ?" धयाबले छुं कच्छुनाः मिखाय् ख्ववि ललःधायाकाः "अय्सा छ नं वनेमते !" धकाः धाःगु आः नं जि लुमंनि, उकिं थौंतक नं जि सिलु वने मनंका च्वना। अज्याःह जितः ज्या खं धाय् ला धनया लोभं थन ध्वाना हःबले छन्त आधार नं ला मन्त। धाथें मचा छह जक दुगु जूसां वयात हे जि थें भाःपाः वयात न्वाकाः व नाप हे ह्मिताः मन तथा च्वनिगु ज्वी। लिपा

जि नेपाः वयाबले नं छं अथे जितः भ्यातु तायाः तापाकइगु मखु, वं जिगु साली थें ज्याःह्म मचाया न्ह्याःने धाथेंयाह्म जि न्ह्याःने दइबले न्हापाया सिबे अप्पो माया याइगु ज्वी, मतिना याइगु ज्वी व खं जि बांलाक स्यू ।

तर उथाय् थ्यंबले ला छ् कयांछे लामाया बाखं न्यनाः अनेक जप-तप-ध्यान थाइह्म जुया च्वने धुंकल । ख ला व लामा खामनिसें ह्मदु दानाः वयाः नं लहासा जुकाः हे वःह्म खः, अथेनं थन अज्याःपिं लामात पुचः पुचः दुगुलिं अबले जिमिसं वास्ता मतया । लिपा सिल— व लामां धमांसाहुया छें च्वनाः वन्दु-धर्म कंगु व अनं थाय् मगानाः मञ्जुश्री पर्वःथाने व यले नागबहाले नं वनाः बाखं कन धाल । अले न्हापा न्हापा नेपाले न्यने मखंनिकथंया बाखं कंगुलिं धर्म श्रद्धा दुपिं बुद्धमार्गीत आपाःसिनं बाखं न्यन, वन्दु-धर्म यात । उकी आपाः मिसात हे धाल मखुला ?

स्व मै, छ् तंचाय्मते, नुगले नं स्याके मते छं । जि बांलाक हे चाः—अबले छं निहंनिहं छें ज्या फुक न्हापा न्हापाया थें याना नं जितः नकाः त्वंकाः विचाः संचाः याना नं हानं जि नाप छपाः लासाय् दाना नं छंगु मन मेखे पाखे । अथे धकाः छंगु ह्याया पवित्रता पाखे संखा यानागु मखु । छं धरोधर्म थे धा मै, छंगु मने “उलिमछि जप याय् मानि, उगु पत्ती ध्यान याय् मखंनि, गबले याय्गु ! हानं थ्व गनया मोगु तन्ता व गु !” मखुला ? ख नं गुलि याउँक माजु छहसित विचाः यानाः ल्यंगु ई फुक थः यःयःथे जप तप-धर्म कर्म याना च्वने दुगुली मिजं छहं बेहेपा च्वने माःगु, छखेंला अप्पो हे तन्ता खः । उकिं हे ज्वी मै, दं तक हानं नाप च्वना नं भी मत्त छह्म हे मदुगु ।

धाथें मै, छं उगु पतके नं जि सिलु वने धयाबले थें गं जक गंगु जूसां जि लहासा मवइगु ला छू छु । हानं उथाय् जि लहासा मवयां जिबे छुं ज्वीगु व सर्वे हे फुक फुनाः तनाहाः ज्वी मालिगु नं ला मखु ।

बजाःतय् “छिमिसं स्वयाः याना वा” धकाः धया हःसा भिपिं बजाःत, अमिसं फक वचे यानाः ह हे हइगु । हानं भी नेपाले नं पुलांगु छें वुं द हे दु, अबुं कत ज्वना वःगु उलिमछि लुं वहः तिसा द हे दु, हानं छुं भचा सां जि नं ज्वना वयागु दु । व हे व्यापार धकाः जि व्वां ज्वी माःगु मखु । समय छ्ते चिकिचा धंगु छगू ज्या नेपाले हे याःसां ज्यू । हानं वय् हे माःसां दं बढं जक च्वनाः लिहाँ वय् ज्यूगु । तर छंगु व दुमग्यःगु छ्मासुगु व्यवहारं यानाः जितः लिकुंके मफुत, हानं लैय् वयाबले नं न्हापा लहासा वयाबले थें जितः ख्वबि लै मपं । लहासा थ्यंकाः नं न्हापाया थें लुमन्ति कथुप्वाः त्यू मवः । वयाकथं व्यापारे लहाः तथा छ्यागु छ्यां जुल, थौं तक उकी हे प्यपुना च्वना तिनि धाय् माल ।

उथाय् हे नेपाले चन्द्रशम्शेर महाराज मन्त । थन वकील अडाय् शोक माने यात । तर सँय्तय् धाःसा अमित दुःख व्यूह मन्त धया थें लय्ता वः । उकिं भी नेवाःतय् भचा हेपे याना हःगु व ११ साल निसं पुले मोला च्वंगु थ्ये (जगाः भंसाः) सँय्तय् सरह पुइकेगु धकाः तिया हःगुलिं भीगु माल नं सँय् व्यापारी तय् नामे चले याय् माल । छ्याय् धाःसा वकील साहेबं पुलांगु अहदे मदुगु थ्ये पुले मज्यू धाइगु, अमिसं धाःसा मकासे मतोतइगु जूबले व्यापार हे दिके मालिगु जूगुलिं च्याडि आदि माल कालिम्पोङ्गं निसं हे थ्येवातय् नामे चले जुया वल । लहासां वनिगु कस्तू च्वामो-तय् आदि नं अमिगु हे नामं कहाँ वन ।

उथाय् हे भीगु च्याडि बकु यक थ्यंकाः वया च्वंगु धोलमां खनाः न्येबकुति च्या कोछिनाः भीगु न्हापायागु दां फुक धया थें बिया वन । व हे टपयागु मगाःगु व मेगु लिपा यंकुगु पत्ती भचा जक बाकि । थथे नेपाल लहासा लडाइ मज्वीगु जुयाः व तस्सकं लय्ताल -- सोता, थथे गोरखा सरकार व देवासुंया (सँय्सरकार) मेल-मिलाप जूगुलिं हानं भी याउँक व्यापार याय् दत, न्हापाया थें निघाः तथा दीमाः, मेगु दां हिसिलहामुयात याकन हे बीके हय ।

जि मथुयाः हानं न्यनाः सीका—भमुलाया नां “हिसिलहामु”
जुया च्वन ।

जि, गोन्हुतक भमुलावइ, वल धाय्व वयात “हिसिलहामु ला !”
धकाः हाय्के धकाः मती तथा च्वना । व वःगु मखु । छको निको व
नांया अर्थ विचाः याय्वले छ लुमनाः भसुकाः नं वइगु । ख नं धात्थें
छंके ‘ज्ञान’ द हे दुगु जूसा जितः अथेभनं नुगले स्याकइगु मखु । महुतले
महु, न्ह्यःने दसेलि न्हापा गथे अथे हे यानाः थः नाला व्यूगु जूसा छुं
खं हे महुगु । जीवन न्हापाया थें अज्ज न्हापाया सिवे नं चाकुक् सललल
न्ह्यइगु । छं उकिया अःखः याःबले लुमंलुमं भं हे नुगः हीसे हीसे च्वना
वइगु ।

छन्हु अथे हे नुगले धौबजि वाय्काः जि अथें च्वना च्वना ।
न्याः-नी वःपिं सुं महु । वंजाःत नं सकलें कुने पसले । अज्याःथाय्
भमुला तुक् थ्यंकःवल । वयाकथं वं “ह्रीग हे मामं हुं धाःगु”
धयाः याकप्पालं दांपो पिकयाः प्यना बिल—थ्व मांया ल्याखे मगाः-
निगु, थ्व जक टपयागु मगाःगु पत्ती, मेगु च्याडियागु जक निन्हु प्यन्हु
लं च्वना दी मालि धकाः मामं धाल ।

जि वया ख्वाः स्वया, व मुसुक न्हिलाः कच्छुत । न्हापा न्हापा
व अथे गबलें कमछू । व जक मखु मेमेपिं समीनीत नं वयासिवे ल्यासे
ल्यासेपिं, पंम्हुइ थें च्वंक न्यताः च्वका ह्याउँपिं नं जि खना, अपिं नं अथे
छह्य हे कमछू । अज्ज अमित नेवा तसें लहाः ज्वनाः सालाः नापं फेत्तुकाः
“छ लिहाँ वने मोल न्है, थन हे च्वं” धकाः धातले नं “अँ, जिपिं
गरीवतय् साहुपिसं पत्याः याइला ?” धकाः न्हिला च्वनिगु जि खं ।

जि स्वयां च्वना, वयागु ख्वाः, लाउं, हवां फुकफुक । धात्थेंया
खं जा मै, व स्वया च्वनागु मखु, छ स्वया च्वना, मोल्हुया जनिखं जक
जँय् हिनाः कःसी सँ पाना च्वंछ छ । अले जि व दां थो गयाः थें च्वन ।
जिगु भिपाय् दांयां नीपांय् जुया च्वंगु व दां खनाः जुले भेलाहा यानाः

पुइकागु दां थें च्वन । अले जि व दां थि हे मथिसे मेगु मालतालयागु
मगागु पत्ती दां जक मुना कयाः वयात धया—भमुला, व दां मोल,
लित यंकि !

वं पुलुक छको जितः स्वत, अले स्वय् हे नुगलेस्याः पहलं छय्ः
भचाः स्वेद्याक कच्छुनाः भचा छ्वाक दांपो ध्वात—सोता, भ्याय्वुत
धयापिं लहासा वइगु हे ध्यवा कमाय् याय्ज जक, ध्यवा भचा द्यव
मेगु छुं हे मोपिं । थःछें कलाःयात ला वांछ्याः खय्का वय् फुपिसं थन
मुया मने छु दु व खँया गन च्यूताः तथा च्वनि । जि थ्व टप छजो
लोवनाः काय् धयां, व नं ध्यवा पुलाः न्याना काय् धयां ध्यवा अप्पो
काय् गुलि भेलाः खं लहाना च्वंगु—छोंपुं नं छु धाइ, छु धाइ, च्यामकु-
स्योयात बीमाःगु, छुछु, छुछु । आः न्ह्यागुसां कयादिसँ रे, जि बी धाय्
धुंगु नीगू दोर्जे दां ।

जि छु धाय् छु धाय् जुल । खं खःगु हे, जि अप्पो मू काय् हे
खं दय्कागु, हानं छ लुमंगुलि हे वयात काचाक थःनाले मफुगु । उकिं
पलख सुंक च्वनाः धया—स्वाल हिसिलहामु, आम नीगू दोर्जे दां छन्त
नुगले स्याकागुया दोपं जुल ।

तर वं व दां मथ्यू चोक्ची कुने दिका तःगु लहातं मिखा छको
पियाः जितः स्वत । हानं मिखा ललः धाय्कल—सोतालां जिगु नां
गथे सिल ?

जि धया बिया—जि दकले यःगु जुयाः ।

“खं दय्केत ला भ्याय्वुत धाय् माःला ! छुया ययि जिगु नां
छितः ? यो ह्य ला”

धात्थें खं खःगु हे, जि योह्य नेपाले हे । वयाके मन वंगु नं व हे
योह्य थें च्वनाः । उकिं वं “छिकिपिनि नेपाले च्वंछ साहुनी गय्च्वं
धकाः न्यंबले जि “छ थें हे च्वं” धकाः लिसः बिया । तर व पत्याः मजू,
तीजक दनाः वने त्यन । जि व दांपो धिनाः—“ना यंकि लहामुला”

धकाः धयां व टप ज्वालाक थिक लिचिल, दां मकाः ।

अले जिं दनाः देपा लहातं वयागु जब लहाः सालाः याकवाले
व दां स्वचाका विया । जिगु पचिने बाहाय् पिकाः खुनुया च्वसिन्हः किना
वः थें च्वन ।

अले वं जितः तुं क स्वत - सोता !

जि नं न्हिला - हिसिला !

व कच्छुत - फिदा !

“झिर् !”

“फिदा !”

“झिर् !”

“फिदा !” वयागु छ्यैः जिगु नुगः पाय् । वयागु चिकं तिला
मतः निगु रेसम थें नाइसे च्वंगु सँ व साभोंया नं जिं सिल - वया नक-
तिनि मोल्हुया वःगु । उकिं हे व ह्रीगखुनु मवःगु ।

यमैं, जिं बांलाक हे स्यू छं न्ह्याक हे जितः पंगलः थें भाःपाः वास्ता
मयासे च्वंसां थ्व खँ च्वनाः छं अबले जिं कलाः तल धकाः न्हापालाक
न्यंबले थें आः नं ह्य चिक मिन तिनि ज्वी, नुगः भारा भारा सन तिनि ज्वी,
मखुला ? लु याय् मै अबले जि नेपाः वयाबले छको जिं छंगु माया-
मतिना भचा छ्वासु थं च्वंगु खँ न्ह्यथनां छं धाःगु दु—“संसारे, न्ह्यागुं
हिला हिला वनिगु संसारे लुं हे स्थिर जुया च्वनिगु मखुसा हानं मनू-
तय् मन जक गय् न्ह्याबलें उथें जुया च्वनि ?” खः मन चञ्चल, व यो
योथाय् ब्वां ज्वी यः । तर अज्याःगु मनयात नं विवेक विचारं चिनाः
खःगु भिंगु लँय् छ्य माः धयागु खँ विचाः यानाः न्यादँ तक व मन
छंथाय् जक छया हया च्वनागु । तर छं जि न्ह्याःने थ्यना नं जिगु खँय्
नाकं ध्यान मतः, ख्याः थें जक यानाः—थ्व ह्य छह्यं मुकतं छंगु हे ला
खःनि धकाः जितः होकेत स्वत, म्हुतु प्वाः तिकेत स्वत । आः छं धाइ—

“थः याउँक मेह कलाः तया च्वना नं जितः जक थथे धाल अथे धाल ।”
खः जिं कलाः तया, छंत अन्याः याना, तर जानाजान छ मययाः छन्त
दुख बी धकाः मखु । जिगु अवस्था छको नं विचाः याः ला मै छं ?
न्हापाया खुसी लहासा वयाबले जि अज्ज ८१० दँ ल्याय्छा तिनि, बुद्धि
मदुनिह्य, यां थ्यां मस्युनिह्य, नीन्यादँ हे मक्यंनिह्य ल्याय्छा । अज्याः-
बले नं जिं छंगु रूप व सः जक मखु छंगु पहः चहः नं सकतां सकतां
लुमंकाः गुलि गुलि बांवांलाःपिं लोवनापुसे च्वंपिं समीनीतसें हाय्कः
वःसां वास्ता मयासे खुसि घय्पू वःसां पर्वः लिचिलि थें लिचिला
च्वना । तर नेपाः वयाः निदँ निदँ नाप च्वना नं छंगु मन ज्वना वय्
मफुगुलि लिपा वयासिवे ८१० दँ बुढा ज्वी धुंकाः जिगु मन चीमफुत,
होका तय् मफुत थ्वया पाखे वना बिल । आः छं हे धा अबले जि
छुकिया आधारे च्वनेगु, छ थें थः वें ज्वी मफुत, न सुरतवज्र थें योगा-
चार व चचावें ज्वी फत ।

अज्ज धाथेंया खँ जा मै हिसिलां जितः ‘फिदा’ धकाः थःत यः
मिखां स्वय् धुंकाः नं जिं लांलां छंगु लँ स्वया च्वना तिनि—गनं लुं
सूत्रं छं लुं धया हइला, ‘आः जिं बांलाक विचाः याना तय्, मतिना
याना तय् याकन काहाँ वा धकाः च्वका हइला धकाः आश याना
च्वना । खः का जिं पौ च्वया मइया । च्व नं गय् च्वय्गु अज्याःगु
खँ । हानं छ उथाय् तक आखः सःगु मखुनि थें ! मेपित क्यंवनिबले लु
धाइगु मेपिसं ! उकिं च्वय् माःगु छेंयागु खँ मांयात जक च्वयाः छन्त
लुं म च्वया, जल भोछि धकाः च्वयाः पार याना ।

अले, अले थः धाइ ख्वाः वःह्य थःत उलि हे विचाः संचाः याइ
खः वःह्य, हानं रूप-गुण सकतां छंगुथं ह्य मिसायाके मन वंगुली छं
न्ह्याक हे जितः मिजंत धयापिं थथे हे खः धकाः दोष व्यूसां जिं ला
थःत उथाय् यागु अवस्था स्वयाः दोष बी मफु ।

हानं लुं दिन लिपा थ्व खँ नं जिं सिल—थ्व फुक खँ यानाः छ

नं भंदले उबले हे भिक्षुनी जूवने त्यंगु हँ मखुला ?

खँ छु धाःसा उथाय् चन्द्रशम्शेर मदयाः भीमशम्शेरया राज जुसेलि गोरखा पत्रे नेपाल भाषां नं छापे जूगु भाषण स्वयाः न्हूजुजुं छुं न्हूगु ज्या याकइ ला धयागु आशां छुं ज्या याय् माः धयागु मने दुपि मनूत जानाः सफू कथा (पुस्तकालय) दय्के दःसा ज्यू धकाः विन्तिपत्र तःगुली मेगु राजनैतिक मुद्दाया हूलकूले लाकाः विन्तिपत्रे सहिछाप तक सित १००।१०० दां जरीवाना याःगु व लामा धर्म मयोपि मनूतसे गुभाजु गुभाजुपि जात भात मुद्दाय् ल्वाकाः उदायतय्त आदम्बर मत दय्कल धकाः दोष विद्याः दुःख बिल। उकी लाःपि १ हाम्मे धम्मादोक भन्ते-अबले श्री दशरत्न नं दुगु जुया च्वन। उकिं दशरत्नजुया नेपाले च्वने ह्याःला आक्याब भा बले ४१ हामिसाम्चत नं च्वना यंकुगु जुया च्वन। अमिसं अन च्वनाः बांलाक बौद्ध शास्त्र च्वना मच्वंसे ८।१० ला जक च्वनाः नेपालयात हे बांमलाक चन्दा-चिन्दा थयाः लिहाँ वःगुलि छ वने मखन हँ मखु ला ?

जि, थन ... व ... हिंसिला नाप गुकथं हनेगु विचाः हे याय् मलाःनि पोतलालामाजु निर्वाण जुल। छकोलं हे ल्हासादे छगुलि ह्युंसे च्वन। सुयां ह्युं तिसा जक छुं मदुगु मखु कि मिसातसे पांदे नं तोता छुत। उकीसनं थाक्चोया ताचो नं छपु हे मदुबले धाथें ल्हासादे छगुलि लामाजु मदुगुया दुखं च्वना च्वंगु थें खने दत। मी वकील अडां माःगु खाता-खिता तय्के छ्याः पाला थकालिपिन्त न्यंका हल। अले मी नेवाःतसे नं खाता तय्के छ्याः थाय् थासे द्यः लुके छुत। थःपिनि दस्तुरकथं ४ न्हुतक तुपुलि नं त्वत। छाय् धाःसा मी नेपालया अजि वडामहारानी स्वर्गे जूवले नं भोसं जक थःपिनि नेपालया दस्तुर थें वकील अडां “नेपाले थथे जुल” धयागु सः कना ह्युव पाला-पालां व साहु साहुपिसं नं खाता तय्के छ्याः द्यः लुके छ्याः सँ-सि खानाः ४५ न्हु तके बेतालि चिनाः दुखं च्वंगु मखु कि सँ-सरकारं नं

खाता तय्के हःगु दु हँ।

छुं दिन लामाया ह्युं अथें तयाः धर्म यात। लिपा लामाया ह्युं वासः-इसः तयाः लुं पानाः लुं यागु हे चीभाः दय्काः मेमेपि लामापिन्त थें धूमधाम उत्सव यानाः सकसितं दर्शन विद्याः उकी स्वथन। व चीभाः दय्केत यथा श्रद्धा चन्दा नं काल। अन पाल ग्वयाः खिपः प्यना त.थाय् चन्दा व्यूवःपिनिगु हूल हूल। गुलिसिनं दां, गुलिसिनं थःपिनि तिया वःगु तिसाः—घौ, एको, अंगू व धोतुं पां पां वान्छ्या थकुगु खनाबले जि भसंक मचाबले मीथाय् स्वयंभु ल्हंवलेयागु खँ लुमंसे वल—जि हितु हितुं पासापि नाप सँगुं च्वय् ध्यना च्वंगु, उखुतु अन गःतगिने च्वंगु हते लुं, रत्न आदि छाय्गु इच्छा दुपि वा धकाः सःता तःगु खनी। उकिं साहु साहुपि व विशेष यानाः श्रद्धादुपि मिसात यक वया च्वंगु दु। अन मिसातसे व्यूगु हिना अंगू, तुकि, अखवरया अंगू आदि काकां धकिचा छपाते मुंका च्वन। लिपा साहु साहुपिनि नापं जिपि नं च्वय् ध्यन। अन कं थत यंकुगु व तिसा फुकं कुरकल। साहुपिसं हीरा माणीक, पन्ना, नीर आदि रत्न व हते कुरकल। नवरत्न खाकाः ज्वना वःपिनि यू, भिपू, मोति आदि स्यना वनिगु रत्न कुरके मच्यु, लिततुं विद्या हल। लित मकाः पिनिगु रत्न जक लिपा फकीवाताया नापं च्वय् गजुली स्वथनेगु धकाः अन जिम्मा काल। जिपि मचत २।३ ह्यसित धमां साहुं ज्वना भा गु लुं कुचा छकू छकू विद्या दिल, कुरकाः जिपि सकलें कहां वया। धाथें मै, धर्म श्रद्धा धयागु न्हाथासं दु खनी, ताल जक थःथ गु जुया च्वन।

धाथें खःगु जूगु खँ ल्हाना च्वना मै, छं नुगले स्याके मते। उथाय् छुं समय तक छ नेपाले दनिगु लोमन, हिंसिला हे छ जुयाः जिगु न्हाःने दना च्वन, छं थें हे-वं नं जि ल्हासा मवयानिवलेयाह छं थें माया-मतिना याना च्वन।

धाथें हे धाय् धाःसा मै, समीनीतसे गुलि छें धर्माके फु उलि

मी नेवाःनीतसें याय् फु थें मच्चं । थमिसं भाःत काय् धुन धाय्व
नेपाले पिने तथा तःपि मिसातसें थें नय् हिं, तीहिं जक यानाः मिजं-
यात भार जुया च्वनिगु मखु कि छु तक याय् माल व तक यानाः
भाःतयात थकाय्गु स्वइ । थपि बलाःगु जात जूगुलि बलयागु ज्या - लः
काय्गु, भुतू ज्या याय्गु, व्यापारयात माःगु मालताल कुंकुं थमं हे
लज्या हय्गु व माला वन धाःसा शत्रुत नाप दांगादुगु ज्वीक ल्वाय्त नं
लिफः स्वइपि मखु । थथे निगू ज्यूयां छगू ज्यू जुयाः दुग्येक माया याइपि
जूगुलि हे थमित हिसिलां धाःथें ध्यबा छता दय्व गाःपि स्वार्थी नेवाःतसें
प्यासि, लसि इयादि धया तःगु ज्वी । थज्याःगु मेगु ज्या ला वं याय्
माःगु मखु वंजाःत दु, लःकामित दु, अध्यनं बराबर वयाः जितः नके
त्वंकैगुली नापं ध्यान तथाः माकितय्त स्यनाः स्यनाः अमिगु तालं साक
साक ज्वरे याकाः नका थरइ ।

उथाय् छको जि सेखं चायाः ज्वर वल । छुं छां मनसे लुमुक दागमं
न्ययाः अथें च्वना च्वना । व थ्यंकः वल । अथे च्वना च्वंगु खनाः स्वय्
हे नुगः मछि ख्वाः तथाः 'छु जुल हां जिदाया ?' धकाः चोक्ची
कसं फेत्तुत । जि 'च्वय् च्वरे' धकाः दागं साला वियां नं मच्चं ।
तीजक दागमे दुने लहाः दुतज्या हयाः तुति थिया स्वत । भति भति
ज्वर दुगुली नं दागमं पुया तथागु तुति ला काइगु हे जुल । अले व
भव्यकन—छु याय्गु, मिदाया ला ज्वर तस्सकं वः थें च्वं, ग्यामि वैद्य
(चिनिया वैद्य) सःता हय् लाकि छु ?

जि धया—मो, छुं मजू थौं न्हिच्छि छुं मनसे का लः त्वनाबी,
कन्हेला याउँसे च्वनि ।

व पयाः मजू । अमि ला ज्वर छको वल धाय्व भं त्यंक नयाः
थं दाय्काः त्वना बी, अज्ज लाःसा च्वाःमोसाया दुगःकय् चुं चुं दं
छ्यानाः काति दाय्काः त्वना बी । उकिं यानाः आपाः मनूत
सि नं सी । थ्व खँ मीत ज्यूगु मखु । वं व खँ सियाः हे चिनिया वैद्य

सःताहय् धाःगु ।

जि वैद्य सःतके मछ्या । अले वं छयँले थिया स्वत, नाडी स्वत,
मानो व छद्म डाक्टर थें, तर वं मस्यू व ज्वर निन्हुं कलाइ धकाः । उकिं
वं मिखा ललः धाय्काः जितः स्वत । अले जि वयात साला कयाः च्वय्
फेत्तु का । अज्ज वं जितः तुंक स्वया च्वन । वं स्वय् जि लाइ हे मखुत
धकाः च्वन थें । जि वया ख्वाले पितु पीकाः धया—लहामु, छं छाय्
अपाय्चो धन्दा कया ? जि सी धकाः ला ? थौं छन्हु मनयां जि सी
मखु, छं स्वया च्वं, कन्हे हे ज्वर छत्ति दइ मखु ।

व छत्ति हे पयाः मजू भं नुगः मछिकल । वं स्वय् न्हावलें मनूत
धयापि मनसें सने फइ मखु । अले जि वयात ह्येकाः खँ न्यंका । खँय्
खँय् थ्व नं न्यना वया जि छाय् यल, जि सी धकाः अपाय्चो छाय्
धन्दा जुल ?

उकिया लिसः वं छु बिल स्यूला ?—न्हापां वं जितः खंबले लाखे
जि छु छता माला च्वं थें च्वं हँ, लिपा जूवले व माला च्वंगु वस्तु व थः
हे जुल हँ । छाय् धकाः न्यनां लिपा छको लाखे जि वयात स्वःबले वः
वस्तु ल् थें च्वंक लय्ता मिखां स्वत हँ, उकिं लाखे वया जि खनाः माया
वन हँ ।

न्हागु थजु वं उखुनु जितः तोता मवं । जि नं हुं मधया । मने
मने "सकसिनं सी हे धुकल, च्वंसा म्वाय्से ।"

वं चच्चि लिक्सें भोसुनाः गबलें खवखना सलं गबलें न्हिले थें
यानाः थःगु नुगः उलाः क्यना च्वन—"मिजंत धयापि थथे हे खः काय्
सिवाय बी मसःपिं, थमिसं गबले मिसातय् नुगः धाथें खंकइ थुइकइगु
मस्यू, थनयापि निह स्वह दानु किजायां छद्म मिसा तइपिसं ला मसिल
धाय् स्वाल, मिदां ला सीके फय् माःगु खः—मिसातय्के गुलि माया
दु, गुलि सेवा याय्गु भावना दु । व हे भावनां यानाः थनया मिसातसें
कुं मि सह यानाः निह निह स्वह स्वह मिजंतय्गु आयाचार फया

चवन । अथे हे जिके नं थःगु मायां दना वःगु सेवा याय्गु भावना
भिदां मखंकुसा जि मेगु छु धाय् ?" व सुकुसुकु खल । जि ह्यय् पित्तु
पीका बिया—छिरि !

प्यन्हु न्यान्हु लिपा जि लाल, तर आपाः धन्दा कया जूगुलि
ला मस्यु व ग्वारा चिन । ज्वर नं वल, मुसु नं वल । मांहा सिथाय् छत
धाय् थ्व-थाँ दाय्काः त्वंका बी, लाःलागु नका बी धकाः ग्यानाः
मझ्या । निन्हु स्वन्हु तक पियात पियात हाय्क द्यालाका तया, व हे
काःलः भचा भचा त्वंकाः । मांहा न्हिच्छि न्हिच्छि च्वना वनि । उकिं
जि छुं याय् मो, न्हिच्छि बने ज्याना च्वनेगु । ख नं थनयापिनि खै
फाय्गु चलन हे मदुबले खैथल ला माःगु हे मखु, न्हि काय्त नप्चि
(न्हि ह्रीगु नंबु लध्याना तःगु) याकप्वाले हे दइगु जुल । व हे का बहनी
छको-निको वंजाःतसें हया व्यूगु काःलः न्ह्यच्याका बीमा उलि हे । नेपाले
जूसा उसाय् मदु लही गुलि थाकु ! न्हिकं याके माःगुलि कथाय् वं
पुताः खवा, सिके माल । नीलः हयाः न्हिकं याके माल, अलेतिनि काःलः,
वासः छु छु माल सकतांया पाः वइ । उकीसनं सेखं ज्वर वा थंक्वं वंगु
रोग ज्वीव ला मोल का, मदिक धया थें खैथल, बाता, कोपरा ज्वंछ
ज्वी मालिगु । छं लुमंनिला ? अबले छ तस्सकं उसाय् मदुबले जि अथे
हे जित्ति यानाः छिमि मांयाथाय् मझ्यागु । मांपिनि धाःसा छ्या
व्यूसां ज्यू धयागु विचार, तर जि पनाः मझ्यागुलि जक छुं मधाःगु,
उकिं जि मांपिनि मिखा पीकाः माःगु सकतां याना च्वना । छको निको
कोपरा नं वाना च्वना । ख नं मांयात याके ज्यूगु मखु, क्यहेँ चां नं
महुतुं छुं मधाःसां मनंनिसें न्हाइगु ज्या मखु । छन्हु सुथे छन्त खिफाका
च्वना । छं हःहःपुक मुसुवल, खैथल उखे थ्यंक । लहाते खै फाके धाःसां
लहाः निपां कोपराभ्याः, अले व याय् थ्व याय् मदयाः काचाक् महुतु
महुतु ल्वाकाः खै कयाः छन्त खि ह्रीके धुंकाः भयालं फाना छ्या । लिपा
छ नुगः मझिकाः ख्व नं खल —“हरे, जि पापि गुलि जक दुख बी

मालितिनि थें !” जि “अय् धयागु नं दुला मफुबले !” धकाः ह्येकाः
वल वासः नका ।

अथे ला थन भोल्वे, थंक्वंनिगु व मचातय् तःकै वइ धयागु
उस्त मदु । गवलें गवलें तःकै वल धाय् धाःसा बुढाबुढितय् नं वइगु ।
आपाः मत्त नि नं सीगु । अथे हे महायुद्धं लिपा छको थन तच्चोकं
भोल्वे वल हँ । भी नेवात जक द्यां लानाः महुतु ह्याले सःपि जूगुलि सुं
मसी, संय् समीनीत धाःसा यक हे सित धाल । उकिं संय्तसें “नेवाःतय्
धर्म बहाः” धकाः धाइगु हँ । अथे हे वयात नं जि बांलाक भीथाय् थें
विचाः यानाः जक उगु पतके लाय्के फुगु नत्र ला ल्वय् तःचो हे ।

धःचाकुसंलूया पालाय् पूजा-पाजा यानाः नखः दनावयागु,
चान्हे छु छु हाना च्वंगुलि लिवाक् तक न्ह्यः वया च्वंगु । म्हुंगु नं म्हुंगु
ला, मानेग्यापे छको बना वयागु, कानिकुस्यो (सिंहसार्थवाह चीभा)
थ्यंक्वले कानिकुस्यो ला मू हालाः भारारारा दुना वःगु । जि ला न्ह्यलं
चाःबले हःहःहे गरखेसे च्वना वल । अज्यागु, लहासाया व्यापार दकले
न्हापां स्वाका थकुह सिंहसार्थवाहया नामं दय्का तःगु चीभाः स्वय् हे
भी नेपाले छमा सिमाया सि मदुसतः दय्के धुंकाः ल्यंगु सि दय्का
तल धाःगु भुतिसः न्ह्यःनेया सतः थें पाकोरया ल्यं नेपाल व तिब्बत
सम्बन्धया पुलंगु चिं थें धकुमकु धाय्क च्वना च्वंगु व अन थोम् पसः
तइपिनिगु बाः नापं नेवाःतसें हे कया तःगु । उकिं खवाः खी सिलाः
बहिली देके वनाकथं व चीभाः नं खया वया ।

न्हिने भोछिस्यां थःपिसं साक दाय्का तयागु चाकु तयाः जा
नयागु व नय्नी धुंकाः वंजातसें हिसिलायात “नेपाले जूसा मचाबूपिन्त
थथे हे धःचाकु तयाः जा नकेगु, छं नं लहामुला, मचा छह बुइकि रे
अथे हे नके” धकाः हाय्का च्वंगु । अज्याःथाय् किरिक्क सः वः थें चवन,
थय्क स्वयां खाया तयागु फेलमाः यांतां यांतां सना च्वंगु । पिने वयाः
न्यना स्वयां मेमेपिसं नं भुखा व्वगु हे खः धाल ।

निन्दु स्वन्दु लिपा अनेक हला वल—खुनुयागु भुखां लाखे हिन्दुस्तानया थःने पाखे व नेपाल छगुलि ध्वस्त जुल हँ। तार चव्यूगुलि अनयागु छुं हे खबर महु हँ। सकलें भभःनुया जुल, वकील अडाय् नं न्यंवन, तर धात्थेंगु खँ सुनानं सीके मफु।

लिपा छगू निगू अखवार वल। हिन्दुस्तानया विहार प्रान्तया नाप नाप नेपाले नं यक स्यन। येँ, यल, ख्वप स्वयाः नं भौं दे तस्सकं स्यन। यलया कृष्ण देगः छगः तोताः मेगु फुक धयाथें ल्वहँ देगः दुन। मेमेगु पौ दुगु देगः जक उस्त महुं, भति भति पाखा, कुं पा जक स्यन। चीभाः धाःसा जामाचो चीभाः तोताः मेगु छगः हे महुं। मनूत छेँ च्वने ग्यानाः बुइँ-बुइँ, ख्यले-ख्यले च्वना च्वन धाल। थथे ख्यले-ख्यले वाय् च्वनेगु व च्वापुं दाय्का ज्वीगु जिमित ला मामुलि खँ, तर तिन्हिने पिहाँ वने मज्यू, लिवाः न्ह्यबाः ज्वी मज्यू धाइपि नेपाः या मिसात गथे ख्यले घन ज्वी, सुथे ल्वीक ल्वीक पुगाःबले गथे जक हील-चिकुल याना च्वन ज्वी! अज्याःगु लँया दुःख निको निको सिया छ हे धकाः काहाँ वयाह जितः छं न्हापा थें माया यानाः थः नाला व्यूगु जूसा मै, जिगु व फुक दुःख लुमुगु सुखे हिला वनिगु।

बल पिप्युं निलाति लिपा नेपाःया खबर वलं गुलिस्थां छेँ दुन धाल, गुलिस्थां मचात सित धाल, गुलिस्थां बौ मन्त धाःसा गुलिस्थां छु जुल धाल। निह न्हय्ता खँ ताय् दया च्वनिगु, ह्य हे चिक चिक मि। लिपा थःगु छेँयागु सः वःबले ला थःत संसार खंका तःह्य मां हे मन्त धाःगु। छकोला छुं हे मचाः थें जुया वन, तुरन्त हे व्वया वयाः पाजु-पिथाय् वने मास्ति वल, मचाबले मांया लहाः ज्वनाः वनेगु लुमंसे वल। धात्थें मै, व पाजुपिनि छेँया चा अप्पा द्रं लहाकाः गय् जक जितः लुमंका च्वन थें जि मांया! ख जा व बूगु धात्थेंयागु वया 'थ छेँ' व हे खः, अथे नं भीगु चलन अनुसार व अन सीगु मखु, जिमि अबुया अर्थात् वया भाःतया छेँ सी माःगु। व खँयात भुखां अःखः याना

विल—नखया वना च्वंदा मांयात ल्हाना विल, स्याना विल, जि थन च्वनाः हालां-खवयां छुं चाःगु मखु।

वाःछि नीन्दु वनं नं सुं मिले जूपि पासापि नेपाः वनिपि वा कलकत्ता वनिपि महु। धोलमां निहनिह विचाः याः वया च्वन, मामं थें विचाः याः वया च्वन। ख नं जि वया जिलाजं, अज याकःजिलाजं जूवले विचाः याइगु हे जुल। धानं धाल—सोताला, ख ला मां थें तःधंदा संसारे सुं महु, मेगु शब्दं धाःसा संसार हे मां ख, अथे नं महुगु मदय धुं कल, सोताला मायां मां हानं स्वाके फइ मखु, सितिके लँय् दु ख स्यू भाय थें जक ज्वी। वरु मांया नामं ग्येतम्बा याना दिसँ, धर्म कर्म याना दिसँ, माय्गु खँ ल्हाना दी मते। उकीसनं सोताला भाल धाय् व ल्हामुया छु गति ज्वी? थ्व नं विचाः याना दिसँ। व मेपि थें ज्याःह्य मिसा मखु छि सि हे स्यू।" व सुकुसुकुं ख्वल। जि नं भसंक वन—जि न्हापां ल्हासा वय्त सगं काः वनावले छिमि मां नं अथे हे ख्वःगु। हानं लिपाया खुसी ल्हासा वयावले जिमि मां नं अथे हे ख्वःगु। व नं छाय् मख्वइ वया नं याकःम्याय्। व हे याकःम्याय्यात वया जिलाजनं वाना वने धाःबले वया नुगः गथे तय् जी! नेपाले छ छम्हं जगाजगि दनि। छं जितः अथे मनं तापाका च्वन धकाः वं मस्यू थें। वं ख्वय् जि नं मेमेपि नेवाःतसें थें वया म्याय्यात चव्वुक वां छया थकइ। जितः नं खः थें च्वना वल। जि वयां नं मांया ख्वाः राय् खनिगु मखय् हे धुं कल। छन्त नं जि अप्पो पंगलः ज्वी, छाय् धाःसा उथाय् थयंबले लंकाय् व्वना च्वंपि भिक्षुपि नेपाः वय् धुं कल। लाःसा छं नं किण्डो बाहाले वनाः अमिगु खँ न्यनाः अमिगु धर्म पाखे मन छय् धुं कल ज्वी। उकिं ग्यानाः जि नेपाः वय्गु खँ फ्यासुया वन। छं नं ला जितः वय् हे माःकथं पौ छया हःगु महु। अले जि छुकिं साय्काः वय्गु मै, छं हे धा!

अथे धकाः जि मां लुममंगु मखु, न नेपाः हे लोमं, हानं छ नं

लोमके फुगु मखु, अथे छको-निको तुगः मझिका चवन कि हिसिला खने दयकः वइगु। गबले गबले मांझ नं थयंकः वइगु। थथे बराबर तुगः मझिका चंगु खनाः धोल्मां छको गनं चा हू वनेगु सलहा विल। उकि जि नं वने मंननिगु जुयाः जिपि निम्हं 'समे गुम्वा' सीकः वनेगु कोछिना। समेया लं नं चंपालि वने थें सल गयाः वंसां ज्यू, कुवाय् च्वनाः वंसां ज्यू। सल गयाः वन धाय् व निह्ना छखे छखे लाक वने मालिगुलि निम्हं नापं 'निहसु लिखां' निसं कुवाय् च्वनाः वना। चम्पालि वनाबले थें कुवा मन्वाकुसां छको निको कुवा वाराकारा सं, छको ला कुवा तिक नं न्हुल। अले हिसिला ग्यानाः "आमाला!" धकाः जिगु मुले भोसू वल। जि मसंरवन - भुवा वःबले जि नेपाले दुगु जूसा उखुनु निहने मां पाजुपिथाय् वना च्वंसां जि ला छें हे दइ। उकि छं नं अथे हे ग्यानाः काचाक जितः घय्पू वइगु ला मस्यु।

न्हागुसां जिपि समे थ्यन। पर्वतया लिक्क लाःगु थाय् जूगुलि अन लिक्क लिक्क यक पाक दु। पाकय् दुने दुने अनेक य पि तथा त गु दु। अन देवा व धुंया कुं यानाः उसुया, च्वनां च्वने मफय् यः। अन नेपाले तिनिह्यः वागूति पाय् धंगु थासे छचालं चाकलाक पक्खालं चाःहीका तःगु व पक्खाः म्वले छचालं चीभाः भोछुका तःगु। अन दुने गुगुं नेपाः पहःगु, गुगुं चिनिया पहःगु नं तःखा मझि छें दु। गुगुं २१ तं गुगुं ३१ तं जाःगु व आपाः ११ तं जाःगु। प्यकुने प्यंगः चीभाः नं दु। दध्वी लाक धया थें दलामं चाःहीका तःगु देगः दु १००० दं मयाक पुलांगु। स्वय् हे तं तं पौ दया भी महु सतः वान्कि वःगु, उकी दध्वी लाक चंगु तःगोगु श्रीखण्डयागु योसिं छगले ग्वया तःगु, उकी मूलुखाया खापाय् लाखय् ख्वाःपाः ल्यलं च्वीका तःगु व यःपि शाक्यमुनि पद्म सम्भव व मेमेपि यःपि यक दु। य या ल्यूने पाखे सिंया त्वाकः छगः तथा तःगु दु, स्वय् हे ग्यानापुसे च्वंक भ्वाथ गु। व लाखे दय् दंस न्हूगु तइगु, तर दच्छि दइबले त्याया ख्वाख्वा याना तइगु हँ। तलेयागु तय्

मन् ल्यैः व लहाःतुति नं यक खाया तःगु दु, अन वय् छ लाया तःगु व च्वय् तुपः तलभारया कथापौ ताना तःगु खनेदु। ह्य हे जिरिङ्ग जिरिङ्ग मि। हथाय् पथासं थ्व फुक स्वयाः अन दुपि घेलुं तय्त छुं भति दान यानाः जिपि उखुनु हे लिहाँ वया। ३ न्हु दुखुनु लहासा थ्यन।

भीगु छें सिं साहाः आपाःगु छें जुया भुखां छुं मजू खनी। उकि दय्के नं मा गु मखुत। तर मेमेपि छें स्यंपिसं भूकम्प पीडितोद्धार संस्थाय् ध्यवा त्याय् कयाः थथ पिनि छें धमाधम दय्कां चंगु व वलन्तपुलि निसं तथ्यंक धीर शम्शेरया सालिक व पुठांभंसारंनिसं वंगः फोचाय्क न्हूगु सडक दय्कुगु खं नं सिल। छगु गजवगु खं थ्व नं सिल - दुना चंगु यलया महाबौद्ध देग ल्हनेत खर्च मदयाः दां त्याय् माःबले गुथिया थकालिपिसं थःपिनि छें-वुं दि च्वयाः भूकम्प पीडितोद्धार संस्थाय् दां त्यानाः देगः दन हँ मखुला ? गज्याःगु धार्मिक भावना, गज्याःगु कलाप्रियता व ? ख नं थ्व हे शिल्प कलां यानाः नेपाःया न्हाय् च्वना चंगु दु, विश्वं हना तःगु दु।

धात्थें मै, जि थन छिपि निम्हं उत्थें च्वं धाय्बले व पत्याः मजू, खालि वयात हंकेत, हेभाय् चभाय् याय्त जक धाःगु थें याइगु, अथे हे छ नं वयात 'हिसिला' अथवा 'लहामु' धकाः सःतेबले छन्त सःता च्वनागु थें च्वं, व नाप च्वना च्वनेबले नेपाले छ नाप च्वना च्वनागु थें धाःसा पत्याः ज्वी मखु, व जि वांलाक स्यू।

छन्हुया खं, पासा छह्यस्या नेपालं वकु, थ्यंकः वया चंगु। वकु छ्याःबले तिनिखाःलंया वकु खनाः व छवकुं जि न्याना हया। कथाय् थ्यंकाः वंजाःतय्त वकु छ्याकाः स्वयाबले फुकं भिभिगु पुलांपुलांगु तिनिखाःया थारु लं। उकी छपाः हे जरु तासया लं दु, दबलगु ज्वाल थीगु तासयागु। थय्क कया स्वयां व ला चौबन्दी जुया च्वन। उकि मेगु लं फुक गमे दुत छुके बियाः व छपाः अथें फुंगया यःनेसं दिका तथा। बइनी ह्याः ली स्वय् सिधय्काः वंजाःत काहाँ वने धुंसेलि दुने

कथाय् लासालिसा चक्का च्वंहा हिसिलायात स ता । व पिहाँ बल ।
अले जि धया — स्वय्, आम तःपाः लं त्वया छु । व 'छाय् ?' धकाः
न्हिला च्वन, लं मत्वः । अले जि हासाक लं त्वकाः हांजुया याने व
तासया लं फिकाः पुतु नं छिका बिया । उगु ताके भीथाय् कथाय्
भिभिगु चिनिया रेसम नं यक् दया च्वंगु — गुगुं वुत्ता दुगु गुगुं वुत्ता
मदुगु । वुत्ता मदुगु गुलाफि रंगगु रेसम लाला च्यानाः कँचिमाका यानाः
सिकाबले वयागु घुतुंया कारचिपि वुत्ता दुगंछि बांलाक पिच्वया
बल । उकियात ल्वय्क लुं वुत्ता दुगु पत्ती रेसम छक्क जि न्हिने हे माला
तयागु दु, खुकुति हाकःगु, उकि वयात प्वीकाः गां न्येका बियाबले सु
वयात नेवाःनी मखु धाइहा ! अले जि धया — लु थौं आराः (अय्लाः)
त्वंगेगु मखुला हिसिला ? वं न्हिलाः लहाः थच्वय्क गमे च्वंगु अन्ति
कयाः मझाः पहलं अय्लाः लुबले जि भसंक वन — लं, छिमि किजाया
व्याहाबले अय्लाः लुनाः लिहाँ वयाः भरीकथाय् जिमित अय्लाः
त्वंकः वःगु, किजा नापं अथे हे तासया लनं फिनाः । अले जि पी मफुत
लहाः ज्वनाः हस्त्यंक साला कया । तर जि “य” धकाः छंगु नां
काल खनी । वं मथुयाः त्वलहँ स्वया च्वन ।

अथे हे वसतं पुंकाः नापं छको पाकोर चाःछू वने धयां गन खँ
न्यं, अथे पिहाँ वनेगु ला गन छको-निको बहनी वसतं जक तीकेत नं
गुलि थाकु, कथाया खापा मतिसे वं गबले मयू । अयूनं न्हिन्हि निम्हं
बहिली देके वनां च्वना ल्यूल्गु छ नाप वया च्वं थें च्वंक । अथे हे छको
श्रीपञ्चमीखुनु कामकुस्यो देके वना । लहासा देशं पूर्व पाखे कय्छिति
वनाः महामञ्जुश्रीया लव्हँया मूर्ति दु । थव लाखे महाचीनं नेपाः
बिज्याःबले थन छको भास फिनाः तिनि बिज्यागु हँ । नेवाःत सकलें
धया थें वया च्वंगु व खचरात नं दु । भी थाय् मचातय्त्त मञ्जुश्री
यंकाः 'नमोवागी' याके थें थन नं खचरा मचातय्त्त उगुनुं निसें आखः
स्थनेगु चलन दु । दँय् छको छेवापालायापिसं जात्रा नं योइगु दु । गुगुं

गुगुं पालाया अन वनाः दापा नं थाः वनेमाः । जिगु जीवनया थव दँ
वदँ जितः तस्सकं न्याइपु ताः । जि ई वंगु मचाः गोदँ गोदँ ! उथाय्
हे मचाहा पोतला लामाजु लहासाय् दुत दइगु धकाः खँ ताय् दत ।

धाथें लहासा दे छगुलि छाय्पा हल । थाक्चे थाक्चे ताचो
व्वय्कल, लँय् लँय् नं दिकमान प्यना हल । लहासा थ्यने बाःछिति न्ह्यः
काजि छह व गुम्बा गुम्बां लामात नं वनाः लँय् वन । अननिसें लुं यागु
पालकी तयाः बाजं-विजं नं थाकाः हल धाल ।

लहासा थ्यनिखुनु सेरा, घेपुं, गन्धेन् स्वंगु गुम्बायां मुख्य मुख्यपि
लामापि, काजिपि, अंग्रेजीमिसनया नायोह्म साहेब, चिनिया अम्बा,
दुप्पाया पंघु व भी वकील साहेबपि नं सकलें वना च्वंगु । सँदेया फुक
धया थें सिपाहीत व लहासादे छगुलि थें न्ह्याना च्वंगु खुसि थें मनूत
वना च्वंगु । नेवाःत नं थःथः पालाकतः मुनाः पाला थकालि न्ह्यःन्ह्यः
तयाः वना च्वंगु । रंगरंगया ध्वाय् ज्वनाः फयांफच्छि तःजिक वसतं
तियाः लँय् जःखः दनाच्वंपि सँय्-समीनीत नं उत्तिकं । लामाया पालिक
खने दय् व धुं च्याकाः लय् लय् तातां “किपय् निमा स्यासो” (भीगु
लय्ताया दिन वल) धकाः थक्क थक्क हाला च्वन, मे लुनाः ककःछुना
च्वन । बाजं थाःपि, स्वाहालि पूषि नं उलिहं मदु । गुलि प्याखं हुया
वःपि । जात्रा हयाः पाकोरया लं बहिली छको दुत यंकल । अनं नोवुं
लिखा । अनया चहचकी धाय् हे मोल व ला भी यँया वसन्तपुर धाय्
थें लहासाया ग्रीष्मपुर धाःसां ज्यू — तांनवइबले लामा च्वनेत दय्का तःगु
निगूगु लाय्कू । उकीसनं ध्वजा पताकां छाय्पा तःबले यानं स्वय् गुगुं
तःपाःगु पौभाः व्वया तः थें ।

छुं दिन लिपा साइते लाकाः पंतलाय् लामायात विश्ववज्रया
चिं दुगु सिहासने बिज्यांकाः राज्याभिषेक बिल । न्हापाया थें स्वंगुलि
गुम्बाया मुख्य मुख्य लामापि, काजिपि व जःला खःला देशया राजप्र-
तिनिधिपि नं सकलें सःता तःगु दु । अन मेमेगु पूजा-पाठ सिधय् सँय्

सरकार पाखें लुँयागु अष्टमङ्गल व सप्त स्तन नं उपहार द्रव्यलाल ।
सकसिनं खाता छायाः दर्शन याना बल । लामाया पाखें नं सकसिनं
खाता, कोखा प्रसाद बिया हल । थुनिया लिचो गोन्हु तक लहासाय्
उत्सव जुयां चन ।

भीथाय् नेपाले नं न्हापा न्हापा गबलें मजू थें भी जुजु त्रिभुवनया
राज्याभिषेक नीन्यादं दुगु सिलभर जुबिली नं अथे हे मखाः धूम धाम
जुल ज्वी मखुला ?

थ्व खँ छन्त धाय् माःगु मखु भी नेवाःत धयापि वडा गजबपि,
गुथि गाना, नखः चखः, जात्रा उत्सव धाल धाय् व मिखां मखंपि ।
छें-बुँ, मचा-खाचा फुक तोताः वने ज्याय्या निंति थन थ्यंक वया
चवना तं नखः चखः जक हना चवना नं मगानाः दिगुपूजा, दिसिपूजा
नापं न्याय्का चवनिपि । पालाय् छगू दिगूयापि जक मखइगुलि दिगु
पूजा छगू पालाय् मन्याः, गुलिगुलिस्यां साहुया दिगु पूजाया दिने
कथाय् हे जक न्याय्कइगु । दिसिपूजा व गातिलाः धाःसा तःगू हे
पालाय् न्याय्के माः । भी पालाया गातिलाः जि नं धलं दं वनागु ।
मण्डः जक हति हति मखु कि चवनेगु नं सकसिनं तुतः चवने थें चवने
माःगु जुया चन । पालाकतःपिसं जितः हाय्कां चन — 'थुगुसी हिसि-
लायात नं पां धलं दंकेगु' धकाः । अले जि लुमन-भी छकः ककायाथाय्
तिलाः धलं दं वनागु । गर च्वंक न्हाइगुसे च्वं लुमनिंला वाखने छह
राजकुमारीया ह्य बांवा वयान याःबले जितः कुति न्यानागु ? लिपा
जिमि धलं दने धुंकाः सिफं लवले छयँः ल्वाकेत थय्क स्वयां देपाय् छ
मदु । नुगः भचा गरखेसे चवनावल । अले मेगु छगू मचाबले न्यना
तयागु खँ नं लुमनावल - ककाया लाखे न्हापा कलाः मयो हँ, ३ दं थकं
नापं अष्टमी व्रत दं वले अथें यया वन हँ । जि ला लुमनं - अंशवन्दाया
खँय् अबु व ककाया नतुसुतु मदु हँ, मां व ममाजुया नं ध्यंध्यं धाः हँ
अय्सां अबले नेपाले भिक्षुत व अनागारिकात मदुनिगुलि अबु मां,

कका-मुमापिन्त भिक्षु जू वा, अनागारिका जूवा धाःपि नं मदुनि । लिपा
लिपा आगमे व मेमेगु फुकी भजे ववं अन सिन्हः तीबले अनि याय्
माःगुलि अथें नतुसुतु दया वन हँ । थथे मेमेगु खँय् न्हाक ल्वापु ख्यापु
दःसां फुकी-गुथि इत्यादिया पुलंगु महायानी थिति रीति य नाः आः
तक नं फुकी वाकाय् मिले चले जुया चन तिनि धाय् माल । थन थ्यंक
वयाः नं पाला स्वनाः पूजा आजा याना हे चवना मे चचा हाला हे
चवना, अज्ज नेपाल भाषाया नं छुं सेवा याना हे चवना धाय् माल ।
ने. सं. १००६ साले पाखे हर्षमान साहुं नेपाः आखःया थासा दय्काः
छापे याना वन । भी आज्जुपिसं नं गोगू गोगू सफू लुँ आखलं च्वका
हया तःगु दु, छं देकुनी खँ हे खं । आः लिपा लिपा नं खाता वहि चिथि
पत्र जक नेपाल भाषां च्वया चवनागु मखु कि सारनाथं पिहाँ वया च्वंगु
'धर्म दूत' पत्रिकाय् नेपाल भाषा नं दुध्याकेत आमकन नेपालं ग्राहक-
पिसं च्वया छः थें थनं नं १६११ कंपनी चन्दाया नापं तःपौ मछि पौ
च्वया छयागु दु । पासापिसं लेख नं बराबर च्वया छगु दु । अथे हे
लिपा लिपा नं 'चवसा पासा', 'नेपाल भाषा परिपद', 'नेपाल भाषा
विकास मण्डल' यात सफू पिकाय्त व 'नेपाल भाषा पत्रिका' यात
स्वाका तय्क नं चन्दा सुंकाः छया हयागु दु । हानं नेपाः आख या
टाइप दय्केत नं छया हयागु दु ।

तर मै, निह फुनाः चा वइ थें जिगु थज्यागु सुखया निह नं
मचाय्क फुनाः दुःखया ताःहाःगु चा बल - गबलें गबलें हे सुथ मज्जी-
कथं । धाल्यें मै, अबले ५ दँया दुःखया दुने छगू आशा सुला च्वंगु दु -
छ नाप लाइतिनि धयागु, छं न्हापाया थें हे माया-मतिना याइतिनि
धयागु । तर थ्व लिपायागु पत्तो दुःख ला शुद्ध आमैया चाया अन्धकार-
गनं आशाया जः तक हे मदुगु । उकि जि ख्वय', साप हे ख्वया,
मिजंत धयापि थपाय्चो ख्वःपि सुं हे मदु धाय्क ख्वया । ख्व नं गय्
मख्वय्गु, मां मदु दुःख तंक विचाः संचाः याना च्वंछ धोलमा जक मन्त

धयां जीवनयात थात्थे ड्यू दां तथा च्वंछ 'हिसिल्लामु' नं वाना वेंसे लि ।

न्हापां ला ज्वर भचा वःगु । छुं-छां मनुकुसे का लः भचा भचा त्वंकाः अथे तथा । २ न्हु दया नं ज्वर काहाँ मवसेलि चिनिया वैद्य हयाः क्यना, वं नं ज्वर ककाय् मफु । लिपा पासापिसं धिकिल्लिखाया डाक्टर क्यनेगु सल्ला बिल । थात्थे अन वनाः हालाः ख्वयाः डाक्टरयात वल्ल व्वना हयाः क्यना । आन्टिप्लोजीसन तयकल, छु छु वासः नवल, छु छु इजेक्सन यात, जि ला न्हापाया थें धकाः आशा याना च्वनागु फुक सिन्ति, न्हाः वय्कुगु धकाः च्वनां मिखा तिम्युगु तिसितं याना विल । मचा छ्छ जक दुगुसां मै, वया ख्वाः स्वयाः व नाप क्षिताः मन तथा च्वने दइगु । व नं दुगु मखु । जितः ह्याँय् ह्याँय् ख्वय्क जिगु ज्यू ल्हया यने थें यंकल, जितः दिपे तक हे व्वना मयंकु । पासापि पिवाः च्वनाः कथाय् तुं कुना तल । छको ला सिना हे वने मा स्ति वल । लिपा ज्ञानमासिं भिक्षुपिं थें घेलुं जूवने ला धकाः नं मती वल । तर ८१० न्हु तक पाळाकतःपिसं मतोतु, व वया नं व वया नं अपिं सिपाहीं पाः च्वने थें पाः च्वना च्वन । वाःक्षिति दसेलि अमिसं जितः नेपाः वनेगु सल्ला बिल । जि नं छको ला छ लुमनाः छंगु न्हापा न्हापायागु, मतिना लुमनाः व हे वय् ला धकाः नं मती वल । तर छंगु—जि नेपाः कहाँ वयाबले २ दँ तक नाप च्वना नं, सकतां ज्या-खँ न्हापाया थें याना च्वना नं मन छुकिं छुकिं साय्का च्वंगु व्यवहार लुमनाः जि भपुकाः बल—आः ला हानं १५१६ दँ मझि अप्पो बासि ज्वी धुं कुबले छु याइ-छु मयाइ, न हे मतुल धाःसा, ख्वाः हे मस्वत धाःसा छु याय् ! उकीसनं उथाय् थ्यं बले ६० साल पर्वे राजनीति मुदाय् लापिं मनूतय् नाप नेपाल भाषाया लेखकपिनं तोता हय् धुं कुगु व श्री ३ जुद्ध शम्शेर राजर्षि पद काःगुलि श्री ३ पद्म शम्शेर जुजु जुयाः लंकां वःगु बौद्ध शिष्टमण्डलया सिफारिसं पितिता त.पिं भिक्षुपिं नं नेपाः दुकाय् धुं कुगुलि

नेपाले हानं थेरवादी धर्म प्रचार जुयाः मिसात नं धमाधम अनागारिका जुया च्वन धाःबले जि नेपाः बयां हानं छं जितः थः नालितिति धकाः जि विश्वास हे याय् मफुत, मवया । तर याकःचा ज्वीव पिने कथाय् च्वनां च्वने मछुइगु, दुने कथाय् जक मिखा वनिगु । अन नं मिखां माःगु वस्तु ल्वाके मफयाः ख्वबि जक मुंका हइगु । उथाय् थ्यं बले छंगु पौ नं मवय् धुं कल धाःसां जिल । उकिं जि बराबर हामुचि गुम्बाय् वनेगु याना । अथे ला वःदँ मझि ल्हासाय् च्वने धुना नं घेलुं त नाप धर्मया खँ ल्हाय् गाक् भाय् जि मसःनि, अथे नं अनया व शीलवान्पिं घेलुं-तय्गु खँ न्य जक न्यनेबले नं मन हे याउँसे च्वं । अनं लिहाँ वय्बले आःला नुगः मझिंके मखु, ख्वय् मखु, हाले मखु धकाः मती तथा वयगु, तर बहनी याकःचा ज्वीव व हे मुलुया व हे सुका, भसुकाःया माः चाःहीकाः सुथ याय्गु ।

उखे चीने कम्युनिष्टसं त्याकाः न्हापा न्हापा स्वयाः चीन यक् बःलाका ह गु व चीन-तिब्बत सीमाय् नं यक् चीनी फौज वया च्वन धाःगु हल्ला वया च्वंगुलि अमेरिका, बिलायत, भारत व नेपाले नं सहायताया निंति च्वया छुगु थें, उकिया छुं सन्तोषजनक लिसः मवः-गुली नं तिब्बतया पूर्व पाखे गडबड जुल खनी । छुं दिन खाम्पातसें ल्वानाः पना ला तल, अय्सां सँय् सरकार ग्यानाः पोतला लामायात राज्यभार बीगु लामा १८ दँ दय्काःतिनि बीगु दस्तुर दुसां १५ दँ जक फूहल लामायात ज्योतिष लामातसें ज्यू, बीमाः धाय्काः समारोह पूर्वक राज्यभार लःल्हात । लामाया नामं सम्पूर्ण क्षमादान बियाः जेले दक वन्दीत नं तोता बिल ।

अय्सां तिब्बती क्षेत्रे कयलाः वया च्वंगु चीनीपल्टनयात लामां लिं छय मफु, उकिं काजिपिसं राष्ट्रीय सभा सःताः सभां लामायात यातुङ्ग बिसि वने माः धकाः धाय्कल थें राजकाज चले याय् भिक्षु लोसांग ताशी व श्री लुबङ्गवा निहसित लःल्हानाः लामा यातुङ्ग थ्यन ।

नापं यक हे लु-वहः ज्वारात नं वकुवकु चिकाः यंकाः सिक्किमे तुंगाः
महुयाः स्वथना तल धाल ।

थुखे भी वकिल अडाय सुनां सुनां जिगु विषये छु छु खँ थ्यंका
तल मस्यु छन्हु जितः वकिउ साहेबं सःतके हयाः खँय् खँय् वयकाः
नेपाः हुँ धनाः धया दिल । अले जि वयकःयात “विचाः ला अथे हे
याना च्वना, २३ गू ज्या सिधय्के मफयाः विस्तार जुया च्वन” धकाः
तोह तथा वया । अथे लां लां दया वन, तर जिगु द हे महुगु ज्या गन
सिधइ ! अले कपटान साहेब तंस्वेकादी धकाः ग्यानाः वयकःया वचं तय
थँ ज्वी, मने भचा सां शान्ति नं वइ धयागु आशां छको लहासादे
त्वःताः नेकुर (तीर्थ चाहू) वनेगु विचाः याना । धाथें उथाय् हे
शारिपुत्र भौङ्गल्यायनपनि अस्थिधातु विलायतं हिन्दुस्ताने हइगु थ्व
हे चिकुलां धाःगुलि २३ ह सँय् पासापि नाप जि नं वनेगु कोछिना ।

धाथें ताथ्ये-तिथ्ये वन्दोवस्त यानाः ४१५ ह सँय् पासापि नाप
जि लहासां पिहाँ वया । कालिम्पोंगे २३ न्हु विस्तार जूगुलि जिपि
१३१ ४६ खुनु सुथे तिनि कलकत्ता थ्यन । उखुनु हे अस्थि ध तु
कलकत्ता थ्यनिगु जुया च्वन । इकि बासे थःपिनि पो-पी सकतां दिकाः
च्वां वनाबले राजभवनया न्हःनेसं जुल्स नाप लात । चौकडी वगिले
च्वनाः पश्चिम बंगालया गभर्नर श्री कैलाश नाथ काटजुं ज्वना भाःगु
अग्र श्रावकपिनि अस्थिधातु राजभवने थतयंकाः पूजा जुल ।

उखुनु हे सन्ध्या ५ वजेती भारतया प्रधानमन्त्री पं. जवाहरलाल
नेहरू देश देशया प्रतिनिधिपिनि न्हःने व अस्थि दुगु चैल लः लहाना
कयाः उकी च्वंगु भौ वि तःछ्यानाः सकसितं दर्शन विल । नापं
नेपा.या कोँचाखि व वय् पुया च्वंगु दु नेपाः हे लुमंक । अन चच्छि
परित्राण पाठ व विविध वाद्यवादन जुल धाल । जिपि जक बौद्धयात्रीत
फुक छवा हे छँ तय्गु याना तःगु दु धाःगुलि व खुतँ जाःगु ३१ नंबर
सेंट्रल एभेन्यू छँ वनाः सँय् समीनीत च्वना च्वंगु तँय् च्वं वना । कन्है

खुनु नं अथे हे देश देशया बाजंथा नापं बौद्ध प्रतिनिधिपि सहित धातु
जात्रा यानाः धर्मतला मैदाने दय्का तःगु मच्चे यंकाः स्वागत सभा
जुल । अन लंका, बर्मा, चीन, श्याम, तिब्बत, भूटान, भारत, भोपाल व
नेपाल आदि देशया बौद्ध प्रतिनिधिपिनि भाषण नं जुल । लिपा सभा
सिधय्काः अनंनिसं जात्रा याना यंकाः कालेज स्कायरया धर्मराजिक
चैल विहारे तल । थ्व ला छं नं खँ हे खँ ज्वी ।

वं कन्है खुनु ‘धर्मोदय सभा या वार्षिक अधिवेशन व हे त खा
छँ जूगु । जि नं धर्मोदय सभाया मेम्बर जूगुलि स्वःवना । सभाय्
मिसातय् पुचले छ नं च्वना च्वंगु व थःथवे जिगु हे विषये खँ लहाना
च्वंगु थें च्वंगुलि जिगु मने अनेक खँ चाःचाः हिलाः सभाया भाषण,
रिपोर्ट, पुरस्कारया घोषणा इत्यादि छुं हे मताल, मथुल, याकन पिहाँ
वय् माःसि वल । लिपा सभा सिधय्काः वय् लनाबले नेपाः छहस्यां
“छितः छय् उखे भासँ धाल” धकाः जितः वचना यंकल । तःज्यागु भांग्रां
कथा खुया तःथाय् मेगु छगू कथाय् अनागारिकापिनि नापं छ नं च्वना
च्वंगु । अन मेमेपि मिसातय् नापं छिमि छुखेमस्यु माया धाःह फुकी
तता छह नं दु । वं जितः “भासँ भाजु” धयाः छंन्त मिखा भाय् यात ।
छं मं महु मं महु दना वयाः जितः भागि यात । अबले नेपाः वयाबले
नं जि सँय् हे तिनि, तःपाः लं हे फिना च्वनागु तिनि, तर अन जक
स्वय् हे थी मस्योपिन्त थी थी याइ थें, छुं घच्चायापुगु वस्तु मज्जि
मगानाः थी थें या गु छाय् व ला छं जकं सो । जि ला ह-ह्वि हे गरखेसे
च्वनाः विज्यासले च्वसिन्हः छाय्काबले अनियाःगु व न्हापां लहासा
वयाखुनु बेला कयाबले अनि याःगु लुमंसे वल । जि पलख हे अन च्वना
च्वने माःसि मवल । जिगु ख्वाः गय् च्वन थें मस्यु, छिमि व हे ततां
थःथिति पहलं “थुकथं हे नेपाः भाय्गु मुखुला भाजु ? स्वया दिसँ आः
ला नेपाः मभासँ मजिल ।” धकाः छं पाखे स्वत । जि नं स्वया । छंगु
ख्वाः कुतु वइ थें च्वं । जि “अं तीर्थ छको नि चाःहिला स्वय् ” धकाः

धयाकथं जि अनं पिच्चां वया । वं हानं दुनें तुं धया हल-अनं ला
नेपाः हे भाय् मालि । धात्थें वयागु थ्व खँयात ल्वय्क छंके नं मने जिगु
नितिं भतिचा जक नं थाय् दुगु जूसा गुलि ज्यूगु । महु, उकिं जि तुरन्त
हे पासापिं व्वनाः चिनिया पाराय् च्वं वना । वयां कन्हेखुनु हे जिपिं
बौद्धतीर्थ चाःहुलेत कलकत्तां पिहाँ नं वना छ्या ।

१६ ताराख नेपाली बौद्धपिं सकलें व हे सेंट्रल एभेन्यूया छेनिसें
महाबोधि विहार तक धुज्या बुज्या, धिमे, गुंलाबाजं, कोँ चारि, दापा,
ज्ञानमाला भजन, तुतः व्वपिं भाजुपिं व धुं धुपाय्-स्वां धकि इत्यादि
ज्वपिं मय्जुपिं सहित वनाः सामुहिक पूजा जुल धाल, छ नं ला वं ज्वी
मखु ला ? जिमिसं छुं मखं । खंपिसं धाल-दकले ल्यूने च्वंगु कतः
देखायागु पूजाकुया ल्यूने पँयताः खलः छगू नं दुगु जूसा धात्थें नेपाले
वःकाःवनागु थें च्वनिगु ।

जिपिं बुद्धगया, सारनाथ, राजगिरि, बलरामपुर, कुशीनगर
चाःहिलाः दकले लिपा लुम्बिनी नं वना वया । अन चाःहिला च्वत्तले
वाखने जक न्यना तयागु भगवानया जोवन चरित्र सम्बन्धी थाय्
मिखां खंबले न्हाइपुसे हे च्वन । धात्थें नीन्यासः दँ न्ह्यः व व थाय्या
गज्याःगु चहचकि ज्वी धयागु नं मने बुलुक लुया वल ।

धात्थेंगु खँ ला मै, लुम्बिनी छथाय् थःगु हे नेपाल जूगुलिं मेगु
छुं फिलिमिलि महुसां भगवान्या जन्म भूमि व मिसात नं फुक पर्सिं हे
सिना तःपिं जूगुलिं जितः मने छुं मझिं मजू । मेमे थाय् ला भगवानया
मय्जुगु थाय् सिल, खन, उलि हे सिवाय् जितः ला सहरे सहरे
चाःहिले अपाय्चो न्हाइपु मताः । छाय् धाःसा जि जुल नेवाः, कैचि
मार्का पर्सिं तोमपूगु पिलाक व न्हय्कु हाकः गां भुत्तु भुना नं मझाले
माःपिं मिसात स्वयाः हे अप्पोह्य, हानं थन नं गनं ला पिमज्वय्क
ख्वातुसे च्वंगु तःपालनं फिना तःपिं आच्याःपिं नाप बुला च्वनाह्य ।
अन लां न्हाथासं त्वीसे त्वीसे च्वंगु पिलाक जक मखु पुलितः पुलितः

थ्यंक खनेदुगु मीम पोसाकं फिनाः लहुकु लहुकुसंक नुगःपा व्वया जूपिं
भुयूनीत ध्वदुइगु, खंपिं स्वइपिनि हे मझालापुसे च्वं ।

न्हागुसां जिपिं हानं कलकत्ता लिथ्यँस्यलि चिनिया पाराया
ककः थ्यंक हाकुगु सुरुवाः न्ह्याना तःपिं चिनियानीत खनाःतिनि भचा
जिगु मिखा याउँल । अन जिपिं हानं नः३ ला हे च्वने माल । छाय्
धाःसा कलकत्ता थ्यंक वयावले मालताल भचा गाक्क ज्वना मवसे गय्
वने, उकिं मालताल माःजुजुं बजारे जक मखु नेवाः साहुपिनि कोथी नं
उखे थुखे वने माःबले लहासा नेवाःतय् विपये अनेक खँ नं जुल-नेवा-
नीतसें दुखसिया च्वंगु व गुलिं गुलिं व याय् थ्व याय् मदयाः पय्नं
वंगु नं । अय्सां मै, छं अपाय्चो हेला याना वंगु गुलिचां महुनिसां जि
छन्त लोमंके मफुनि, मल मल जि अवले नेपाः वयावले धकि जाय्क
ग्वाः ग्वे-स्वां व्वति लःलहाय् हःगु थौं थें लुमनि । मेगु अवले लाखे छह
साहु मचां १०।१२ दँ लहासाय् च्वनाः नं ज्या तीप्यंके मफयाः नेपाः
काहाँ वय् मखना च्वंगुलिं थःगु नामे च्वनाः धर्म कर्म याना च्वंहा कलातं
नय्नय् हे मखंका च्वन धयागु खँ सियाः तायाः नं थमं छुं कत विया
हय् मफुगुलिं “जि नेपाः वय् हे फइ मखुत, छं माःगु वन्दोवस्त यानाः
मेथाय् वना छ्वा ।” धकाः पारपत्र पौ च्वया हःबले व मिसां नुगः
मझिकाः ख्वख्वं पय्नं वन धाःथें छला अथे वनिह्य हे मखुत । छगू ला
छ बुढो हे जुल धाःसां जिल । हानं वया थें नय् मखं धयागु नं ला छं
महु । उकिं थ्व खँय् बिचाः याय् माःगु हे मखुत ।

तर जि अन कलकत्ताय् छगू-निगू खँ मेगु नं सिल-छन्त लाखे
भन्तेपिसं अनागारिका छीत व्वना हःगु हँ, लिपा जि दु धयागु सियाः
भाःतयागु वचं मदय्क मज्यू धकाः कुशीनगरं लिता छ्या हःगु धाल,
मखु ला ? छाय् थें मस्यु, छं अवले न्यना नं महः, हानं जिके न्यना
च्वने माःगु नं ला मखुत, छगू प्रकारं जितः नेपाः काहाँ मवइह्य जूबले
सच्चिनीदँ आयु बिया तय् धुं कल धाःसां जिल । अय्नं मै, छन्त अथे

पिपवाना यंकेगु मस्वसे जन्मकाङ्छि ब्रह्मचारी ज्वी धकाः च्वना च्वंहा
छह्म ऋषि लय् नाप लाःहा मिसायाके स्वां छफो कयाः भगवान्यात
द्रहलपाः दर्शन याःबले भगवानं व हे मिसा नाप ह्याः ह्याः धाय्क ह्येकाः
हंका छुः थें छन्त नं छें हे च्वनाः दान-धर्म यानाः निह्म बांलाक मिले
जुयाः च्वंहुं धकाः न्वानाः जितः पौ च्वके व्यूगु जूसा न्हापा न्हापा
मखुसां हिसिला मदुबले ला जि वकील साहेव तंम्वेकइ धकाः ग्यानाः
अथे नेकुर वनेमोक पालाकतःपिसं धाःबले हे नेपाः वय्गु खइ । अथेनं छं
अपाय्चो अनागारिका हे जुयाः भन्तेपिनिगु सेवा याय्गु मन जूसा
अबले नं जि पनागु मखु. आः नं जि पने मखु. छं स्वयाः यथे या । वरु
बांलाक विचाः यानाः पुलांपि अनागारिकापि नाप नं सल्हा यानाः जक
वनेगु भिनि । लिपा पिहाँ वने धुंकाः “न्यना दे सुखी च्वना दे दुखी”
ज्वीव मज्यू ।

धाथें कलकत्ताया छंगु व्यवहारं जि नं छ खनाः तंम्वेकाः वा
नुगले स्याकाः भन्तेपिथाय् वंगु जूसा जितः नं अथे हे मखाः भिक्षु
जू वा धाङ्गु ज्वी । तर मै, छं नं छको विचाः याना स्व, भन्तेपिसं
बांलाक पात्रापात्रया विचाः मयासे, भिक्षु छीबले न्यने माःगु १ गू प्रश्न
मध्ये छ शिक्षित जू मखुला ?’ धकाः मन्यंसे भुखाय् च्वःबले छय्ज्याय्
ज्याभि तय् थें लाक थाकसित भिक्षु व अनागारिका छुना व्यूबले छगू
ला मेमेगु धमेयापिनि न्ह्याःने धर्म सम्बाद-शास्त्रार्थ याय्गु ला गन छगू-
निगू साधारण न्ह्यसःया लिस नापं बी फुपि मदयकाः मझालापुका
च्वने माल । मेगु छुं छगू हू वय्वं दुनेनिसं त्याग भावना मवय्कं भिक्षु
वा अनागारिका जूपि जूबले लिपा नं छुं अज्याःगु हे चिकिचाधंगु खं
नं मन हिलेफुगु हे जुल, उकिं गुलिखे भिक्षुत लोवा ज्वी (स्यने) नं धुंकल
धाल, गुलि अनागारिकापि नेपाः थ्यनेवं लिहाँ तुं वन धाल मखुला ?
अज्ज गुलि भिक्षुपि न्ह्याथाय् वंसां मिसात ल्यूल्यू न्ह्यः न्ह्यः तया ज्वीपि,
गुलिं छह्म हे मिसा नाप दुवाते दुवाते दनाः दनाः गबय्त्तनि गबय्त्त

मिसातय् व व्यकुं च्यानाः खं ल्हाना च्वनि थें खं ल्हाना च्वनिपि, हानं
गुलिं गुलिं ला छह्म हे मिसा नाप न्ह्याथासं नाप नाप जुया नं मोटरे-वसे
नापं छगू हे सीटे प्यपुं क च्वना ज्वीपि दु धकाः धाल, खः मखु मस्यु ।

न्ह्यागु थजु जिपि ल्हासा थ्यंबले पोतला लामाजुं चीनी प्रति-
निधि जनरल चङ्ग चिन-ऊयात यातुं गे नाप लानाः ल्हासा छ्याः हानं
थः नं ल्हासा थ्यंका च्वने धुंकुगु । उथाय् हे चीनी फौज ल्हासाय्
वल । फुकं सिपाहीत न्ह्यंगु थाय् मदुगुलि नोवुं लिखाया सत्तिक पाल
ग्वयाः च्वन । गुलिं छें छें बालं च्वन । गुलिसितं छें न्यानाः नं तल ।
थुथाय्गु व्यापार थुलि जुल उलि जुल धकाः ल्याः ल्याय् मफु ।
दच्छियात गाः थें च्वंका ह्यागु माल तिहा हे मदवं फुत । उथाय् जि
नाकं व्यापारे वास्ता मतय् धुन । उकिं वंजाःतसें हे मेगु मालताल यक
हाना छुत थें । व नं फुक अथे हे धाक धाक पुलाः यंकल । थुथाय्
नेवाःतय्गु त्यें फुइ हे मेगु । भिभिगु कश्मेराया कोट-पाइन्ट, नय्त्वेनेगु
खर्चया खं ल्हानां व्याःगु मखु । छको निको चिनिया अफसरत वइबले
अमिसं खनि धकाः ग्यानाः म्ही नेपाले ह्याउँ वेतालित खनेव अन्ति सुचुके
थें अय्लाः सिसि सुचुकः ज्वीमाः ।

थुथाय् हे ल्हासाया कोतात, घेलुंत, व्यापारीत व मेपि मनूत नं
दुगु प्रतिनिधि मण्डल चीनं लिथ्यंगु व अमि पाखें चीन नापया सम्बन्ध
वांलाना वःगु दु धवागु खं न्यने दुगु व हानं चीने ज्वीगु राष्ट्रीय
सभाय् व्वति काय्त्त धकाः पोतला लामाजुया नायक्त्वे छगू मेगु
प्रतिनिधि मण्डल नं वन । थुकिं यानाः भचा गाक्क हे चिनियात लय्ताः
थें च्वं । उकिं उगु ताके ल्हासाय् न्ह्याइपुसे हे च्वं । म्ही नेवाःतय्त्त ला
चिनियातसें भचा अप्पो हे स्वया ह्या च्वंगु दु । सय्त्तय् नाप नं उथाय्
अमि व्यवहार वां हे लाः । बराबर पार्टि सःतइगु । नकाः त्वंका; साप
हे माने याना हइगु । गवर्लें गवर्लें म्ही नेपाली वाणिज्यसंघं नं सःताः
पाहाँ याना छय्गु ।

चिनियातय् राष्ट्रीय पर्व । अमि थाय् क्याम्पे “ग्यामिलोसा स्युकुलोसा” धाइ थें भोँस्वां, भोँमालं छायापा तल । स्वय् हे अप्सरात स्वर्गतं कहाँ वया च्वन धाय् लवय्क गाचो व्वः थें रंगरंगया भोँवाला घाना तःगु बेल्हन व्वय्का तःगु । सकस्यां व हे वँचुगु, कक्कुइ श्यंक ताख दुगु कोट व मिसातय् जक पुलि कय् तक वःगु तम्ब च्वंगु घुंदि दुगु चिनिया लं । रंग रंगया रेसमी ध्वाँय् व वुत्ता वुत्ता थें च्वंगु चिनिया आखः दुगु ख्वतु भोँया ग्वरः व्वय्काः छगू जुल्लस वल । दश्वी दश्वी अध्यक्ष माऊचे तुङ्ग व प्रधान मन्त्री चाउ-इन-लाइया कारचीपि तस्वीर नं जात्रा याना हःगु दु । वहनी श्वय् । भी वकील साहेवया नाप १० थकालिपि व कथां कथां नं साहु साहुपि सःता तःगु दु । जि नं वना । रंगोचंगी मतकलः खायाः छायापा तःथाय् अनेक प्रकारया चिनिया नँज्वलं ज्वरे यानाः टेबिरे व्वया तःगु । थःपिनि योगु यक्क यक्क कयाः नय्गु । भीत ला भचा मछिसे च्वं । अध्यनं कयाः नया । जि जुल हिसिलां नकइगु छता नित जक चिनिया खाना नय् नंछ, चिनियात ला धात्थें हे साक्क ज्वरे याय् सः खनी, छु छु दय्का तल, गुगु दय्का तल, ल्याः ख्यानां सह मजू । शुगुया श्व सवाः उगुया व सवाः धकाः नं लुमंके फुगु मखु । टेबले दश्वी लाक्क तयातगु अनेक घासां चाःह्वीका तःगु छपाः तप्पाःगु भु खनाः भी हं कुबलेयागु थाय्भु लुमंसे वः छाया धाःसा व भुइ भीगु थाय्भुइ ज्योनांलपते थें हलंहः मना तःगु जीसाःचा नं वाउँक खनेदु ।

नय्-नी सिधय्काः ह्याउँ वाउँ मतया जले अनेक प्याखं क्यन । स्वया स्वयागु बांलाः, स्वया स्वयागु तःजि । नेपाःया गंप्याखने दैत्यथलि थें जुद्ध थय् माःगु वःप्याखं नं दु । ल्वाइगु भी देवी प्याखं, नेतमदु प्याखने थें मखु, छको छको अपि तिन्हुइबले, छको छको चुपि पागु मलाकेत बाजि नयाः लांग्रापुलिबले दभू हे दिनिक मि, ह्य हे चिक मि । अमिगु तिसा बसया तेजं मिखा हे तिनिमिनि धाः । अथे हे भी ख्वपया

महाकाली प्याखने सिंह व ह्यय्खा पिहाँ वइ थें अमि नं सिंह प्याखं व ह्यय्खा प्याखं दु । सिंहया दुने २ ह्य २ ह्य मनु च्वनाः प्याखं हुइगु जुया च्वन । थुलि बांलाक सनिगु, तिन्हुइगु कि धात्थें हे सिंह न्यासिचाया च्वंगु थें च्वं, नय्पियाना नसा लाकाः लाकाः सना च्वं थें च्वं । ह्यय्-खाया नं लहाते पपू घानाः छयँले कलिक व ल्यूने न्हिप्यं छुना तःह्य मनु सनिबले यानं स्वयबले मनु ख्वाः जुया नं तःधिकःह्य ह्यय्खा हे सना च्वं थें च्वं । वयासिवे दकले सकले बांलाः ताःगु ला मलः प्याखं । पौभाले वा क्वेँचिने जक खनाह्य मलः धात्थें स्वानाः वालाला सनाः आकासे व्वया वं थें च्वं । ल्यूँसे च्वंक मतमित स्याना तःथाय् फिलिक्क मत च्याकाः व मलः व्वाँय् वंबले धात्थें वर्षाया चान्हे पल्पसा त्वः थें । धन्य चिनिया प्याखंमोत ! उखुनु जिपि बाचाती तिनि लिहाँ वया ।

पोताला लामाजु चीने आपाः हे थासे चाःहिलाः लहासा लि थयँसेलि भचा गाक्क हे शान्ति वः थें च्वन । तिब्बतयात छगू “स्वायत्त शासित क्षेत्र” याय्त छगू ५१ह्य मनुया प्रारम्भिक समिति नं दय्कइगु जुल । उकिया उद्घाटन याय्त चीनया उपप्रधान मन्त्री मार्शल चेन-यी नं श्यन । पोताला लामाजु हे लँ स्वया हल ।

समिति स्थापना जुयाः ज्या याना हःबले सँय्तय् हानं चिनि-यात मयया वल । ल्यूने ल्यूने अमित लाक्क खँ लहाना हल । अले नेवा त व सँय् व्यापारीतय् प्रति चिनियातय् व्यवहारे नं भचा पाना वःगु खनेदत । छाया धाःसा उथाय् हे नेपाल-चीन दौत्य सम्बन्ध नकतिनि जक स्थापना जूगु । उकि भीत साप हे माने याः, न्ह्यागु माल दःसां काइगु, दां नं याकन याकन हे वीगु । गुलि गुलि माल ला बिजक जक स्वयाः नं आमदानी न्याइगु ।

थथे नेवाःतय् भचा ज्या छिना वःगुलि सँय् व्यापारीतसें जक भी नाप मिले जुयाः अमिगु माल नापं भीगु धकाः नाय्काः व्यापार याना हःगु मखु कि समीनीतसें हे “भ्याय्बुकि किमे” धाय्काः नेपाः

वयुगु स्वया हल । उकिं २१४६ नेवाः तसे समीनीत च्वनाः २५०० दँया
बुद्धजयन्ती स्वयुगु त्वहः चिनाः हिन्दुस्थान पाखे क्वाहाँ बल । पोताला-
लामायात नं भारत सरदार पाखे २५०० दँया बुद्धजयन्ती च्वति काय्त
दिल्ली निमन्त्रणा वःगुलि भारत प्रस्थान जुल ।

उथाय् श्यंवले जि तले क्वथाय् च्वनाः उस्त व्यापार मयाय्
धुन । आपाः व्यापार कुने पसले हे बंजाः तसे याइगु । अथे हे छह निह
मज्जिमगाः पि 'सोताला गो, किंदा गो' धकाः मालाः मालाः वइपित्त
जक थत च्वना हइगु । अन दुगु निता प्याता मुख्य मुख्यगु वस्तु क्यनेगु
व छता निता वस्तु बंजा तसे कुने थत हयाः मीगु ।

छन्हु जि याकःचा अथे राहुलजुया बुद्ध चर्या स्वया च्वनागु ।
समीनी छह थाहाँ बल, जि सफू स्वयाच्वनागु खनेव 'सोताला,
लामाघेपा ज्वी लना लाकि छु ?' धकाः जितः स्वयाः न्हिल । जि नं
"आपाः मखु भति भति का, फेनु नीला" धकाः धया । वं दना तु-
"महादया, सोतालायात छगू दुख बी धकाः वयागु, भचा ग्वाहालि
याना दी माल" धकाः खँ छुत ।

व जुया च्वन छह छोंपुंया कलाः । वया भाःत व हे पूर्व पाखे
जूगु खाप्पातय्गु गडबडे सित । उकिं आः वया व्यापार फुक वंजाः तय्
ल्हाते । आः वयागु दां भचा रूपला व्यु धकाः धाः वःह खनी । जि
'थुथाय् ला नाकं व्यापारे ध्यान हे तय् मफया च्वन तिनि, लिपा माल
धाःसा धाय् का नीला' धकाः होका छ्या ।

तर व अथे हइह मिसा मखु खनी । उअपतु वयाः तिवः या वया
च्वन । गबलें छु स्वय् धयाः जि नाप फेत् वइगु, गबलें छु ना धयाः
जितः थ्यू वइगु । अबले हिसिला दुबले जूसा अथे अमिसं ध्यसदयस
या. वइगु छुं लयाः महु । लिपा जितः अथे सनिगु मझि, मयो । वया
दुनेया इच्छा अथे भचा भचा यायां भचा गाक दां जितः ज्वंके धुनेव
दांया नापं थः नं प्यपुताः नेपाः वया छ्य धयागु थें खनेहु ।

धाथें ला जि नेपाः वय् न्हाःगु जूसा, छं वय्केत स्वःगु जूसा
जि वयात छु धकाः पिया च्वनि, जिगु दुगु व हिसिला हया तःगु भति
भाति च्वनाः न्हापा हे वय् धुन ज्वी ।

उकिं जि व वइगु यः मजू । व वइगु इले आपाः जि बहिली बा
हामुची देके वना च्वनेगु । छन्हु बहिली उखे थुखे यः पि व अंगले च्वया
तःगु विछं पौ स्वस्वं वयाबले छथाय् कु कवुया तःह फे छहस्या मूर्ति नं
खना । व लाखे न्हापां बहि दय्कुबले थः थमं हे वयाः चा, अप्पा ल्हया
व्यू वःह फैयागु साली दय्का तःगु हँ । अथे हे बहिया कःसिम्बले लाक
सारनाथे थें ज्यागु दु नि चला निह जःखः दुगु धर्मचक्र च्वया तःगु नं
खना । थुकिं सी दु व बहि दय्कुबले हे नेपाःया कःमितय् बौद्ध कला
नाप घनिष्ठ सम्बन्ध दय् धुं कल ।

अनं लिहाँ जक वया, वंजाः तय् भुनुभुनु खँ ल्हाना च्वंगु । जि
खनेव छहस्यां तीजक "थों पौ बीगु दु हँ" धकाः धाल । लिपा जि
सिल—छह साहुनीया पौ बीगु । व जुया च्वन ७० दँ मझि दय् धुंकाः
नं भाःत दनिह । तर अथे भाग्यं हना च्वने दुह भाःतयात छं थें वास्ता
मतसे भन्तेपिनिगु खँ न्यनाः चि हे मनसे अग्रशील कया च्वंह । वयात
वयागु उमेर व स्वास्थ्यया विवाः मतसे गोबौ गोबौमझि ध्यान भावना
याका तल खनी । लिपा तस्सकं हं मफय्काः तुगः स्वय्का लाक थाक
खँ ल्हानाः वां थें ज्वीकाः सित धाल । थ्व गज्याःगु शिक्षा, गज्याःगु
धर्म, जि मस्यू । भगवानं जा शरीरयात तस्सकं कष्ट बीगु व साःभि
नयाः यःथः थे सना ज्वीगु—निगुलि अति मज्यू, स्वाय्त माःछि नयाः
भिगु ज्या गुलि फत उलि अप्पो याय्गु मध्यम मार्ग जक कना बिज्याःगु
दु थें च्वं, मखुला ? व ला छं जकं बांलाक सी । हानं गबलें गबलें जि
हामुची वनेबले अनया लामापिसं नं अज्याःगु ज्या या धकाः गबलें
मधाः । गुलि गुलि तुगः मझिकाः वनेः भिक्षु जू वा धकाः नं गबलें
मधाः । न्हाबलें 'धाथें बौद्ध धर्म साधन याय्त पिने जक वसः हिलाः

धमग्रन्थ पाठ यानाः मन्त्र जक जपां मज्जू । धर्मया अभ्यास ला मनं
याय् माः, सुयां मन भिगु खःगु लं पाखे लाना च्वंगु दःसा वया शरीर-
वचनं याइगु ज्या नं धार्मिक ज्वीफु । थुक्रिया अःखः मन मखुपाखे
लाना च्वन धाःसा वं बांलाक विचाः जक नं याय् फइ मखु, अले विहारे
च्वनाः जन्मकाः छि धर्म-ग्रन्थ च्वना च्वंसां छुं प्राप्त याय् फइ मखु ।
धकाः जक धया हइ । हानं भगवानं नं अथे गबलें धाः थें मच्चं । सिंह-
सेनापति उपासक ज्वी धकाः धाःबले नं न्हापां स्वकां तक ला विचाः नि
याना वा धकाः लिा छ्वत मखुला ? लिपा जि बौद्ध उपासक हे ज्वी
धकाः तिबः यासंलि नं भगवानं वयात उपासक छ्वित 'जैन साधुपिन्त नं
न्हापाया थें हे दान प्रदान याय् माः, छाय् धाःसा छिभिगु कुल जैनतय्
बुंगाः खः' धकाः उपदेश बिया बिज्यात तिनि मखु ला ? सकतां तोताः
भिछु जु धकाः मधाः ।

धात्येंया खँ जा मै, मिजंतय्त मांबौया वचं काय् माः थें मिसा-
तय्त नं मां बौ अथ रा भाःतयागु वचं जक दय्वं भिछुनी छ्वीगु
भगवानं इच्छा हे मयाःगु, लिपा आनन्द भिछुं साप हे तिबः याःगुलि
तिनि वल्ल वल्ल गौतमी आदि मातृजातियात भिछुनी छ्वीगु वचन बिया
बिज्यागु, व नं मिजंतय्या सिबे अप्पो च्यागू 'गुरु धर्म' पालना याय्
धाय्काः तिनि ।

खः महाकाश्यप थें, कापिलायनी थें मचांनिसें हे त्याग भावना
दुपि जूसा भिछु-भिछुनी चर्या खः । मेपिनि निंति ला भगवानं शृगाल-
यात कना बिज्याःगु गृही विनय दु - भाःतं कलाःयात प्रेम याय्गु व
कलातं भाःतयात हनेचने याय्गु न्यागू न्यागू हे खँ । थ्व नं ला छं न्यंगु
वा च्वंगु दय्माः ।

थथे न्ह्याम्हेसित न्ह्यागु थजु थः छम्हेसित जक जीके-भिकेगु खँ
ला "आत्मार्थं पृथिवीं त्यजेत्" धाइपिसं ल्हाःसा मायू, बौद्धपिसं ला
अज्ज दशपारमिता पुरे यानाः बुद्ध जुयाः जगत संसार सत्वप्राणी उद्धार

याय् फय्मा धकाः दुष्कर चर्या यायिपि महायानी बौद्धपिसं ला गृहस्था-
श्रमयात गबलें गबलें हे निन्दा याइ मखु ।

हानं महाभारते युधिष्ठिर महाराजं धा गु दु - जिगु भर कयाः
जि नाप वःह्म खिचायात नापं च्वना यंके मदुसा जि स्वर्ग हे वने मखु ।
अथे हे ख्वप जुजुं नं थ पिन्त विपत्ति वइ धकाः सीक सीक नं "शरण
वःह्मसित मरण याय् मज्जू" धकाः जुजु जय प्रकाशयात शरण काल ।

अले छं जक छाय् जितः अपाय्चो लोमंकागु वा लोमंकेगु कुतः
यानागु ? अथेभनं याय् माय्क जि छुं अपराध यानागु दु थें मच्चं ।
अज्ज न्ह्याबलें छन्त लुमंका च्वनागु दु । धात्येंया खँ जा हिंसिला दुबले
नं जि वयात नं छ हे भाःपाः जक हे येका च्वनागु खः । थथे छंगु हे
आधार कया च्वंह्म, हानं छं नं न्हापा अपाय्चो योह्म - पलख वाय्
मालकि सुकुसुकु ख्वया ज्वी माय्क योह्म जितः थुलितक, थुगु अवस्था
ज्वीकाः तक नं वास्ता मयासे च्वंबले छु छन्त पाप मलाइ ला ? खः थ्व
पाप काचाक्क स्वयंबले दशाकुशल पापे मलाः थें च्वं, तर मेपिन्त सिक्तिकं
थथे नुगले स्याकेगुयात छं धर्मया दुने लाके फइ मखु, व नं मभिगु नुगले
तयाः मखु, मत्योगु नुगले तयाः मखु, धर्म नं हंगु कर्म नं हंगुकथं व छं
नं न्हापा न्हापा योगुकथं नाप च्वने धकाः न्यादँ तक महान् तपस्या
यानाः लिहाँ वयाह्म जितः उलित तापाकाः । छाय् धाःसा व भिगू पापे
चित्तं याइगु गुगु स्वंगु पाप दु व नं मनं चाय्क व मचाय्क याना
च्वनि । उकिं छं चाय्क छुं पाप मयाना धाःसां, धात्यें शरीरं छुं पाप
मयाःसां, छंगु ह्म पिने पवित्र खःसां छं मचाय्क जि खनाः घञाया च्वंगु
दु, छु यानाः जितः तापाके, गुगु यानाः जि नाप हने मोके धकाः मने
ग्वयाः पाप याना च्वंगु दु, थ्व खँ जि बांलाक स्यू । थुक्रियात छं मान-
सिक पाप मखु धकाः धाय् फइ मखु । उकिं हे ला ज्वी बर्माया मिसातसें
सुं मिजनं अमित येकाः ल्यूल्यू जुल धाःसा अमित नुगले स्याकेव पाप
लाइ धकाः थः मयोसां येकाः वयाके हे वना छ्वागु । धात्येंया

मिसानुगः ला व धकाःले !

हानं जि ल्हासा वयागु हे दं छको मीथाय चुके प्याखं हुइके हःगु । प्याखं सिधयकाः धितिमुनिचां मिखा संकाः रुमाल ध्वेकुबले मेमेपि पासापिनि नापं जि नं ॥ ३॥ मोह दां बिया । छको ला न्यताः नं तिया छया । वहनी छ गय्चवंक तंवेकुगु । लुमंनि ला छं छु धयागु ? “व प्याखंमो मिसा धकाः भाःपाः मखाः अथे दां व्यूगु । व धात्थें मिसा जूगु जूसा छु जक याइगु ज्वी थ्व मिजंतसें !” मखुला ? लिपा जि नं विचाः याना स्वयाबले खः थें नं च्वना वल । अथे नं जि छन्त धया — “मिसा धकाः ला मखु वं न्यताः गा वंक न्हिलाः मछाः पहलं घुं कयाः धात्थें मिसाथें च्वंक प्याखं हुया क्यने स गुलि जक व खनाः लय्तायागु खः ।” तर छ माने मजू च्छि थुस्स च्वना च्वन । आः छं हे धासा ल्हाःग्वय् फयाः सँप्याकाः च्वसिन्हः छाय्का च्वनाह्य जगाजगि दय्क दय्कं, हानं जि अपाय्चो येक येक नं थथेभनं जितः हेला यानाः नुगः ख्वय्केगु गय् जुथाः धर्म ज्वी ?

छं अष्टमी व्रतया बाखं ला न्यंगु हे दु । उकी गज्याः गज्याःगु बाखं दु छं लुमंनि मखुला ? विचरा सुदर्शनां सुं वांलाःपि मिजंत ल्वःवनाः मखु, भाःत मयेकाः नं मखु, खालि आकाभाकां वीरकुशया रूप खनाः ग्यानाः विसि वंसां, लिपा व हे वीरकुशयात येकाः जन्म-काःछि सेवा याना वनं नं न्हापा वीरकुशयात “विरहन विदेश जि वने” धाय् माय्क नुगले स्याकुगुलि मंदिराया जन्मे थः भाःत विध्वन्तर राजकुमारं नुग हीक दान बीका च्वनेमाल । अज्ज यशोधरा जुयाः नं सिद्धार्थ कुमारं वाकाः ख्वया च्वने माल, छें च्वना नं मातानी थें जुया च्वने माल ।

लाःसा मै, छं थ्व खँया अर्थ “हानं थ्व मिजंत नेपाः वयाः दुःख व्यू वय् त्यन तिति” धकाः छयाना च्वनि । छं धन्दां काय्मो, अथे छन्त मछिक् पंगलः जुयाः दुःख व्यू वय् मखुत । हानं जि ल्हासाय्

दनि वा फलानाथाय् दनि धकाः नं छं लुमंके बिया च्वने मखुत, माय्के बिया च्वने मखुत । गनं सुनानं मस्य थाय्, सुं ह्यस्य तास्य पि मदु थाय् वना छय् त्यना थ्व लाबलां हे । थनयागु व्यापार व दुगु धन सम्पत्ति सकतां वंजाः पासापिन्त लिसमा बिया थके । अमिसं धर्म खंसा छुं भति छन्त हया हे बी । मच्युसा व नं छन्त नय्-त्वने-तीत मा गु हे मखु, दान-प्रदान याय्त्त खः, अमित हे दान याना धकाः भाःपा छु ।

थ्व फुक खँ च्वयागु ला छं जितः मचाय्क ख्वय्काः हाय्काः नुगले स्याकुगु पापं यानाः छं लिपा दुखसी धकाः जक खः । उकिं छं थ्व खँ फुक छको खः मखु वांलाक विचाः याना स्व, खः थें च्वंसा खः धकाः भापि, थुलि हे जिगु थपाय् मछि हाकःगु पौ च्वयागु ज्या वल । मखु जिगु छुं दंगु हे दुसां उकियात क्षमा नं या, छाय् धाःसा क्षमा याय् फुपि सुं दःसा पृथ्वीयां कय मिसात हे खः ।

आः जि छ नाप थथे जन्मकाछिया निरिति बेला काय् न्ह्यः छन्त छु बी, मेगु बी लोगु वस्तु छुं मखने धुन । उकिं छं हं कुबले छिमि मामं बिया हःगु ल्हाःग्वय् ल ल्हाना व्यू थें जि नं जिमि निम्हेस्या सम्बन्धया स्वापू जुया वंगु थ्व टप छजो छन्त बी त्यना । नापं हिसिलां वया अबुं स्वथना थकुगु धकाः तिति पापा याना तःगु, मि नं थी मखु धाःगु चिकिचा कूगु चिनिया कय्चिं छकू नं यछायाः अबले छन्त बिज्यासः य.या न्ह्यःने च्वसिन्हः छाय्काः हया थें थ्व जिगु दुनुगलंनिसंया सिहः छपता नं तयाः सुवाः बिया च्वना —

छं थुगु जन्मे दुःख मज्जीमा !

मेगु जुनी नं सुख सी दय् मा !

मै, छं नं थुकियात जिगु जीवनया दकलेसकले तःजिगु कस्यालि भाःपाः लः ल्हाना का !

यमै, थुगु जन्मयात थुलि हे जुल । मेगु मेगु जन्मे ।

छं न्हापा दकले सकले योह

...

चित्तधर हृदय' या

काव्य—



महाकाव्य—
बाखं—

बाल साहित्य—

एकांकी सहित—
भाषा सम्बन्धी—
साहित्यया इतिहास सम्बन्धी—
नेपाल सगीत विषये—
संकलन—
अनुदित—
धार्मिक—
यात्रा सम्बन्धी—

पद्य निकुञ्ज
हृदय-कुसुम
वभ्रुवाहन
गौतम-बुद्ध
हृदय-कथा
अन्तरध्वनि
न्हूगु स्वां
याकःमिया चा
मञ्जुश्रीयात 'नेपाल' या बुखँ
देगः
चीन लुमनाः
श्व नं जिमि वेत

सुगत-सौरभ
खुपु बाखंचा
शायभु
मिमनःपौ
झी मचा (वर्णमाला)
झी मचा (निगूगु)
हनागा
नेपाल भाषा गय् च्वय्गु !
झीगु साहित्य
नेपाल-रंगीत (अंग्रेजी)
अंत्याक्षरी
स्वपु सूत्र
बुद्ध वचनमृत व नेपालया बौद्ध दृष्टि
महाचीने नेपाल-संस्कृति